

## **Ka tisa-ni rigixxi'akana ge Jesús-ni, ka nu ben Lucas-ni**

### *Ka tisa-ni udhelha Lucas-ni len Teófilo*

<sup>1</sup> Ixe ka benne chi benke ukuake latsiru lo yetsi ka tisa ata rigixxi'a ge nu ben Jesús-ni lagwi geri'i. <sup>2</sup> Ukaba atti tteba chi utixxi'a ka benne sisi'a tte bilákanie nu ukaha, nianna tti bixúke lo sina ge Tata Do Yebáha utixxi'ake ka tisa geeha. <sup>3</sup> Anágaba neti xa tata Teófilo, iki de chi ugwekia ulea liia gaxattiga siná udulo desdeli sisi'a tteha, nianna ukati ukuaya ka tisa-ni latsiru lo yetsi kini idhelhaa na len kwinalu, <sup>4</sup> kini anáchu nna lu una tselu gaxasinattiga uka iyá nu chi bele'ekanie lu.

### *Ttu ka anjeli ge Tata Do Yebáha rigixxi'abie deki gali Juan-ni*

<sup>5</sup> Tti uka Herodes-ni nu rinnabia daka Judea, la'ania udo ttu benne uke bixxudi utta lábie Zacarías. Benneha sele lhe'e ttu dhi ka bixxudi nna uke luesi bixxudi uka benne utta lábie Abías. Benne nuila ge Zacarías-ni lábie Elisabet. Benneha datiagabe ka benne datiake Aarón-ni; delába Aarón benne sisi'a tte uke bixxudi ge ka benne Israel-ni. <sup>6</sup> Zacarías-ni lhe Elisabet-ni lhe ixpabake ankake benne ruin tse arlo Tata Xisiha. Rudo tsitsibake tisa gebie, ruinbake iyába nu rabie. Laxkala labí bixa ge ritisake. <sup>7</sup> Ttaka nna lanú xi'inke raka, kumu nan Elisabet-ni labí

uka uja xi'in benneha. Gwea nna chigaba dia raxxuke la'ania.

<sup>8</sup> Ttu sá ulha ka bixxudi, ka nu selakana len Zacarías-ni, kini uinkana sina ge Tata Do Yebáha lhe'e yotuha. <sup>9</sup> Uinkana attiba chi ga'anna runi ka bixxudiha. La'ania nna gwaxxína ulha Zacarías-ni uta'abie lhe'e yotuha ata daa bekú ge Tata Xisiha kini ku'ubie sen yala. <sup>10</sup> Laka rite yalaha lo bekúha nna ka benne tupake lali'a ro'o yotuha nna se'ebake rilhapike tisa len Tata Xisiha. <sup>11</sup> Nuha-ba raka nna attiruba chi uka xxe ttu anjeli ge Tata Xisiha bisie udúe daka ná ben ge bekú ata rite yalaha. <sup>12</sup> Tti bilani Zacarías-ni anjeliha nna uka tee lanie lhe usigabanie lhe. <sup>13</sup> Ttaka anjeli ge Tata Xisiha nna rane:

—Zacarías, bittu gasinlu kumu Tata Xisiha chiba biyieninie ge nu rinnabalu lenie, de nuha nna benne nuila gelu, Elisabet-ni, chi utebie ttu xi'inlu. Nutoha nna kixxalu lábi Juan. <sup>14</sup> Lu nna edeaka tábinlu lhe anágaba nna ixegaba ka benne tse'e ittake lenlu ganna chi uli bintoa, <sup>15</sup> kumu xi'inluha akabi benne xxeni arlo Tata Do Yebáha. Labí i'iyabi vinu, nigaba attu bixa ttu nu dika udhusinna bi. Sa nujala nan gebiha bi chi isia Espíritu ge Tata Do Yebáha tsu'e itúba latibi. <sup>16</sup> Labí odekibi ixé ka benne Israel ki odaxxuke neda ge Tata Do Yebaa benne anke Xxanakeha. <sup>17</sup> Lagababi nuha nnerubi kini idhalhibi neda ge Tata Xisiha; kweki lebi attiba uleki le Elías-ni lhe inná tsitsi lebi attiba uná tsitsi le benneha. Aníha kini ose'e tsebi ka tataha len ka xi'inkeha lhe uinbi kini ka nu abittu rudokana tisa ulaba lekani attiba rulaba le ka nu ruin latsiru. Aníha uinbi kini ose'e tsebi ka benne kini anáchu chi

se'eke ubeda Tata Xisiha ganna chi isiabie yiesi lo yu-ni.

<sup>18</sup> Zacarías-ni nna unnaba tise anjeliha, ree benneha:

—¿Gasina ki aka xen lasia deki gwalí aka nu ralu-na? Kumu neti chiba ankaa benneola lhe anágaba benne nuila kia-ni lhe.

<sup>19</sup> Anjeliha nna bekabie nna ree:

—Neti láya Gabriel. Doa rixúa runia nu ra Tata Do Yebáha. Labie udhelhe neti kini inne lania lu, kixxi'ania lu ka tisa tse. <sup>20</sup> Ttaka lu nna de labí ria lelu ge ka tisa kia-ni, de nuha nna eya'anbalu biría; labí aka innelu. Axtaliba ganna chi bisia sá tti chi sadona aka nu ria-ni, la'anialiba nna eyaka ennelu.

<sup>21</sup> Laka raka nuha nna ka benne se'e lali'a ge yotuha nna se'ebake ubeda eria Zacarías-ni. Chiba rudúna ke de anúbie reriaxxi ata daa bekúha. <sup>22</sup> Ttaka tti chi berieha nna labíru raka innebie ulise ka benne se'e niha. La'anialiba nna tti ute dákanie deki bixa bele'eni Tata Do Yebáha bie lo bekúha, laxkala gwatebie aníha. A sunruba rutá nábie rule'enie ka benneha nna aníha-ba beya'ane biría.

<sup>23</sup> Tti chi beda'a sá gebie benie sina lhe'e yotuha, la'ania nna deyye lisie. <sup>24</sup> Iki de chi ute nuha nna birua bisá nna attiruba chi bele'e nuja xi'ini nan Elisabet-ni. Delo gayu beo labí birie yo'o. Nianna rabie: <sup>25</sup> “Aní chi ben Tata Xisiha. Gwatua lebie neti kini abitturu uxisi ka benne kia de lanú xi'inia raka.”

*Anjeli ge Tata Do Yebáha rigixxi'abie deki gali Jesús-ni*

<sup>26</sup> Tti chi uka xxupa beo nna Gabriel benne anke anjeli ge Tata Do Yebáha dedheyye bededhelha Tata Do Yebáha bie lhe'e ttu yiesi re daka Galilea-ni. Yiesiha tee láni Nazaret. <sup>27</sup> Niha do ttu nuila ribani re'eni, chi banani ttu nubiyú-na. Nubiyúha tee láni José. Nuha datiana David, benne unnabie ka benne Israel-ni itú nu reha. Nuila ribaniha tee láni María. <sup>28</sup> Tti uta'a anjeli ge Tata Do Yebáha ata do María-ni, nianna rabie na:

—¡Padiuxi, nuila! Tata Xisiha gwa duba lenie lu. [Delo iyá ka benne nuila, lu nuná akaru lenie lu.]

<sup>29</sup> Ttaka María-ni tti biyieninna ka tisa unne anjeliha nna uka télinna, nianna rakinna: “¿Bí dien benne-ni unnee aná?” <sup>30</sup> Ttaka anjeliha nna rabie na:

—María, bittu gasinlu, kumu Tata Do Yebáha-ba aka lenie lu. <sup>31</sup> Nnanna nna uja xi'inlu nna gali ttu nuto biyú to. Nubiyú toha nna kixxalu lábi Jesús. <sup>32</sup> Nutoha akabi benne inná xxeni lebi nna kixxakana lábi Xi'ini Benne ra xxeni lebie do yebáha. Tata Do Yebaa benne anke Xxanari'iha nna unie kini innabiabi attigaba unnabia David benne uke benneola gebiha, <sup>33</sup> lhe anágaba nna ttu dia liiba innabiabi ka benne Israel-ni. Labí lhuxa loo elha rinnabia gebi.

<sup>34</sup> María-ni nna unnaba tisana anjeliha, rane:

—¿Gasina aka nu ralu-na ki anúgaba nubiyú chi do lania?

<sup>35</sup> Anjeliha nna bekabie geni, ree:

—Espíritu ge Tata Do Yebáha-ba isiabie tsu'e latilu. Nianna Tata Do Yebáha, len nu ra

tsitsi leeha unie kini tsu'u attiba ttu xula ge ttu bea ikilu. Laxkala binto galiha nna akabi gebie nna kixxakana lábi Xi'in Tata Do Yebáha.

<sup>36</sup> Anágaba benne raka luesiluha, delába Elisabet-ni, benneha chigaba gali xi'inie meskiba chi anke benneola. Labie rákana deki lanú xi'inie aka, ttaka nnanna nna chi aka xxupa beo-ni du benneha nuje benne. <sup>37</sup> Aníha aka kumu Tata Do Yebáha labí tee ttu bixa abí aka ge benneha unie; iyába gwakaba ge benneha unie.

<sup>38</sup> Nianna ra María-ni:

—Neti ankabaa benne rixúni Tata Xisiha. Uinbe len neti nu chi ralu-na.

Nianna tti bedá anjeli ge Tata Xisiha, deyye.

*María-ni ugíana gwalannina Elisabet-ni*

<sup>39</sup> Ttu chupa ubisaba chi ute nna bediuba tteba le María-ni diana iki ka i'iya ata re ttu yiesi daka Judea. <sup>40</sup> Tti bisinna lhe'e yiesi toha nna uta'ana lhe'e yo'o ge Zacarías-ni nna begwena Elisabet-ni padiuxi. <sup>41</sup> Tti biyienin Elisabet-ni tsi'i María-ni begwene padiuxi, nuto nujeha nna bitá ttebabi lhe'ebie, la'ania nuha bisia Espíritu ge Tata Do Yebáha uyu'e lati Elisabet-ni, <sup>42</sup> nianna tti unnebie idisa, ree:

—¡Tata Do Yebáha chi ukaru lenie lu tti adí ka benne nuila lhe anágaba akagaba lenie binto nujalu-na! <sup>43</sup> Neti nna, ¿nú ankaa nna axtaba nan ge Benne runie neti mandaduha, axtaba benneha dabie gwelanni neti? <sup>44</sup> Kumu suna biyienbati tsi'ilu nna binto nujaa-ni bitá ttebabi lhe'a de bedeakinbi. <sup>45</sup> ¡Karubárulu ugía lelu deki gwakaba iyá nu chi ra Tata Xisiha lu!

<sup>46</sup> María-ni nna rana:

Itú iki itú lasia runia ki ra xxeni le Tata Xisiha  
 47 lhe anágaba yalhá itta du lasia de bodilábie  
 neti.

48 Kumu Tata Do Yebáha chi bilánie neti labí ra  
 xxeni lasia lhe anágaba ankgabaa benne  
 rixúnie lhe.

Laxkala debá nnanna nna iyába ka benne  
 innáke: “¡Karubáru nuila-na!”

49 Kumu Tata Do Yebaa benne ra tsitsi leeha,  
 xxeniba anka nu chi benie len neti.

Benneha nari xúba anke

50 lhe satíaba ratua lebie ka benne ria leke bie

51 lhe anágaba rula'abie nu xxeni ra leeha.

Betse'e loogabe nu rulha le ka nu ruin ttaba

52 lhe riguabie ka nu ra tsitsi lekinna ata ribi-  
 akana rinnabiakana

nna ka benne labí ra xxeni leke nna rugwebie  
 lidhakake.

53 Ka benne rituinke abittu bi geke tee nna bete  
 tame geke

nna ka nu tee gekinna nna suna anába bese'ebie  
 kana.

54 Bete nábie len ka benne Israel-ni, delába ka  
 benne rixúnie ruinke nu ree.

Labí bexxulha lebie a satua lebie ke,

55 kumu aníha chi rabie ka benne uka xuttoleha.

Rabie deki satíaba satua lebie Abraham-ni lhe ka  
 benne datiake benneha lhe.

56 María-ni nna niha-ba beya'anna udona  
 len Elisabet-ni ttiba tsunna beo. Deloliba nna  
 deyyana besinna lisini.

*Juan benne rugadie indaha ulie*

57 Tti chi gwadona beo gali xi'in nan Elisa-  
 bet-ni, nianna uli ttu nuto biyú to. 58 Tti bina  
 ka benne se'e gaxxaba ata doeha lhe ka benne

raka luesieha lhe, tti binake deki chi gwatua le Tata Do Yebáha bie betebie ttu xi'inie, la'ania nna bedeakakin benneha lenie. <sup>59</sup> Tti chi uka xxunu ubisa uli bintoaha, nianna bitupake uchúke lo bela lati bi'iniha kini unna liina deki chi ankabi ge Tata Do Yebáha. Benbake attiba chi ra lo bia bennabi ge ka benne Israel-ni. Nianna ruinke kixxake lá bintoaha Zacarías ttiba lá tata gebiha. <sup>60</sup> Ttaka nan gebiha nna rabie:

—¡Labí gatta lábi aná! Juan-ba gatta lábi.

<sup>61</sup> Ka benne tupa niha nna bekabike gebie, ráke:

—Lanú benne datialu do lábíe aná.

<sup>62</sup> Nianna tti betten náke tata ge bintoaha, ki unnaba tisake bie bixa raka lebie gatta lá bintoaha. <sup>63</sup> Benneha nna unnabe ttu breta kini unie loni. Lo nuha nna benie ree: “Juan-ba gatta lábi.” Nianna iyábake bebanakanie. <sup>64</sup> Tti lo benie nuha nna beyali tteba ro'obie nna beyaka tteba bennebie. Nianna tti unnebie ree:

—¡Xxeniba ra le Tata Do Yebáha!

<sup>65</sup> Iyába ka benne se'e gaxxa ata do yo'o gekeha nna bebanabakanie. Anágaba ka benne se'e itúba daka iki ka i'iya sia daka Judea-ni rinnegabake ge iyá nu chi ukaha. <sup>66</sup> Iyába ka benne binake ge nuha nna rulaba leke, ráke:

—¿Nú isina binto-na akabi ganna?

Aníha ráke kumu rite dákanie deki Tata Xisiha-ba nuha du lenie bintoaha.

*Zacarías-ni rinnebie ka tisa bete Espíritu ge Tata Do Yebáha*

<sup>67</sup> Zacarías tata ge bintoaha, tti bisia Espíritu ge Tata Do Yebáha uyu'e itúba latie, nianna tti

uduloe unnebie ka tisa bete Espirituha, nianna ree:

68 ¡Xxeniba ra le Tata Do Yebáha benne anka Xxana ka benne Israel-ni,

kumu chi bisiabie kini odilábie ka benne gebie!

69 Chi udhelhe ttu benne ra xxeni lebie ki odilábie ri'i.

Benne-ni datiabie David, delába David, benne bixúni Tata Do Yebáha kini benie nu ree.

70 Benbe attiba rabie itú ttuha tti bixúnie ro'o ka profeta geeha kini unneke nu unieha.

71 Rabie deki odilábie ri'i lo ná ka nu abittu raka uyúkana ri'iha lhe lo ná ka nu rutía di lekani ri'iha lhe.

72 Chi rabie deki satua lebie ka benne uka xuttori'iha;

labí uxxulha lebie nu chi reeha.

73 Nuní unnebie len Abraham-ni, benne uke xuttori'iha,

74 delába tti rabie deki odilábie ri'i lo ná ka nu abittu raka uyúkana ri'iha

kini anáchu nna anutturu nu ge gasinri'i ganna chi ixúri'i uinri'i nu reeha.

75 Uinri'i ttiba runi ttu benne chi beyarie lhe runie nu dika ixú lhe.

Aníha-ba uinri'i itúba tse'eri'i aka benri'i.

76 Lu nna xa xi'ini to, kixxakana lálu profeta ge Benne ra xxeni lebie doe yebáha,

kumu lu tsialu nnerulu idhalilu neda ge Tata Xisiha, use'e tselu ka benne laka isie.

77 Kixxi'enlu ka benne Israel-ni deki gwadíbe elha xen lasi ge ka tulha chi benke lhe godilábe ke lhe,

78 kumu Tata Do Yebaa geri'iha ratua xxatta lebie ri'i.



Yebáha-li udhelhe ttu benne anka xiani dabie gwelanni ri'i

<sup>79</sup> kini udanie iki ka benne se'eke ata anka chulha lhe ruxunnigabana geke gattike lhe.

Aníha kini ku'ubie ri'i neda ata tse'e tseri'i lenie.

<sup>80</sup> Nuto ge Zacarías-ni nna diaba bi'iniha rix-enbi lhe ribe yala lebi lhe. Itúba uka bi'iniha tania, lo yu bisi ata lanú benne se'e, niha-ba udobi. Attiliba chi bisia sá bele'e lobi len ka benne Israel-ni, la'anieliba nna biriabi ugwekibi.

## 2

### *Aní uka tti uli Jesús-ni*

*(Mt. 1:18-25)*

<sup>1</sup> Uka nuha tti uka César Augusto-ni nu rinnabia itúba Roma, la'ania nuha udhelhana ttu yetsi len ka benne se'e itúba ata rinnabianaha, rinnabana eyadha láke kini yuna balhaxa ka benne chi se'e. <sup>2</sup> La'ania nuha sisi'a tte beyadha lá ka benne. La'aniagaba anka Cirenio-ni nu rinnabiana daka Siria. <sup>3</sup> Nianna iyába ka benne teeki beyyake lhe'esi ataliba ulikeha kini gwate láke.

<sup>4</sup> Laxkala de nuha nna José-ni teeki bedábie lhe'esi Nazaret. Anka nuha ttu yiesi rena daka Galilea. Nianna deyye besine lhe'esi Belén. Yiesiha nna dedebena daka Judea ata uli David-ni. Niha-ba beyya José-ni kumu anke benne datiabie David-ni <sup>5</sup> kini gwate lábie lenie María benne nuila geeha. Chi du benneha nuje benne. <sup>6</sup> Ttaka gwaxxína, tti lo se'eke niha, chi gwadona gali xi'in María-ni. <sup>7</sup> La'ania nna uli xi'in sisi'a tte gebie. Ulibi ata ru'u ka ku'una

biaha. Iki de tti chi beyaka uli bintoha nna bottesi tteba María-ni bi'iniha lari nna utixxe bi lhe'e ata ru'u nu ro ka nimalaha. Ata ru'u ka ku'una biaba ulibi kumu labíru ukanike eya'anke lhe'e yo'o do lhe'e yiesiha ata reya'ana ka benne yu'u neda.

*Ka anjeliha rigixxi'akanie ka benne se'e lo ka neruha deki chi uli Jesús-ni*

<sup>8</sup> Gaxxaba Belén-ni reya'ana ka benne rekike lo ka neru to gekeha, ruyúke ka nuha lo rela lhe'exxiha. <sup>9</sup> Ttiruba nna ttu nnelaba chi uka xxe ttu anjeli ge Tata Xisiha ata se'e ka benneha. Tti uyu'u xiani ge Tata Xisiha abi'iba ata se'ekeha, nianna usi xxattakanie. <sup>10</sup> Ttaka anjeliha nna ree ke:

—Bittu gasinle, kumu neti daya ugixxi'en le ttu tisa tse, tisa nu dika odú ittana le iyába ka benne. <sup>11</sup> Lhe'esi ata uli David-ni, nasá chi uli ttu benne ki odilábie ka benne. Labie anke Cristu lhe anke Xxanari'i lhe. <sup>12</sup> Laxkala ganna eyyale nna saxxakale bintoha rilhibi lari yu'ubi lhe'e ata ru'u nu ro ka ku'una biaha. Ganna chi gwaxxakale bi'iniha, la'ania nna chi yule deki lababi nuha tee niha.

<sup>13</sup> Attiruba ttu nnelaba chi uka xxe adíru ka anjeli daa yebáha use'eke kwe'e anjeli du gwenneha nna rulhake ge Tata Do Yebáha, ráke:

<sup>14</sup> ¡Xxeniba ra le Tata Xisiha doe yebáha!

¡Yiesi lo yu-ni nna tseba tse'e ka benne uinke nu ru'u lebie!

<sup>15</sup> Nuha-ba ra ka anjeliha, nianna beyapike deyyake yebáha. Ka benne se'e lo ka neruha nna ra luesike:

—Eya'achuri'i lhe'esi Belén-ni, salanniri'i nu chi uka niha, nu chi utixxi'ani Tata Xisiha ri'i.

<sup>16</sup> Bediuba tteba leke deyyake. Tti besinke niha nna gwaxxakake María-ni lenie José-ni lhe bintoha lhe, yu'ubi lhe'e ata ru'u nu ro ka ku'una biaha. <sup>17</sup> Tti bilákanie bintoha, la'ania nna utixxi'ake iyá nu chi ra anjeliha ke ge bi'iniha. <sup>18</sup> Nianna iyába ka benne biyienkanie ge nu utixxi'a ka benne reki lo ka neruha nna bebanabakanie. <sup>19</sup> Ttaka María-ni nna rudhá tsitsiba lebie iyá nuha nna ttu ttu sába rulaba lebie ge nuha. <sup>20</sup> Ka benne reki lo ka neruha nna beyekibake deyyake rulhake ge Tata Do Yebáha lhe ráke deki xxeniba ra lebie. Aníha ráke de bebanakanie ge nu biyienkanieha lhe ge nu bilákanieha lhe, kumu ukaba atti tteba chi utixxi'ani anjeliha ke.

### *Jesús-ni betso duke bi arlo Tata Do Yebáha*

<sup>21</sup> Atti chi gwadona xxunu ubisaha nna uchúke lo bela latibi attiba ra lo bia bennabi ge ka benne Israel-ni. La'ania nna utixxake lá bi'iniha Jesús attiba chi ra anjeliha María-ni atti lanila uje bi'iniha.

<sup>22</sup> Tti chi bisia sá eyarike arlo Tata Do Yebáha attiba chi ra lo bia bennabi bodha'an Moisés-ni, la'ania uche María-ni lhe José-ni nutoha lhe'esi Jerusalén-ni. Ucheke bi'iniha kini gwatso duke bi arlo Tata Xisiha. <sup>23</sup> Benbake attiba chi ra lo bia bennabi bodha'an Tata Xisiha ata dia ra: “Iyába ka nuto ka nu sisi'a tte galikana, ganna ankakana nubiyú to, la'ania nna teeki iriesikana ki akakana ge Tata Xisiha.” <sup>24</sup> Aníha uka nna ugíake gwateke ka nu bani to ttiba ttu úna,

beteke nuha len Tata Xisiha. Benbake attiba ra lo bia bennabi geeha ata dia ra: “Utele chupa ka bexu to o chupa ka becha to.”

<sup>25</sup> La'aniagaba do ttu benne biyú lhe'esi Jerusalén-ni, labie Simeón. Anke ttu benne ruin tse lhe rudo tsitsirue tisa ge Tata Do Yebáha lhe. Benneha dobie ubeda nukaxa idhelha Tata Do Yebaa benne odú itte le ka benne Israel-ni. Espiritu ge Tata Xisiha gwa duba lenie Simeón-ni <sup>26</sup> nna chi rabie benneha labí gattie axtaliba ganna chi bilánie isia Cristu, benne chi ga'anani Tata Xisiha idhelhe. La'anieliba nna gattie. <sup>27</sup> Espirituha nna chebie Simeón-ni die yotu la sáha. La'aniagaba bisin ka tata nan ge Jesús-ni lenbi kini uinke nu ra lo bia bennabiha.

<sup>28</sup> Nianna tti bedaxxu Simeón-ni nutoha nna uxxua lo nábie bi nna ulhapie tisa len Tata Do Yebáha, ree:

<sup>29</sup> Nnannaligaba xa Tata Xisi to, chi uka nu ráluha.

Neti benne rixuinlu, chibanka ugwelhalu neti gattia,

<sup>30</sup> kumu ixpa la'aba loa chi biláti benne udelhalu kini odilábie ri'itu.

<sup>31</sup> Benneha chi ga'aninlu idhelhalu lo iyá ka benne se'e yiesi lo yu-ni.

<sup>32</sup> Anke ttiba ttu xiani udanie iki ka nu abittu anakana nu Israel;

nna ka benne gelu nna delába ka benne Israel-ni, unie kini inná xxeni leke.

<sup>33</sup> José-ni lenie nuila geeha nna bebanabakanie tti biyienkanie nu ra Simeón-ni ge bintoha.

<sup>34</sup> La'ania nna unnaba Simeón-ni kini aka len

Tata Do Yebáha ke. Nianna tti rana María nan ge nutoha:

—Binto-ni chi ga'anabi deki ukinnibi lhe odilábi ixe ka benne Israel-ni lhe anágaba nna akabi ttu benne ku'u ni'akani bi, <sup>35</sup> kumu de udobi be nu satsa rulaba le ixe ka benne. Anágaba lu nna uyúlu elha disa ge nu ud-hakakana bi. Attiba ttu nu ga'a espada lhe'e lastoni, aníha-ba akalu.

<sup>36</sup> Ro'o yotuha-gaba du ttu benne nuila lábie Ana. Benneha anke profeta ge Tata Do Yebáha. Anke xi'iniunná Fanuel benne datiabie ttu dhi ka benne datiake benne utta lábie Aser. Ana-ni chi anka benneha ttu nanto to la'ania. Kwiti tte benneha betsá nábie, ttaka gasi idaruba udo lenie nubiyú geeha nna uka ttebe bidabi. <sup>37</sup> La'ania nna chi ankanie tta bixxi ttapa (84) ida nna labí rudú siie rie yotu. Rela resába rixúe runie nu ra Tata Do Yebáha, rutte ubina lhe'ebie lhe rilhapie tisa len benneha lhe. <sup>38</sup> Looraha-gaba bisine ata do yotuha. Rugwebie ixkixaru len Tata Do Yebáha. Nianna udulobie utixxi'e ge Jesús-ni arlo ka benne se'e ubeda odilá Tata Do Yebáha Jerusalén-ni, delába ka benne Israel-ni.

*Ka José-ni deyu'uke neda deyyake lhe'esi Nazaret*

<sup>39</sup> José-ni lhe María-ni lhe, iki de chi benke iyá nu chi ga'anna lo bia bennabi bodha'an Tata Xisiha, la'ania nna beyekike deyyake nna besinke lhe'esi Nazaret. Nazaret-ni ankana yiesi geke nna rena daka Galilea. <sup>40</sup> Binto Jesús-ni nna diaba bi'iniha rixenbi lhe ribe yala lebi lhe.

Aníha-gaba nna diagababi ridoruinbi xiani lhe raka len Tata Do Yebáha bi lhe.

*Jesús-ni dobi ro'o yotuha*

<sup>41</sup> Ka tata nan ge Jesús-ni ttu ttu idaba riake lhe'esi Jerusalén-ni tti risia laní Pascua. <sup>42</sup> Tti chi ukani Jesús-ni tsi'inu (12) ida, la'ania nna dia lenke bi Jerusalén-ni attiba chi labikanie riake laní. <sup>43</sup> Iki de tti chi ute laníha nna beyekike dedáke, ttaka binto Jesús-ni nna beya'anba bi'iniha lhe'esiha. Ka tata nan gebiha nna bi ute dákanie deki niha-ba beya'an binto. <sup>44</sup> Rakakanie ganna lhe'e adíru ka benne dedaaba desela bi'iniha. Laxkala nna beyu'ubake neda ttu sá, ttaka tti begilake bi'iniha ata dedá ka benne raka luesikeha lhe ka benne ankabiakanieha lhe <sup>45</sup> lanú bi'iniha gwaxxakake. Aníha uka nna beyekibake deyyake Jerusalén-ni ugila bi.

<sup>46</sup> Ukaliba tsunna ubisaha nna gwaxxakake bi dobi ro'o yotuha lagwi ge ka nu rule'ekinna ka benne nu ra lo bia bennabi bodha'an Tata Do Yebáha len Moisés-ni. Rudo nagabi ge ka nuha lhe rinnaba tisabi kana lhe. <sup>47</sup> Iyába ka nu se'e rudo nagakani gebi rebanabakinna ge elha rieni do ikibi lhe rebanabakinna ge ka tisa rekabibi ge ka nuha lhe. <sup>48</sup> Tti bilani ka tata gebiha bi dobi len ka nuha, bebanabakanie. La'ania nna ra nan gebiha bi:

—Xi'ini to, ¿beaka bedhakalu ri'itu aná? Tata gelu-ni lhe neti lhe yalhá chi rudúna ri'itu rekitu ugila lu.

<sup>49</sup> Jesús-ni nna bekabibi gebie, rabi:

—¿Beaka regilale neti? ¿Si bi gwa yule deki rakarula doelha udo lasia nu anka sina ge Tata kiahaha?

<sup>50</sup> Ttaka lake nna labí bette dáke bixa diani nu ra bi'iniha ke.

<sup>51</sup> La'ania nna deyyababi len ka tata nan gebiha besinke lhe'esi Nazaret. Niha-ba udobi bedobi tisa ge ka benneha ge iyába nu ráke bi. Nan gebiha nna rudhá tsitsiba lebie ge iyá nu ukaha. <sup>52</sup> Jesús-ni diababi rixenbi lhe rido chiettirugabinbi xiani lhe. Anágaba Tata Do Yebáha lhe ka benne lhe, ru'ugaba leke elha ruin gebi.

### 3

*Juan benne rugadi indaha ridhalie neda ge Jesús-ni*

*(Mt. 3:1-12; Mr. 1:1-8; Jn. 1:19-28)*

<sup>1</sup> Tti chi uka tsinu (15) ida rinnabia Tiberio César-ni itúba Roma, Poncio Pilato-ni nna rinnabiana daka Judea-ni, Herodes-ni nna rinnabiana daka Galilea-ni, betsini Felipe-ni nna rinnabiana daka Iturea lhe daka Traconite lhe. Benne tee lábie Lisantias nna rinnabie daka Abilinia. <sup>2</sup> Anás-ni lhe Caifás-ni nna ankakana ka bixxudi xeni. La'ania nna belisa Tata Do Yebáha Juan, xi'in Zacarías-ni, dona lo yu bisi ata lanú benne se'e. <sup>3</sup> Nianna utena itúba daka ro'o yoo Jordán-ni rigixxi'enna ka benne kini odúna ke ge nu ruinke nna odaxxuke neda ge Tata Do Yebáha nna gadike inda, kini anáchu dhi benneha elha xen lasi ge ka tulha ruinke. <sup>4</sup> Ukaba attiba ra profeta Isaías-ni tti unnebie lo ka yetsi ge Tata Do Yebáha, ree:

Lo yu bisi ata lanú benne se'e, niha riyieni tsi'i  
ttu benne rinnebie idisa, ree:

“Gwalegixxa tse neda ge benne anke Xxa-  
nari'iha;

gwalolixxa neda kini dhabie.

<sup>5</sup> Iyába ata re ka xieru-na nna esákana.

Ka i'iya-na lhe ka sitta xua xea-na lhe  
eságabakana kini eyaka lapa.

Ka neda kwalha-na nna ese'e lhixxakana;  
anágaba ka neda anka satsa-na, eyaka lapakana,

<sup>6</sup> kini anáchu nna iyá ka benne ilákanie benne  
idhelha Tata Do Yebáha kini odilábie ke.”

<sup>7</sup> Ixeru ka benne ririake ki rugadi Juan-ni ke  
inda, nianna rana ke:

—¡Aalexu nu ruin satsa! ¡Lebi'i ankale ttiba  
ka belha-na! ¿Nú chi rana le deki gwalále lo  
elha disa tsitsi nu chi dabigana ute Tata Do  
Yebáha gele? <sup>8</sup> Gwaluni nu dika ixú ganna xa.  
Aníha kini ule'e deki gwalí chi ankale benne  
bodúna le ge nu ruinle nna bodaxxule neda  
ge Tata Do Yebáha. Abittu tse'ele ulaba lhi'u  
lele akinle: “¡Ri'itu gwalábatu, kumu de ankatu  
benne datiatu Abraham-ni!” Netiru ria, Tata Do  
Yebáha ganna aka lebie, gwakaba gebie eyonie  
ka íyya du'uya nii kini eyakakana benne datia  
Abraham-ni; a laa kila iyasanie le. <sup>9</sup> Anágaba  
nna chigaba du tse iyyatteha kini ichúna itupa  
lhu ka yaga. Laxkala iyába ka yaga ka nu abittu  
utekana nu xixxi tse, ka nuha chúbakana nna  
iru'unakana tsiakana lo giha. Aníha-ba nuha  
satele ganna abíba uinle nu dika ixú.

<sup>10</sup> Ka benneha nna rinnaba tisake Juan-ni,  
ráke:



—Ganna aníha nna, ri'itu, ¿bíla anka nu uintu ganna?

<sup>11</sup> Juan-ni nna bekabina geke, rana:

—Ganna ttu benne se'e chupa xobie, teeki utebie ttu nuha len attu benne abittu xobie tee; lhe ganna ttu benne tee lena robie, teeki kidhie nuha ugwebie benne abittu gebie tee.

<sup>12</sup> Bisingaba ttu chupa ka gwekixa kini gadikana inda. Nianna rákana Juan-ni:

—Maestru, ri'itu nna, ¿bíla anka nu uintu ganna?

<sup>13</sup> Lana nna rana kana:

—Abitturu ukixale yani lo nu chi ga'anna ukixale.

<sup>14</sup> Unnaba tisagaba ttu chupa ka soldadu, rákana:

—Ri'itu nna, ¿bíla anka nu uintu?

Lana nna bekabina gekani, rana:

—Abittu uniasinle ka benne. Bittu uinle aníha ki kuale nu tee geke. Bittugaba kwenta usiale ikike deki benke ttu bixa. Gwaleyaka xenba lele ttixaruba gaxale.

<sup>15</sup> Ka benne tupa niha nna rudo tsitsiba nagake kumu ribedake Cristu benne chi ga'anani Tata Do Yebáha idhelhe nna iyábake rulaba lhi'u leke rakakanie: “¿Si laaba Juan-niba nuní anke Cristu?” <sup>16</sup> Ttaka Juan-ni nna unnena rana iyába ka benne tupa niha:

—Gwalí galá neti tti rugadia ka benne inda, suna indaba rixúti, ttaka si dala attu benne tsitsirula ra lebie tti neti. Neti nna labí elha ralhaa idhasia lo ka gwaracha geeha. Benneha nuha ugadie le Espíritu ge Tata Do Yebáha lhe ugadie le gi lhe. <sup>17</sup> Chi den tse barkilu ge benneha

kini uin tsebie xuxtilaha nna ganna chi bolhube sináha nna ottupe xuxtilaha nna oga'abie xuaha ata regua tsebie benneha. Nianna tti udelhe tee ge xuaha lo gi nu satíaba rite loniha, nu abittu reyola loniha. Lebi'i nuha udhake aníha.

<sup>18</sup> Iyá nuní unne Juan-ni tti belisana ka benne bele'enna ke ka tisa tse bete Tata Do Yebáha. <sup>19</sup> Anágaba nna utisagaba Juan-ni Herodes nu rinnabiaha, kumu de bedo lenna Herodías nu anka nuila ge betsini Felipe-ni lhe utisagabana na ge adíru ka nu satsa bennaha. <sup>20</sup> Ttaka betse'e loona, iki de iyá nu satsa chi ben Herodes-ni nna bedienrula geni: bega'alana Juan-ni lhe'e lisiyya de bedona na be ge nu ruinnaha.

*Jesús-ni udie inda*

*(Mt. 3:13-17; Mr. 1:9-11)*

<sup>21</sup> Uka nuha tti rugadi Juan-ni iyába ka benne inda, la'aniagaba udi Jesús-ni inda. Laka dubie rilhapie tisa len Tata Do Yebáha, nianna biyali yebáha. <sup>22</sup> La'ania nna ugwadi Espíritu ge Tata Do Yebáha, anke attiba ttu becha nna betedhobie iki Jesús-ni. Nianna biyien tsi'i ttu benne rinnebie yebáha, ree bie:

—Lu ankalu Xi'inia rakati gelu. Lu ankalu benne ruinlu nu ru'u lasia.

*Nii dia lá ka benne datiake Jesús-ni*

*(Mt. 1:1-17)*

<sup>23</sup> Jesús-ni chi ankanie ttiba rerua (30) ida tti uduloe sina ge Tata Do Yebáha. Ra ka benne deki lee uke xi'in José nna datiabie Elí.

<sup>24</sup> Elí nna uke xi'ini Matat,  
Matat nna uke xi'ini Leví,  
Leví nna uke xi'ini Melqui,

Melqui nna uke xi'ini Jana,  
Jana nna uke xi'ini José,  
<sup>25</sup> José nna uke xi'ini Matatías,  
Matatías nna uke xi'ini Amós,  
Amós nna uke xi'ini Nahum,  
Nahum nna uke xi'ini Esli,  
Esli nna uke xi'ini Nagai,  
<sup>26</sup> Nagai nna uke xi'ini Maat,  
Maat nna uke xi'ini Matatías,  
Matatías nna uke xi'ini Semei,  
Semei nna uke xi'ini José,  
José nna uke xi'ini Judá,  
<sup>27</sup> Judá nna uke xi'ini Joana,  
Joana nna uke xi'ini Resa,  
Resa nna uke xi'ini Zorobabel,  
Zorobabel nna uke xi'ini Salatiel,  
Salatiel nna uke xi'ini Neri,  
<sup>28</sup> Neri nna uke xi'ini Melqui,  
Melqui nna uke xi'ini Adi,  
Adi nna uke xi'ini Cosam,  
Cosam nna uke xi'ini Elmodam,  
Elmodam nna uke xi'ini Er,  
<sup>29</sup> Er nna uke xi'ini Josué,  
Josué nna uke xi'ini Eliezer,  
Eliezer nna uke xi'ini Jorim,  
Jorim nna uke xi'ini Matat,  
<sup>30</sup> Matat nna uke xi'ini Leví,  
Leví nna uke xi'ini Simeón,  
Simeón nna uke xi'ini Judá,  
Judá nna uke xi'ini José,  
José nna uke xi'ini Jonán,  
Jonán nna uke xi'ini Eliaquim,  
<sup>31</sup> Eliaquim nna uke xi'ini Melea,  
Melea nna uke xi'ini Mainán,

Mainán nna uke xi'ini Matata,  
Matata nna uke xi'ini Natán,  
<sup>32</sup> Natán nna uke xi'ini David,  
David nna uke xi'ini Isaí,  
Isaí nna uke xi'ini Obed,  
Obed nna uke xi'ini Booz,  
Booz nna uke xi'ini Salmón,  
Salmón nna uke xi'ini Naasón,  
<sup>33</sup> Naasón nna uke xi'ini Aminadab,  
Aminadab nna uke xi'ini Aram,  
Aram nna uke xi'ini Esrom,  
Esrom nna uke xi'ini Fares,  
Fares nna uke xi'ini Judá,  
<sup>34</sup> Judá nna uke xi'ini Jacob,  
Jacob nna uke xi'ini Isaac,  
Isaac nna uke xi'ini Abraham,  
Abraham nna uke xi'ini Taré,  
Taré nna uke xi'ini Nacor,  
<sup>35</sup> Nacor nna uke xi'ini Serug,  
Serug nna uke xi'ini Ragau,  
Ragau nna uke xi'ini Peleg,  
Peleg nna uke xi'ini Heber,  
Heber nna uke xi'ini Sala,  
<sup>36</sup> Sala nna uke xi'ini Cainán,  
Cainán nna uke xi'ini Arfaxad,  
Arfaxad nna uke xi'ini Sem,  
Sem nna uke xi'ini Noé,  
Noé nna uke xi'ini Lamec,  
<sup>37</sup> Lamec nna uke xi'ini Matusalén,  
Matusalén nna uke xi'ini Enoc,  
Enoc nna uke xi'ini Jared,  
Jared nna uke xi'ini Mahalaleel,  
Mahalaleel nna uke xi'ini Cainán,  
<sup>38</sup> Cainán nna uke xi'ini Enós,  
Enós nna uke xi'ini Set,

Set nna uke xi'ini Adán,  
Adán-ni nna uke benne ben Tata Do Yebáha.

## 4

*Nu xzegwiha ruinna dhi yiena Jesús-ni  
(Mt. 4:1-11; Mr. 1:12-13)*

<sup>1</sup> Jesús-ni chiba deyu'u Espíritu ge Tata Do Yebáha itúba latie bedábie ro'o yoo Jordán-ni deyye. Nianna deche Espírituha bie lo yu bisi ata lanú benne se'e. <sup>2</sup> Delo chua (40) ubisaha ben nu xzegwiha dhi yiene. Labí utobie yetta itúba ugwekie niha. Tti chi gwadona chua ubisaha, la'ania nna tti ugwetti bitunie. <sup>3</sup> Nianna tti ra nu xzegwiha bie:

—Ganna si gwalíginlu ankalu Xi'in Tata Do Yebáha, usichu íyya re nii eyakana yettaxtila ki golu.

<sup>4</sup> Jesús-ni nna bekabie geni, ree:

—Lo ka yetsi ge Tata Do Yebáha dia ra: “Laa sunruga len yettaxtila aka ben ka benne.”

<sup>5</sup> Nianna che nu xzegwiha bie iki ttu i'iya nna bele'enne ttu satti iyá ka yiesi ka nu ra tsitsi lekani se'e yiesi lo yu-ni. <sup>6</sup> Nianna tti rane:

—Neti utea lo neda lenlu kini innabialu kana, anágaba lhe utea nu tse tee gekinna, kumu neti chi bisiakana lasi náya. Laxkala utebaa kana len benne rakaba lasia ugwea. <sup>7</sup> De nuha nna ganna si lu udú xibilu arloa nna utsá lolu neti, la'ania nna iyába ka nu chi bele'a-na akakana gelu.

<sup>8</sup> Jesús-ni nna bekabie geni, ree:

—Lo ka yetsi ge Tata Do Yebáha dia ra: “Suna arlo Tata Do Yebaa benne anke Xxanaluha, suna

arlo benneha-ba udú xibilu lhe suna nu innabe uinlu lhe.”

<sup>9</sup> Nianna deche nu xzegwiha bie lhe'esi Jerusalén-ni nna tti ulhapine iki yotuha gwetsáli. Nianna rane:

—Ganna si gwalíginlu ankalu Xi'in Tata Do Yebáha, niili dulu nna ubinnichu lo yuha,  
<sup>10</sup> kumu lo ka yetsi geeha dia ra:

Tata Do Yebáha idhelhe ka anjeli geeha kini uyú tsitsike lu.

<sup>11</sup> Udoni lo náke lu kini abittu tsu'u ni'alu iki ka íyya.

<sup>12</sup> Jesús-ni nna ree na:

—Lo ka yetsiha-gaba dia ra: “Bittu dhi yielu Tata Do Yebaa benne anke Xxanaluha.”

<sup>13</sup> Atti abíruba udaa nu xzegwiha gaxasina dhi yiena Jesús-ni, nianna bekwittachilana. Isá to gwadána bekwittana kwe'ebie.

*Jesús-ni uduloe rigixxi'abie ka tisa ge Tata Do Yebáha*

*(Mt. 4:12-17; Mr. 1:14-15)*

<sup>14</sup> Jesús-ni nna beyekie besine daka Galilea. Tsitsiba ra lebie de yu'u Espíritu ge Tata Do Yebáha latie. Nianna lhe'e iyába ka yiesi se'e abi'iba niha, ugwadhi tisa ge nu runieha. <sup>15</sup> Labie nna lhe'e ka yo'o ata rudheti ka benne Israel-ni ka tisa ge Tata Do Yebáha, niha-ba rekie rule'enie ka benneha. Laxkala iyábake ráke:

—¡Xxeniba ra le benne-ni!

*Jesús-ni besine lhe'esi Nazaret*

*(Mt. 13:53-58; Mr. 6:1-6)*

<sup>16</sup> Jesús-ni beyye lhe'esi Nazaret ata bixenieha. La sá tti reyaka le ka benne Israel-ni uta'abie

lhe'e yo'o ata rudhetike ka tisa ge Tata Do Yebáha attiba labinie runie. La'ania uta'abie nna udúbie kini ulabe ka tisa ge Tata Do Yebáha.

<sup>17</sup> Begwekane ka yetsi ben Isaías benne uke profeta ge Tata Do Yebáha. Tti udhalie lo ka yetsiha nna gwaxxake ata dia ra:

<sup>18</sup> Espiritu ge Tata Xisiha yu'ubie latia kumu chi ulesie neti kini tsiaya kixxi'aya ka tisa tse len ka benne abittu tee geke nna udhelhe neti kini odú tsea le ka benne du si'i leke,

lhe kixxi'ania ka benne tee lisiyya deki gwalábake,

lhe anágaba nna edhalia iyya lo ka benne xua loke.

Udhelhababe neti kini odiláya ka benne ruyúke elha disa ttixka bixa rudhakakana ke,

<sup>19</sup> lhe kixxi'aya deki isia sá Tata Xisiha aka lenie ka benne.

<sup>20</sup> Nianna tti bottesie yetsiha nna bogwebie benne rigua tsebie ka yetsiha nna tti bedoe. Iyába ka benne se'e niha nna doba loke bie.

<sup>21</sup> Nianna tti unnebie, ree:

—Nasá chi bilenle uka nu belabaa lo yetsi-ni.

<sup>22</sup> Iyába ka benne se'e niha rinne tseke ge Jesús-ni lhe rebanabakanie ge ka tisa tsagwi rinneehe. Lhe anágaba nna rinnaba tisa luesike, ráke:

—¿Laaba xi'in José-niba benne-ni?

<sup>23</sup> Jesús-ni nna ree ke:

—Gaxa gwa rakabinle gale neti ttu tisa tee nu rinne ka benne ráke: “Lu nu reyoni ka benne rani, la lu tte beyoin latilu”, o innále: “¿Beakala

lhe'esi gelu-ni a ruinlu luesi nu chi binatu benlu lhe'esi Capernaum-ni?"

<sup>24</sup> Nianna unne chiettirue, ree:

—Netiru ria, ni ttú profeta ge Tata Do Yebáha, a rulabikane lhe'esi geeha. <sup>25</sup> Neti gwalígati xa, use'e galá ixé ka benne nuila bidabi lo yu ge Israel-ni tti udo profeta Elías-ni. La'ania labíru iyya uka delo tsunna ida nalhaha, nianna bisiaru ttu ubina itúba ata se'e ka benne Israel-ni.

<sup>26</sup> Ttaka Tata Do Yebáha, ni len ttú ka benne nuila bidabi ge Israel-ni a udhelhe Elías-ni kini ute nání len ka benneha. ¿Laaba ganna len nuila bidabi ge lhe'esi Sarepta, delába yiesi re daka Sidón, laaba ganna len nuilaha-la udhelhe na?

<sup>27</sup> Aníha-gaba tti udo profeta Eliseo-ni, ixegaba ka benne use'e lo yu ge Israel-ni, uka latike yiesu nu tee lání lepra. Ttaka ni ttú ka benneha a betúa yiesuha latike. ¿Laaba ganna Naamán benne doe lo yu ge Siria, benneha-la gwa betúa yiesuha latie?

<sup>28</sup> Tti biyienin iyá ka nu se'e gwedo naga lhe'e yo'oha nu ra Jesús-ni, nianna bisa'a xxattakinna

<sup>29</sup> nna tti udú liikana uleakane ro'o yiesiha, chekane ro'o belha'a du ro'o yiesiha. Nuha rena iki ttu i'iya. Niha ruinkana uttulhukane. <sup>30</sup> Ttaka Jesús-ni beyeki ttebe betebie lagwi gekani nna deyye.

*Jesús-ni bebebie ttu espíritu satsa yu'u lati ttu nubiyú*

*(Mr. 1:21-28)*

<sup>31</sup> Jesús-ni beyadie besine lhe'esi Capernaum. Nuha rena daka Galilea nna lhe'e ka sá atti reyaka le ka benne Israel-ni nna rule'enie ke



ka tisa ge Tata Do Yebáha. <sup>32</sup> Ka benneha nna rebanabakanie ge nu rule'enie keha, kumu rinnebie ttiba ttu uxtisi rapa lo neda.

<sup>33</sup> Lhe'e yo'o ata rudhetike ka tisa ge Tata Do Yebáha, niha re ttu nubiyú yu'u latini ttu espíritu satsa. Nubiyúha nna itú leni uresi'ana, rana:

<sup>34</sup> —¡Begwelha ri'itu! ¡Bittu etega'a gelu len ri'itu, lu Jesús ge Nazaret! ¿Si dalu gwetse'e loo ri'itu? Neti gwankabiabati lu. Lu ankalu benne chi ulesi Tata Do Yebáha.

<sup>35</sup> Jesús-ni nna bedhaka dise espíritu xxegwiha, ree na:

—¡Bedhea ro'olu nna beria lati nubiyú-ni!

Nianna uru'una nu xxegwiha nubiyúha lo yu arlo iyába ka benne se'e niha. Nianna tti beria ttebana latini, labíru bixa bedhakana nubiyúha.

<sup>36</sup> Iyába ka benne se'e niha uka télakanie nna rinnaba tisa luesike, ra luesike:

—¿Bí anka ka tisa rinne nubiyú du nii? ¡Xxeniba ra leni rulisana ka espíritu satsa-na kini eriakana nna gwa rudobakana tisa geni reriakana!

<sup>37</sup> Iyába ka benne se'e lhe'e ka yiesi se'e itúba ka daka niha rinneke ge nu ruin Jesús-ni.

*Jesús-ni beyonie nan ge nuila ge Simón-ni  
(Mt. 8:14-15; Mr. 1:29-31)*

<sup>38</sup> Jesús-ni beriabe lhe'e yo'o ata rudheti ka nu Israel-ni ka tisa ge Tata Do Yebáha nna gwate'e lisi Simón-ni. Nan ge nuila ge Simón-ni nna teba benneha ranie, yu'u xxatte xilhaa. Nianna unnabakana len Jesús-ni kini eyonie benneha. <sup>39</sup> Jesús-ni nna biyette arlo benne nuilaha, bedhaka dise xilháha nna beria ttebana lati

benneha. Looraha tteba nna beyadha benneha nna benie nu utoke.

*Jesús-ni beyonie ixe ka benne rani*

*(Mt. 8:16-17; Mr. 1:32-34)*

<sup>40</sup> Atti chi chadi tatubisa-na, iyába ka benne se'e ka benne rani geke, ka benne ridakake iyá looba isagwe, cheke ka benneha ata du Jesús-ni. Jesús-ni nna iki ttu ttu ka benneha rixxua nábie nna reyonie ke. <sup>41</sup> Lati ixegaba ka benne raniha beria ka espíritu xxegwiha, ribesi'abakana rákana:

—¡Lu ankalu Xi'in Tata Do Yebáha!

Ttaka Jesús-ni nna rudhaka disalee ka nuha. Labí rugwelhe kana innekana, kumu yúbakana deki labie anke Cristu benne chi ga'anani Tata Do Yebáha idhelhe.

*Jesús-ni rigixxi'abie ka tisa ge Tata Do Yebáha daka Galilea*

*(Mr. 1:35-39)*

<sup>42</sup> Tti ugwani dilaha, biria Jesús-ni ro'o yiesiha ata lanú benne risatsa. Ttaka ka benne regilake bie nna gwa bisinbake ata dueha. Ruinke ukwedake bie kini abittu eyye. <sup>43</sup> Ttaka lee nna ree ka benneha:

—Rakagaba doelha kixxi'ania ka benne se'e lhe'e adíru ka yiesi ka tisa tse, delába kixxi'ania ke gasina ki akake benne innabia Tata Do Yebáha ke, kumu de nuha-la udhelhe neti.

<sup>44</sup> Aníha-ba dia Jesús-ni [daka Galilea-ni] rigixxi'e ka tisa tseha lhe'e ka yo'o ata rudheti ka benne Israel-ni ka tisa ge Tata Do Yebáha.

## 5

*Ka Pedruha bedaxxuke ixeni belha*  
*(Mt. 4:18-22; Mr. 1:16-20)*

<sup>1</sup> Ttu lidú do Jesús-ni ro'o indatoo ge Genesaret. Yalhá ixé ka benne tupa niha, axtaba rukí ya'ake bie de raka leke iyienkanie ka tisa ge Tata Do Yebáha. <sup>2</sup> Nianna bilani Jesús-ni chupa ka barcu dákana ro'o indaha. Lanú nu tee lhe'ekani, kumu ka benne rudaxxuke belhaha si ugwadilake rigíke ka yexxa gekeha. <sup>3</sup> Jesús-ni nna ugwapie lhe'e ttu ka barcuha nna unnabe len Simón nu anka xxana barcuha kini usigana nuha a latti lhe'e indaha. Nianna tti udoe lhe'e nuha. Niha-liba doe nna uduloe rule'enie ka benne tupa ro'o indaha. <sup>4</sup> Tti chi beyaka unneeha, nianna ree Simón-ni:

—Uche barcu-ni ata re idila inda-na nna gwaludelha ka yexxa gele-na kini udaxxule belha.

<sup>5</sup> Simón-ni nna bekabina, rane:

—Betuelaba uyu'utu sina xa tata, nurula biyaxxuintu. Ttaka ganna aná ra kwinalu nna udelhachua ka yexxa-ni.

<sup>6</sup> Atti beyalhhikana ka yexxaha nna desá tíba belha lhe'e ka nuha. Chi tteba isúkana. <sup>7</sup> Nianna bettá nákaní uxikana adíru ka nu se'e lhe'e attu barcuha kini ugía ka nuha nna bete nákaní lenkana. Laxkala ixpaba ka barcuha besá tíbakana belha. Chiba ruinkana xxudikana lhe'e indaha kumu de dedá xxattakana idi'i. <sup>8</sup> Tti bilani Simón nu tegaba lani Pedro, tti chi bilenna nu chi ukaha, nianna tti bedú xibini arlo Jesús-ni nna rane:

—¡Ubi'etta kwe'a xa tata! Kumu neti ttu nu runi tulhaba ankaa.

<sup>9</sup> Aníha rana kumu lana lhe adíru ka nu se'e lennaha yalhá bebanakinna de bedaxxu xxat-takana belha. <sup>10</sup> Aníha-gaba gwate Jacobo-ni lhe Juan-ni lhe. Ka nuha ankakana ka xi'in Zebedeo-ni. Lakana ribengabakana turo'o len Simón Pedro-ni. Ttaka Jesús-ni nna rabie Simón Pedro-ni:

—Bittu gasinlu. Debá nnanna nna labíru udaxxulu belha; ka bennela chi dhulolu gaxilu kini udaxxuke neda ge Tata Do Yebáha.

<sup>11</sup> Nianna tti bebeakana ka barcuha ro'o indaha nna bese'e bixxikana ka nuha nna dia ttebakana danalhakana Jesús-ni.

*Jesús-ni beyonie ttu benne raka latie yiesu nu tee láni lepra*

*(Mt. 8:1-4; Mr. 1:40-45)*

<sup>12</sup> Ttu sá do Jesús-ni lhe'e ttu ka yiesi se'e niha. Niha bisin ttu benne biyú sia xxatta latie yiesu nu tee láni lepra. Tti bilen benneha Jesús-ni nna bere tteba loe lo yu nna unnabe len Jesús-ni, ree bie:

—Tata xisi to, ganna lu aka lelu, gwadaabalu eyoinlu neti.

<sup>13</sup> Nianna tti belhí ná Jesús-ni utane lati benneha nna ree:

—Gwaka galá lasia. ¡Nnanna, chinka beyaka!

Loora rinne Jesús-ni nna betúa tteba yiesuha lati benneha. <sup>14</sup> Nianna tti ra Jesús-nie:

—Anuttu nu galu. Beyyala gwatso du arlo bixxudiha nna bete úna nu daa lolu utelu ge Tata Do Yebáha de chi beyarilu. Beni attiba raba lo bia bennabi bodha'an Moisés-ni. Aníha kini uyú lo ka benne deki chiba betúa isagwe-na latilu.

<sup>15</sup> Ttaka meskiba besuna Jesús-ni nna adíla ug-wadhi tisa ge nu runieha. Laxkala ixé ka benne ritupake kini rudo nagake gebie lhe ki reyonie ke ge bixaba isagwe ridakake. <sup>16</sup> Jesús-ni nna reru'une ata anuttu benne risatsa kini rilhapie tisa len Tata Do Yebáha.

*Jesús-ni beyonie ttu benne daa yatti latie*  
(Mt. 9:1-8; Mr. 2:1-12)

<sup>17</sup> Ttu sá do Jesús-ni rule'enie ka benne ka tisa ge Tata Do Yebáha. Niha-gaba betetse'e ttu chupa ka fariseo-ni lhe betetse'egaba ttu chupa ka nu rule'ekinna ka benne nu ra lo bia bennabi bodha'an Tata Do Yebáha len Moisés-ni, ka nu daba lhe'e iyába ka yiesi to se'e daka Galilea-ni lhe daka Judea-ni lhe ka nu daba lhe'esi Jerusalén-ni lhe. Jesús-ni nna, kumu de du Tata Xisiha lenbie, de nuha nna tsitsiba ra lebie reyonie ka benne rani. <sup>18</sup> Nianna bisin ttu chupa ka nubiyú chekana ttu benne daa yatti latie xuakinne lo ttu breta. Ruinkana uga'akana benneha lhe'e yo'o ata du Jesús-ni kini sattixxakana benneha arloe. <sup>19</sup> Ttaka de abí galá anka gaxa ga'a lenkana benneha kumu de tupa xxatta ka benne ro'o yo'oha, aníoka nna ugwapi lenkana benneha iki yo'oha. Utuakana ttu chupa ka texa ki udo belea nna ulhidakana benne xua lo bretaha lagwi ge ka benne saa niha. Aníha benkana kini bisine arlo Jesús-ni. <sup>20</sup> Tti bilani Jesús-ni gwa riaba leke deki gwadaabe eyonie benneha, nianna ree benne raniha:

—Nnanna chiba bixú elha xen lasi ge ka tulha gelu-na xa nubiyú.

21 Ka nu rule'ekinna ka benne nu ra lo bia bennabi bodha'an Moisés-ni lhe ka fariseo-ni lhe belaba lhi'u lekani, rakakinna: “¿Nú anka nubiyú du-ni nna rilhida gaana Tata Do Yebáha? Sunruba benneha gwa raka gebie ridíe elha xen lasi ge ka tulha ruin ka benne.”

22 Ttaka Jesús-ni nna ute dábanie nu rulaba lekaniha, nianna unnaba tise, ree kana:

—Lebi'i, ¿beaka rulaba lele aná?

23 Gwalinnáchu, ¿bí nuha nu sattiru innári'i? ¿Si innári'i: “Chiba bixú elha xen lasi ge ka tulha gelu-na” ak? o ¿innári'i: “Beyadha nna bedá”? 24 Ttaka nnanna chi ula'ania le kini uyú lole deki neti benne daya yebáha, yiesi lo yu-ni gwa teeba lo neda kia ki dhia elha xen lasi ge ka tulha ruin ka benne.

Nianna tti ree benne daa yatti latieha:

—Lu, rulisaa lu. Beyadha nna bodaxxu breta xualu loin-na nna beyya lisilu.

25 Looraha nna beyadha tteba benne biyúha arlo iyába ka benne se'e niha nna bodaxxue breta nu uxue loniha. Nianna tti deyye lisieha, rulhe ree:

—¿Xxeniba ra le Tata Do Yebáha!

26 Iyába ka nu se'e niha bebanabakinna nna itú rasibakinna, rákana:

—Xxeniba ra le Tata Do Yebáha. Nasá chi bilenri'i uka ka elha tsagwi.

*Jesús-ni raxie Leví-ni kini sanalhane*

*(Mt. 9:9-13; Mr. 2:13-17)*

27 Iki de nuha nna beria Jesús-ni lhe'e yo'oha, nianna bilánie ttu gwexixa dona ata rukixakana belhiu nu daa lo ka benne rigixake ge Roma-ni.

Nu anka gwekixaha tee láni Leví. Nianna tti ra Jesús-ni na:

—¿Utá, betenalha neti!

<sup>28</sup> Nianna udú lii Leví-ni nna bedhá bixxi ikini sina ruinnaha nna gwanalha ttebana Jesús-ni.

<sup>29</sup> Delola nna ben Leví-ni ttu laní ge Jesús-ni lhe'e lisiniha nna ixeru ka gwekixa lhe adíru ka benne lhe use'ekana lenke go yetta. <sup>30</sup> Ttaka ka fariseo-ni lhe anágaba ka nu rule'ekinna ka benne nu ra lo bia bennabi bodha'an Moisés-ni, udulokana rulisakana ka benne rudhetini Jesús-ni, rákana ke:

—¿Beakala lebi'i nna ri'a robale len ka gwekixa-na lhe len ka nu ruin satsa-na lhe?

<sup>31</sup> Ttaka Jesús-ni nna bekabie gekani, ree:

—Ka nu abittu rani-na, ka nuná labí riyasakinna nu eyoinna kana, sinuki ka nu rani-na nuná riyasakinna nu eyoinna kana.

<sup>32</sup> Neti laa dagaa raxia ka nu runi nu dika ixú, sinuki dalaa raxia ka nu ruin satsa, kini odúna kana nna odaxxukana neda ge Tata Do Yebáha.

*Jesús-ni rigixxi'abie nuka utte ubina lhe'e ka benne*

*(Mt. 9:14-17; Mr. 2:18-22)*

<sup>33</sup> Nianna rákana Jesús-ni:

—¿Beakala ka benne rudhetini Juan benne rugadi indaha lhe ka benne rudhetini ka fariseo-ni, rutte xxatta ubina lhe'eke, labí roke yetta lhe rilhapike tisa len Tata Do Yebáha lhe? ¿Beakala ka nu rudhetinlu-ni nna ri'a roba ka nuní?

<sup>34</sup> Jesús-ni nna bekabie gekani, ree:

—¿Laaba ganna labí aka gele uinle ki utte ubina lhe'e ka benne biyaxike ki tse'eke dha'aha

ganna ttixka sa duba nu kwiti rutsá náníha lenke? <sup>35</sup> Ttaka ganna chi bisia sá itua nu kwitiha, anutturuna dho lenke, la'anialiba nna chi utte ubina lhe'e ka benne se'e dha'aha.

<sup>36</sup> Utixxi'agabanie kana ttu tisa. Aníha benie kini utte dákana bí diani nu raka lebie kixxi'anie kanaha. Nianna tti ree:

—Lanú ttu benne do richúe salha'a ro'o xo kubi geeha nna otábie na ro'o xo yaxxuha, kumu ganna aníha unie, la'ania nna utse'e loobe xo kubiha. Anágaba nna lari kubiha laa gwetogin nuha edúna ro'o lari yaxxuha. <sup>37</sup> Nigaba lanú ttu benne do rige'e vinu kubi lhe'e ka yieti yaxxu, kumu ganna aníha unie, la'ania nna vinu kubiha, ganna chi galana nna itsúba nuha yietiha. La'ania nna ilaliba vinuha lhe tse'e loogaba yietiha lhe. <sup>38</sup> Laxkala teeki ka'ake vinu kubiha lhe'e ka yieti kubi. <sup>39</sup> Nigaba lanú ttu benne do ri'e vinu yala, delo nna ede'ogaba lebie i'ie vinu kubi, kumu ree: “Vinu yala-na nuná ri'aru ixí.”

## 6

*Jesús-ni anke xxana ka sá reyaka leri'i*

*(Mt. 12:1-8; Mr. 2:23-28)*

<sup>1</sup> La sá tti reyaka le ka benne Israel-ni ute Jesús-ni lhe'e ka xuxtila se'e niha. Ka benne rudhetinieha nna richekuke iki ka xuxtilaha nna rixubi len náke benneha nna roke ka xua toha.

<sup>2</sup> Nianna tti unnaba tisa ttu chupa ka fariseo-ni ke, rákana ke:

—¿Beaka ruinle nu abittu ga'anna uinri'i la sá reyaka leri'i?

<sup>3</sup> Jesús-ni nna bekabie gekani, ree:



—¿Si lagwa chi belabale lo yetsti ge Tata Do Yebáha bí ben David-ni? Yule benneha lhe ka benne dia lenieha lhe, ttu lidú bituinke nna <sup>4</sup> uta'abie lhe'e yotu ge Tata Do Yebáha, nianna bedaxxue ka yettaxtila chi riesike ankake sun tteba ge Tata Do Yebáha, delába ka yettaxtila ka nu labí aka go attu benne subi, sunruba ka bixxudiha gwa ga'anna gokana benneha. ¿Laaba ganna David-ni utobe benneha nna begwegabe ka benne dia lenieha kini utoke?

<sup>5</sup> Rágaba Jesús-ni kana:

—Neti benne daya yebáha, netiba ankaa xxana ka sá reyaka leri'i. De nuha nna gwa teeba lo neda kia innía bixa dika uinri'i lhe'e ka sá reyaka leri'i.

*Ttu nubiyú daa yatti ttu lha'a nání*  
(Mt. 12:9-14; Mr. 3:1-6)

<sup>6</sup> Uka nuha tti bisia attu sá tti reyaka le ka benne Israel-ni, la'ania uta'a Jesús-ni lhe'e yo'o ata rudhetike ka tisa ge Tata Do Yebáha. Nianna udulobie rule'enie ka benne se'e niha. Lhe'e yo'oha-gaba re ttu benne biyú daa yatti ttu lha'a nábie. <sup>7</sup> Ka nu rule'ekinna ka benne nu ra lo bia bennabi bodha'an Moisés-ni lhe ka fariseo-ni lhe se'ekana rulatsikana ge Jesús-ni ganna si gweyonie ttu benne rani la sáha, kini aníha-chu nna tee ro'okani bixa usiakana ikie. <sup>8</sup> Ttaka labie nna, kumu yu galábie nu rulaba lekaniha, nianna ree benne daa yatti neeha:

—Udú lii nna utá udú lagwi-ni.

Benne biyúha nna udú lii ttebe die. <sup>9</sup> Nianna tti ra Jesús-ni kana:

—Neti raka lasia innaba tisaa le ttu bixa. ¿Bí ga'anna uinri'i lhe'e ka sá tti reyaka leri'i? ¿Si uinri'i latsiru ak? ¿O uinri'i nu satsa ak? ¿Si odilári'i ttu benne o ugwelhari'i gattie ak?

<sup>10</sup> Nianna tti bodeki loe belannie lo iyába ka benne se'e abi'iba kwe'eeha nna rabie benne biyúha:

—Belhí nálu.

Aníha-ba ben benneha nna beyaka tteba neeha. <sup>11</sup> Ttaka lakana nna yalhá bisa'a xxat-takinna nna udulo ttebakana ra luesikani bixa udhakakana Jesús-ni.

*Jesús-ni bekwebie tsi'inu (12) ka benne kini tsiake kixxi'ake ka tisa geeha*

*(Mt. 10:1-4; Mr. 3:13-19)*

<sup>12</sup> La'ania ttegaba nuha ugwapi Jesús-ni iki ttu i'iya do niha, nianna ulhapie tisa len Tata Do Yebáha. Betuelaba udoe unnebie len benneha.

<sup>13</sup> Tti chi ugwani dilaha nna uxie ka benne rudhetinieha. Nianna bekwebie tsi'inu (12) ka benneha. Ka benneha nuha utixxe láke apóstol.

<sup>14</sup> Bekwebie

Simón benne utixxagabe lábie Pedro lhe

Andrés betsi Simón-ni lhe

Jacobo-ni lhe.

Anágaba bekwegabe Juan-ni lhe

Felipe-ni lhe

Bartolomé-ni lhe

<sup>15</sup> Bekwegabe Mateo-ni lhe

Tomás-ni lhe

Jacobo xi'ini Alfeo-ni lhe.

Anágaba bekwegabe Simón benne rákana Zelote  
lhe

<sup>16</sup> Judas betsi Jacobo-ni lhe.

Bekwegaba Jesús-ni Judas Iscariote nu betto'one lasi ná ka nu bettikaneha.

*Jesús-ni reyonie ka benne lhe rigixxi'abie gasina ankake lhe*

*(Mt. 4:23-25; 5:1-12)*

<sup>17</sup> Tti beyadi Jesús-ni len ka apóstol geeha iki i'yaha, nianna tti betelede ttu latsi re niha. Niha chi tupa adíru ka benne rudhetinieha lhe ixé juisiru ka benne lhe, ka benne daba itúba ka daka Judea lhe ka benne daba lhe'esi Jerusalén-ni lhe ka benne daba itúba ka daka ro'o indatoo ge Tiro lhe Sidón lhe. Bisia ka benneha kini udo nagake ge Jesús-ni lhe anágaba ki eyonie ka isagwe ridakakeha lhe. <sup>18</sup> Ka benne ruyúke elha disa de yu'u ka espíritu satsa latike, ka benneha gwa reyakabake. <sup>19</sup> Aníha uka nna iyá xeaba ka benne raka leke sattanke lati Jesús-ni, kumu de ra tsitsi lebie nna gwa ridaabe reyonie iyábake.

<sup>20</sup> Jesús-ni belannie lo ka benne rudhetinieha, nianna unnebie ree ke:

—Karubárule, lebi'i ka benne abí gele tee, kumu lebi'i nuná akale ka benne innabia Tata Do Yebáha.

<sup>21</sup> 'Karubárule, lebi'i ata se'ele rituinle nnanna, kumu isia sá gobale nna eyielabinle.

'Karubárule, lebi'i ka nu ribesile nnanna, kumu isia sá nna gwedeakabinle.

<sup>22</sup> 'Neti benne daya yebáha, karubárule ganna ttixka delo ni'a kia nna utía di lekani le lhe urio lákana le lhe. Karubárule ganna ttixka ulisa xxattakana le lhe anágaba nna ganna ku'u ni'akani le innákana deki satsaba ruinle.

<sup>23</sup> Gwalodú itta lele la sáha lhe egitta ebaa lele lhe, kumu lebi'i xxeniba anka nu dhile yebáha. Kumu ka nu rudhaka disakana le nnanna, anágaba bedhaka disa ka benneola gekaniha ka profeta ge Tata Do Yebáha itú ttuha.

<sup>24</sup> 'Ttaka lebi'i ka nu tee gele, ;gwalíchi lele kumu sunruba yiesi lo yu-ni se'ele xen su lasi de tee nu riyasinle!

<sup>25</sup> 'iGwalíchi lele, lebi'i ata yiela súbinle nnanna, kumu isia sá gattibale ubina!

'iGwalíchi lele ata ruxisile nnanna, kumu isia sá nna kwesibale de eleninle!

<sup>26</sup> 'iGwalíchi lele, lebi'i ttixka iyába ka benne rinne tseke gele! Kumu ttigaba ruinke rinne tseke gele nnanna, anágaba ben ka benneola gekeha len ka profeta gwen lasi ugweki itú ttuha.

*Jesús-ni rabie: "Akinle ge ka benne abittu raka uyúke le"*

*(Mt. 5:38-48; 7:12)*

<sup>27</sup> 'Ttaka lebi'i ka nu riyieninle rinnea, neti ria le: Akinle ge ka nu abittu raka uyúkana le. Latsiru gwaluin len ka nu ritisikinna le.

<sup>28</sup> Gwalinnaba len Tata Do Yebába kini aka lenie ka nu rige kana ikile, lhe gwalinnabagaba lenie ge ka nu rudhaka gwekana le lhe. <sup>29</sup> Ganna si nuxa kweana gi xxagalu, bodekigaba attu lha'a xxagalu kini kweana gi. Ganna si nuxa kuana jabana gelu-na, begwegaba na mixa gelu-na.

<sup>30</sup> Ganna si nuxa innabana lu ttu bixa, begwe na nu rinnabanaha o si ganna nuxa udaxxuna nu anka gelu, abittu ennabalu nuha. <sup>31</sup> Ttiba raka lele uin ka benne len lebi'i, aníha-gaba uinle lenke.

32 'Kumu ganna suna ka nu rakakinna gele-naruba gwa rakinle gekani, la'ania nna, ¿bíruala nu tse ruinle ganna? Ki ka nu runi tulha-na, gwa rakagabakinna ge ka nu rakakinna gekani. 33 Lhe anágaba ganna suna len ka nu gwa raka uyúkana le, ganna suna len ka nunáruba gwa ruin tsele, la'ania nna, ¿bíruala nu tse ruinle ganna? Ki ka nu runi tulha-na anágaba ruin ka nuná. 34 Ganna si rute gannale len ka benne rakinle deki goteke gele, la'ania nna, ¿bíruala nu tse ruinle ganna? Ki ka nu runi tulha-na gwa ribeagaba ge luesi ka nuná, kumu ribedagabakana edíkana nu betekanaha. 35 Ttaka lebi'i, akinle ge ka nu abittu raka uyúkana le lhe uinle latsiru lenkana lhe. Anágaba nna ute gannale ge ka benne nna bittu tse'ele kwedale deki gwedíle ge nu beteleha. Ganna aníha uinle, la'ania nna xxeniba anka nu tse ralhale dhile, lhe anágaba nna akale xi'in Tata Do Yebaa benne ra xxeni leeha. Kumu benneha anke benne tse len ka nu abittu rugwekane ixkixaru lhe anke benne tse len ka nu runi satsa lhe. 36 Lebi'i nna satua lele ka benne; uinle attigaba ruin Tata geri'iha, ratua lebie ri'i.

*Jesús-ni rabie: "Abittu innele ge ka benne"*  
(Mt. 7:1-5)

37 'Bittu innele ge ka benne innále: "¿Beaka anála ruinle?" kini Tata Do Yebáha nna abittugaba udhake le aníha. Abittu urixxi ukinnile ka benne; aníha nna kini abittugaba urixxi ukinni Tata Do Yebáha le. Gwalidhí elha xen lasi ge ka benne; aníha-gaba Tata Do Yebáha gwadígabe elha xen lasi gele. 38 Gwalute nu

tee gele len ka benne; aníha-gaba Tata Do Yebáha gutegabe nu tee gebie len lebi'i. Tseba orixxibiabie otebie gele, odisá tíe lhe ukí giripie lhe'e beduti gele, lhe anágaba odo bíe tti otebie gele kumu attigaba urixxibiale utele; aníha-gaba orixxibiabie otebie gele.

<sup>39</sup> Jesús-ni nna utixxi'anie ka benne ttu tisa. Aníha benie kini utte dáke bixa diani nu raka lebie kixxi'anie keha. Nianna tti ree:

—Ttiba anka ttu benne xua loe, ¿si gwak-aba gebie nnerue arlo attu benne xua loe? ¿Laaba ganna ixpabake iginnike lhe'e ttu yieru?

<sup>40</sup> Nigaba ka nu rudhetiha labí rakarula gekani tti benne rule'enie kanaha. Axtaliba ganna chi uluxakinna bedhetikana, la'anialiba nna chi isinkana aka gekani tti raka ge benneha.

<sup>41</sup> ¿Beaka ridolu rulannilu biste yu'u lhe'e iyya lo betsi to geri'iha, delo nna a ridoxalu ugíalu yaga yu'u lhe'e iyya lolu-na? <sup>42</sup> ¿Galasina tee ro'olu galu betsi to geri'iha: “Betsi to, begwelhaxa kweaya biste yu'u lhe'e iyya lolu-na”? Ki lu a rulannixalu tsapaba anka yaga yu'u lhe'e iyya lolu. ¡Aaluxa nu rigí xú loni! Lade'axa ulea yaga yu'u lhe'e iyya lolu-na kini anáchu nna ilá tsenlu ki kwealu biste yu'u lhe'e iyya lo betsi to geri'iha.

*Jesús-ni rabie: “Ukare'aba elha ruin ge ka benne ulannile, la'ania nna chiba yule gasina ankake”*

*(Mt. 7:15-20)*

<sup>43</sup> 'Ttu yaga ganna abittu anka tse-na, labí di ute nuha nu xixxi tse; nigaba yaga anka tseha, labí di ute nuha nu xixxi abittu anka tse. <sup>44</sup> Kumu kua ttu ttu ka yaga-na ankabienri'i

kana gasina anka nu xixxi ribia lokani. Kumu labí dika echidari'i higu lo ka ya yietsi-na; nigaba elhidari'i uva lo ka ya titsa. <sup>45</sup> Benne re tse leeha, nu tse re lhe'e lastoeha-ba rinnebie nna nu re satsa leniha nna nu satsa re lhe'e lastoniha-gaba rinnena. Kumu ri'i nu re lhe'e lastobari'i, nuha-ba rinneri'i.

*Jesús-ni rigixxi'abie bí gwate chupa ka benne rudo yo'oha*

*(Mt. 7:24-27)*

<sup>46</sup> ¿Beaka rale neti “Tata Xisi to” nna abígaba ruinle nu xpeya le? <sup>47</sup> Neti kixxi'arugania le gasina anka ttu benne dabie len neti nna riyieninie ka tisa kia-ni, nianna rudoe tisa ge nu xpeye. <sup>48</sup> Benneha anke ttiba nubiyú bedona yo'o geniha iki ttu íyya. Uche'enna lhi'u, nianna bekuana íyya abi'iba xan nuha kini udo tsitsina. Tti ubixxi inda ro'o yoo tee niha, nianna gwatsu'una idí kwe'e yo'oha, nna niru latti a udaa indaha uttána nuha kumu tsitsiba do nuha iki íyyaha. <sup>49</sup> Ttaka benne riyieninie ka tisa rinnea-ni nna ganna abíba rudoe tisa, benneha anke ttiba nubiyú bedona yo'o geniha nna labí uche'enna ki ukuaana íyya abi'iba xan nuha nna lo liaba bedona nuha. Ttaka tti bisá yoo tee niha inda nna gwatsu'una idí kwe'e yo'oha nna ubixxi tteba nuha. Tuttíruba betse'e loo indaha yo'oha.

## 7

*Jesús-ni beyonie ttu nu riben lo sina ge ttu ka soldadu ge Roma-ni*

*(Mt. 8:5-13)*

<sup>1</sup> Iki de chi uluxani Jesús-ni utixxi'anie ka benne se'e gwedo nagaha, nianna deyye lhe'esi Capernaum. <sup>2</sup> Lhe'esiha do ttu soldadu nu baninna ttu gayua (100) ka soldadu ge Roma-ni. Nubiyúha do ttu nu kwiti riben lo sina geni. Yalhá raka xxattinna ge nuha. Ttaka nu kwitiha ranibana, chi tteba duna gattina. <sup>3</sup> Soldadu nu baninna adí ka soldaduha, tti binana ge Jesús-ni, nianna udhelha ttebana ttu chupa ka benneola ge ka nu Israel-ni, rana kana:

—Gwaltsia gwaligasi Jesús-ni kini ite eyonie nu kwiti riben sina kia-ni.

<sup>4</sup> Ka nuha nna tti bisinkana ata du Jesús-ni nna unnaba ditibakana loe, rákane:

—Benne rinnabie ka soldaduha gaxa gwa ralhaba benneha ute nálu lenbie, <sup>5</sup> kumu labie rakanie ge iyába ka benne geri'i lhe lagabe bedoe yo'o ata rudhetiri'i ka tisa ge Tata Do Yebáha.

<sup>6</sup> Nianna dia tteba Jesús-ni lenkana. Ttaka tti chi isinke gaxxaba ata do yo'o geniha, nianna chi udhelhana ttu chupa ka nubiyú se'e tse lennaha, kini tsiakana gákane:

—Aní ra soldadu nu bananie adí ka soldaduha: Uxí elha xen lasi xa tata xisi to, neti labí elha ralhaa ga'a kwinalu lhe'e lisia-ni. <sup>7</sup> Kumu de nuha nna labí beyaxati ita kwinaga neti lenlu. Náliba dulu unne nna gweyakaba nu kwiti riben lo sina kia-ni. <sup>8</sup> Kumu neti anagabaa nu rudoa tisa ge ka nu ra xxeniru lekani tti neti. Anágaba nna rinnabiagabaa adíru ka soldadu. Laxkala tti upeya ttu ka nuha: “Ugía niha”, nuha gwa riabana nna tti rodopeya attu ka nuha: “Utá nii”, nuha nna gwa ritabana, nna tti upeya benne



riben lo sina kiahá: “Ben nu tee nii.” Benneha nna gwa ruinbe nu xpeyeha.

<sup>9</sup> Tti biyienin Jesús-ni nu ra nubiyúha nna bebanabanie geni. Nianna tti bodeki loe ree ka benne danalhake bieha:

—Netiru ria, delo iyá ka benne Israel-ni, niru ttúke labí chi gwaxxakaa ria tsitsi leke tti ria le nubiyú-ni.

<sup>10</sup> Ka nu udhelhana ki beti'akana Jesús-ni, tti besin ka nuha lhe'e yo'oha, nna chi gwaxxakakana nu kwiti raniha, chiba beyakana.

*Jesús-ni benie kini beyaka ben xi'in biyú benne nuila bidabiha*

<sup>11</sup> Iki de nuha nna dia Jesús-ni lhe'e yiesi nu tee lání Naín. Diabie len ka benne rudhetinieha lhe anágaba diagaba ixe juisiru ka benne lhe.

<sup>12</sup> Tti chi bisine gaxxa ro'esiha, nianna tti bilánie chekana ttu benne yatti, diakana takatsikane. Ttúru nu kwitiha xi'in benne nuila anka bidabiha. Ixeba ka benne lhe'esiha diake len benne nuilaha, danalhake benne yattiha. <sup>13</sup> Tti bilani Jesús-ni benne nuilaha, nianna gwatua lebie benneha nna ree bie:

—Bittu kwesilu.

<sup>14</sup> Nianna tti ubige utane ro'o i'ina ge nu kwitiha nna ka benne nujake benneha nna uleda ttebake. Nianna tti unnebie ree:

—Nu kwiti, lu rulisaa, beyadha.

<sup>15</sup> Benne yattiha nna beyadha ttebe bedoe nna udulo ttebe rinnebie. Nianna tti bote Jesús-ni benneha len nan geeha. <sup>16</sup> Iyába ka benne se'e niha usibakanie nna ráke:

—¡Gáruba ttipa xxeni ra le Tata Do Yebáha! Lagwi gebari'i chi ulea lo ttu profeta ra xxeni

leni. Tata Do Yebáha chi bisiabie kini aka lenie ka benne gebie.

<sup>17</sup> Lhe'e iyába ka yiesi se'e daka Judea-ni lhe lhe'e adíru ka yiesi se'e abi'iba ka daka niha ugwadhi tisa ge nu ben Jesús-ni.

*Juan benne rugadi indaha udhelhe ka benne kini ugíake gwannaba tisake Jesús-ni (Mt. 11:2-19)*

<sup>18</sup> Ka benne rudhetini Juan-ni gwattixxi'akanie bie ge iyá nu chi ben Jesús-ni. Nianna tti uxi Juan-ni chupa ka benneha <sup>19</sup> nna udhelhe ka benneha ata du Jesús-ni kini tannaba tisake benneha ganna si labie nuha benne chi ga'anna idhelha Tata Do Yebáha o teeki kwedake isia attu benne subi. <sup>20</sup> Tti bisin ka benne udhelha Juan-ni ata du Jesús-ni, nianna unnaba tisake, ráke bie:

—Juan benne rugadie indaha, udhelhe ri'itu len kwinalu kini innaba tisatu lu ganna si lu nuná ankalu benne chi ga'anna idhelha Tata Do Yebáha o teeki kwedatu attu benne.

<sup>21</sup> Tti lo se'e ka benneha niha, nna beyoin Jesús-ni ixeru ka benne ge bixaba isagwe rateke lhe beyoingabe ka benne yu'u latike ka espíritu satsa lhe anágaba ixegaba ka benne a raka ilákanie bedhalie loke. <sup>22</sup> Nianna tti bekabie ree ka benneha:

—Gwaleyya nna gwalikixxi'en Juan-ni nu chi biyieninle lhe nu chi bilenle runia lhe. Gwaligá na: “Ka nu xua lokaniha, chiba relákinna lhe ka nu ridá natsaha, chiba redá tsekana nna ka nu raka latikani yiesu lepra, chigaba reyakakana lhe anágaba ka nu anka kwechuha, chigaba reyienkinna nna ka nu chi uttiha nna gwa reyaka

bengabakana. Anágaba ka benne dii abittu geke tee, chigaba riyienkanie ka tisa ge Tata Do Yebáha.” <sup>23</sup> Gwaligágaba na: “Karubáru benne abittu rudú chupana lebie de rilánie nu runia.”

<sup>24</sup> Atti beyeki ka benne udhelha Juan-ni deyyake, nianna tti udulo Jesús-ni utixxi'e ge Juan-ni, ree ka benne ixé tupa niha:

—¿Bí biriale gwalannile lo yu bisi ata lanú benne se'e? ¿Si ugíale gwalannile ttu yettixtila ruttá beha ak? <sup>25</sup> Ganna abíba nna, ¿núla nuha gwagíale ganna? ¿Si ttu nubiyú nukuna xo raka lhalha loni? Ko'o. Neti ria, ka nu rukukana ka xo tse raka lhalha loin-na lhe redí baakana nu tse tee gekani, ka nuná lhe'e ka yo'o ge ka nu rinnabia xeni-naliba ralha ka nuná tse'ekana.

<sup>26</sup> Ganna abíba nna, ¿núla gwagíale ganna? ¿Si ttu profeta ge Tata Do Yebáha ak? Gwalí galá, neti ria, lebi'i biriale gwagíale ttu benne xxenirula ra lebie tti ttu benne anke profeta.

<sup>27</sup> Ge Juan-ni nuha rinne Tata Do Yebáha lo ka yetsi geeha tti rulise Xi'inieha, ree:

Neti idhelhaa ttu benne tsie nnerue lolu kini kixxi'e ka tisa kia-ni.

Benneha idhalie neda gelu.

<sup>28</sup> Netiru ria, delo iyá ka benne chi uli yiesi lo yu-ni, lanú ttu benne do ra xxeniru lebie tti Juan-ni. Ttaka delo iyá ka benne rinnabia Tata Do Yebáha ke, benne ra gwexxaru leeha, xxenirula ra lebie tti Juan-ni.

<sup>29</sup> Iyába ka benne lhe iyágaba ka gwexxaxaha lhe, tti biyienkanie nu ra Jesús-ni, nianna tti bokinni ikike deki tseba anka nu rinnaba Tata Do Yebáha uinke. De nuha nna chi uxiehlake begadi Juan-ni ke inda. <sup>30</sup> Ttaka ka fariseo-ni

lhe ka nu rule'ekinna ka benne nu ra lo bia bennabi bodha'an Tata Do Yebáha len Moisés-ni, labí uxielhakana ugadi Juan-ni kana inda. Tti benkana aníha, nuha bele'e deki ulu'u ni'akani nu raka le Tata Do Yebáha unie lenkana.

<sup>31</sup> Nianna redená Jesús-ni:

—¿Nú utsania ka benne se'e nnanna ganna? ¿Nú anka tti ankake? <sup>32</sup> Ankabake ttiba ka nuto-na rise'ekana rittakana ata raka i'iya ribesi'en luesikani, ra luesikani: “Ri'itu gwa bekwesibatu ka iyyaxtila getu-ni, ttaka lebi'i nna abígaba beya'ale, lhe anágaba gwa bilhagabatu le'a ge benne yatti, lebi'i nna abígaba ure-sile.” <sup>33</sup> Kumu bisia Juan benne rugadie indaha, benneha labí utoe yettaxtila, nigaba labí u'uye vinu. Lebi'i nna rálale: “Ttu espíritu ge nu xxegwiha-ba yu'u lati nuná.” <sup>34</sup> Nnanna nna neti benne daya yebáha, bisiaya nna roa lhe ri'iyaa lhe; lebi'i nna redenálale: “Nu du-ni nna ankana ttu nu ro xxatta lhe ttu nu ri'a lhe. Anágaba nna rutságabana ka gwexixa-na lhe ka nu ruin tulha-na lhe.” <sup>35</sup> Ttaka atti rilenri'i elha ruin ge ka xi'in Tata Do Yebáha, la'ania nna rite denri'i deki elha rieni rapa Tata Do Yebáha nuha rapa ka benneha.

### *Jesús-ni ugíabie go yetta lisi ttu fariseo*

<sup>36</sup> Ttu ka fariseo-ni uxina Jesús-ni lisiniha ki goe yetta lenna. Labie nna gwa ugíabe nna tti uta'abie lhe'e yo'o geniha, nna udoe ro'o mexaha. <sup>37</sup> Ttu nuila do lhe'esiha daa tisa geni deki ruinna satsa. Tti bina nuilaha deki do Jesús-ni lhe'e lisi fariseo-ni, nianna diana nna denna ttu re'e to ankana ge íyya ragalha. Íyya ragalhaha tee lání

alabastro. Saa tíba re'e toha seti nu rure ixixxi.  
<sup>38</sup> Tti bisinna ata do Jesús-ni, nianna biyachu ttebana urena kwe'ebie nna udulona ribesina, nna len inda gwina geniha-ba bodibidhana ka ni'eha, nianna tti bodibisina ka nuha len itsa ikiniha. Betságaba loni ka ni'eha lhe utabina ka nuha seti dennaha lhe. <sup>39</sup> Fariseo nu uxina Jesús-ni lisiniha, tti bilenna nu ruin nuilaha, nianna belaba lhi'u leni rakinna: “Ganna ttixka gwalígin nubiyú re nii deki ankana profeta ge Tata Do Yebáha, la'ania nna gwa ute dálinna nú nuila nuní rigánna latini, ki nuila ruin satsaba nuní.” <sup>40</sup> Jesús-ni nna bekabie ge fariseo-ni ree na:

—Simón, upeya lu ttu nu upeya lu.

Simón-ni nna bekabina gebie, rana:

—Unába xa maestru.

<sup>41</sup> Nianna ree na:

—Ttu lidú use'e chupa ka benne dáke belhiu ge ttu nu ribea belhiu. Ttu benneha daabie gayu gayua (500) denario, attue nna daabie tsieyona (50). <sup>42</sup> Ttaka kumu abí galá ridaake kixake belhuha, aníha uka nna gwa uxíbana elha xen lasi ge ixpaba ka benneha; labí bekixana ke belhuha. Nnanna nna lu, unáchu, ¿nú ka benneha akarukanie ge nu uxína elha xen lasi gekeha?

<sup>43</sup> Simón-ni nna bekabina, rane:

—Neti rakati benne daabie ixenru belhuha, benneha nuha uxíruna elha xen lasi gebie.

Jesús-ni nna ree na:

—Gwalí galenlu.

<sup>44</sup> Nianna tti bodeki loe belannie nuilaha nna tti ree Simón-ni:

—¿Si gwa rilenlu nuila re nii? Neti tti uta'aya lhe'e lisilu-ni, labí betelu inda kini ití ka ni'aya-ni. Yúruqa nuila-ni, chi utína ka nuní len inda gwina geni lhe chi bodibisina kana len itsa ikini lhe. <sup>45</sup> Anágaba nna abígaba utolu xxagaa atti bisiayaha. A beriarugalu nuila-ni, ttili bisiayaha, birula chi bedú siina rutsá loni ka ni'aya-ni. <sup>46</sup> Lu nigaba a utabilu seti ikia. Yúruqa nuila-ni, chi utabina ttu nu rure ixixxi ka ni'aya-ni. <sup>47</sup> De nuha nna ria lu, raka xxattinna kia kumu de chi bixú elha xen lasi ge ixé ka tulha chi benna. Kumu ganna ttu benne lattiruba elha xen lasi rixú gebie, la'ania nna lattirugaba raka si'in benneha attu benne.

<sup>48</sup> Nianna tti ree nuilaha:

—Chiba bixú elha xen lasi ge ka tulha gelu-na.

<sup>49</sup> Atti biyienin adíru ka benne se'eke lenbie ro'o mexaha nu rabie nuilaha, nianna uduloke rinnaba tisa luesike, ráke:

—¿Nú anka nuní nna ge iyába ka tulha-na ridína elha xen lasi?

<sup>50</sup> Ttaka lee nna unnerulee, ree nuilaha:

—De ugía lelu kia nna chiba bodilaa Tata Do Yebáha lu. De nuha nna xen su lasi beyya.

## 8

### *Ka benne nuila danalhake Jesús-ni*

<sup>1</sup> Iki de nuha nna ugwekiru Jesús-ni len iyába ka benne tsi'inu (12) rudhetinieha lhe'e iyába ka yiesi se'e niha. Rigixxi'e ka tisa tse, delába rigixxi'e gasina ki akake ka benne innabia Tata Do Yebáha ke. <sup>2</sup> Danalhagaba attu chupa ka benne nuila, ka benne beria ka espíritu satsa

latike lhe beyakake ge ka isagwe ridakakeha lhe, delába danalha María benne tegaba lábíe Magdalena. Benneha beria gasi (7) ka espíritu satsa latie; <sup>3</sup> lhe danalhagaba Juana nuila ge Chuza, Chuza nu baninna iyá nu tee ge Herodes-ni. Anágaba danalhagaba Susana-ni lhe adíru ka benne nuila lhe. Nu teeba geke rudaxxuke kini rute náke len Jesús-ni itupa lenie ka benne rudhetinieha.

*Jesús-ni rigixxi'abie ge ttu benne diabie gwedelha xuxtila*

*(Mt. 13:1-15, 18-23; Mr. 4:1-20)*

<sup>4</sup> Ixe juisiru ka benne ririake lhe'e ka yiesi gekeha nna diake ata du Jesús-ni. Tti chi tupa ixé juisiruke, nianna utixxi'anie ke ttu tisa. Aníha benie kini utte dáke bí diani nu raka lebie kixxi'anie keha. Nianna tti ree:

<sup>5</sup> —Ttu benne ruin sina birie die gwedelha xuxtila. Tti dabie rudelhe benneha nna ttu chupa ka xua toha utsake ro'o nedaha. Tti ute ka benne lo nedaha nna beleabake iki benneha, nianna tti biginni ka binniha nna bedigabakana benneha.

<sup>6</sup> Attu chupake nna utsake lo íyya atta'aha; ttaka atti be'eyu ka benneha nna ubisi ttebake kumu de labí lupa tee lo íyyaha. <sup>7</sup> Adí ka benneha nna utsake lhe'e yietsiha. Ttaka tti be'eyu ka benneha nna biyelhagaba ka yietsiha nna belhiubakinna xua toha. <sup>8</sup> Ttaka adí ka benne ubinni ata do yu tseha. Ka benneha nna gwa be'eyubake nna yalhá lhe'e lena beteke. Ttu ttu gayua (100) tteba xua bekudhi iki ttu ttu ka xuaha.

Nuha-ba ra Jesús-ni nna tti unnebie idisa, ree ka benne se'e niha:

—¡Ata sia nagale, gwaludo nagale ganna gwankale nu dika iyienini!

<sup>9</sup> Ka benne rudhetinieha nna unnaba tisake bie, ráke:

—¿Bíla diani nu unnelu-ni?

<sup>10</sup> Jesús-ni nna bekabie geke, ree:

—Lebi'iligaba nna gwagixxi'abin Tata Do Yebáha le nu labí chi yu adí ka benne, delába gwa ruinbe kini tte denle gasina innabie. Ttaka len adíru ka benne nna bixxi kwe'eba rinnea, kini meskiba bika rulannike nna labí ilákanie lhe meskiba bika riyienkanie nna labí tte dákanie.

<sup>11</sup> 'Aní diani ka tisa-ni innákana, delába xuxtilaha nuha anke ka tisa ge Tata Do Yebáha.

<sup>12</sup> Ka xua utsa ro'o nedaha nna ankake ka benne riyienkanie ka tisa ge Tata Do Yebáha, ttaka daa tteba nu xxegwiha nna rebea ttebana ka tisaha lhe'e lastoke. Aníha ruinna kini abittu tsia leke lhe kini abittu odilá Tata Do Yebáha ke lhe. <sup>13</sup> Ka xua utsa lo íyya atta'aha nna ankake ka benne ittaba du leke, riyienkanie ka tisaha nna ria leke ka benneha. Ttaka kumu de abí galá chi begwe lhu ka tisaha lhe'e lastoke, laxkala gwa riaba leke ttu satti, ttaka tti risia rateke ttu bixa, la'ania nna reyadi gaa ttebake. <sup>14</sup> Ka xua utsa lhe'e yietsiha nna ankake ka benne riyienkanie ka tisaha. Ttaka tti tee ka elhaxchacha iki geke lhe tti rudona leke gatta geke, anágaba lhe tti rite leke uinke nu raka yiesi lo yu-ni, la'ania nna iyá nuha runi kini bittu se'e tsitsike lo neda ge Tata Do Yebáha. <sup>15</sup> Ttaka ka xua ubinni ata do taga'a yuha nna ankake ka benne riyienkanie ka tisaha nna itú iki itú leke rudaxxuke ka tisaha.



Anágaba nna labí rudú siike ruinke nu ra ka benneha.

*Jesús-ni rabie: “Labí ttu bixa raka sigá abí una ka benne geni”*

*(Mr. 4:21-25)*

<sup>16</sup> 'Lanú ttu benne do rugalhe iki ttu gi nu rudani, delo nna uttudhie ttu bixa ikini kini abittu ilá o lhe ukatsie na xan ata ratteha. ¿Laaba ganna teeki udoe nuha gwetsá kini udenna ge ka benne ga'a lhe'e yo'oha? <sup>17</sup> Nigaba labí ttu bixa tee gatsi nna abí eselana; nigaba ttu bixa raka sigá nna abí una ka benne geni lhe abittu iriana la loo lhe. <sup>18</sup> Laxkala gwaludo tsitsi nagale gasina rite denle nu rinnea-ni, kumu ganna ttu benne gwa rite dábanie ka tisa kia-ni, la'ania nna gwate da chiettirulin benneha. Ttaka ganna ttu benne abíba rite danie, la'ania nna iyála nu rakanie deki chi rite danieha, etua.

*Nan ge Jesús-ni lhe ka betsieha lhe raka leke inne lenke bie*

*(Mt. 12:46-50; Mr. 3:31-35)*

<sup>19</sup> Nan ge Jesús-ni lhe ka betsieha lhe diake ata dueha, ttaka labí uka ibigake arloe, kumu de tupa xxatta ka benne. <sup>20</sup> Ttaka ttu benne du niha nna utixxi'anie bie, ree:

—Ne nan geluha lhe ka betsiluha lhe se'eke ro'o yo'o-ni raka leke inne lenke lu.

<sup>21</sup> Labie nna bekafilee ree:

—Ka benne gwa riyienkanie ka tisa ge Tata Do Yebáha nna rudoke tisa gebie, ka benne-na nuná ankake nan kia lhe ka betsia lhe.

*Jesús-ni benie kini bebe sii lo indatooha*

(Mt. 8:23-27; Mr. 4:35-41)

<sup>22</sup> Ttu sá uta'a Jesús-ni lenie ka benne rudhetinieha lhe'e ttu barcu. Nianna ree ka benneha:

—Tteri'i lo indatoo-ni kini iriari'i daka ro'oni nu reha.

Nianna tti uta'ake diake. <sup>23</sup> Laka yu'uke neda lo indaha nna uta'adhi Jesús-ni nna ttiruba bisia ttu be idí lo indaha nna chi risá lhe'e barcuha inda nna chi ruxunnina geke xxudike lhi'u. <sup>24</sup> Nianna gwadiben ttebake Jesús-ni, ráke bie:

—¡Bebaniruga xa tata! ¡Karubá tsapiri'i inda-ni nna gattiri'!

Jesús-ni nna ugwadha ttebe nna bedhaka dise beha lhe bedhaka dise nu ridú lii lo indaha lhe. Nianna siiba beyaka lo indatooha. <sup>25</sup> Nianna tti ree ka benne rudhetinieha:

—¿Gála gwa dule nu chi ria lele ge Tata Do Yebáha?

Ttaka lake nna itú rasibakanie lhe rugía ya'abake nna rinnaba tisa luesike, ráke:

—¿Nú anka benne du nii nna axtaba be-na lhe axtaba inda-na rulise nna gwa rudobakana tisa gebie?

*Jesús-ni bebebie ka espíritu xxegwi yu'u lati ttu nubiyú*

(Mt. 8:28-34; Mr. 5:1-20)

<sup>26</sup> Tti biriake ro'o indaha nna bisinke lo yu ge ka benne Gadara. Gadara rena arlo Galilea-ni daka ro'o indaha nu reha. <sup>27</sup> Tti ugwadi Jesús-ni lo barcuha, nianna betetsá ttu nubiyú ge lhe'esiha bie, yu'u ka espíritu xxegwi latini. Chi usá labíru ruku xoni lhe labíru dona lhe'e yo'o

lhe. Saná lo ka baa ge ka benne yattiha, niha-ba reya'anna. <sup>28</sup> Atti bilen nubiyúha Jesús-ni, nianna uresi'ana idisa nna tti bedú xibini arloe nna unnena itú leni, rane:

—¡Jesús Xi'in Tata Do Yebaa benne ra xxeni leeha, bittu etega'a gelu len neti! ¡Rinnabaa lenlu bittu ugwelu neti elha disa!

<sup>29</sup> Aníha ra nubiyúha kumu Jesús-ni chi rudhaka dise espíritu satsa yu'u latiniha kini eriana. Kumu ixé lidú resia nuha lati nubiyúha, laxkala meskiba bika ruxxikakana na len cadena lhe len ka iyya lhe, ttaka lana nna richúbana ka nuha, nianna tti ribea nu xzegwiha na lo yu bisi ata lanú benne se'e. <sup>30</sup> Jesús-ni nna unnaba tise, ree na:

—¿Bí lálu?

Lana nna bekabina, rane:

—Legión-ba lá neti.

Aníha tee lání kumu ixé ka espíritu xzegwi chi uta'a latini. <sup>31</sup> Ka nu xzegwiha nna rinnabakana len Jesús-ni ki abittu udelhe kana lhe'e belha'a chulha ata se'e adíru ka espíritu xzegwiha. <sup>32</sup> Lati ttu i'iyá do niha yu'u ixeru ka kuchi rekikana ugila go. Laxkala ka espíritu xzegwiha nna unnabakana lenie ki ugwelhe kana sata'akana lati ka kuchiha. Lee nna “O” ba ree, begwelhabe beta'akana lati ka nuha. <sup>33</sup> Ka espíritu xzegwiha nna beriabakana lati nubiyúha nna gwata'akana lati ka kuchiha. Ttaka ka kuchiha nna biria resu tteba ka nuha ugwadikana nna biriakana ro'o ttu íyya daa niha nna ubinnikana lhe'e indaha. Nianna ugwapikana indaha nna uttibakana.

<sup>34</sup> Ka benne ruyúke ka kuchiha, tti bilákanie nu chi ukaha, nianna boxunni ttebake deyyake gwattixxi'ake nuha lhe'esiha lhe gwattixxi'akanie ka benne se'e lhe'exxi itúba ka niha. <sup>35</sup> Nianna biria tteba ka benne gwalannike nu chi ukaha. Tti bisinke ata du Jesús-ni nna gwaxxakake nubiyú nu chi beria ka espíritu xxegwiha latini, dona arloe. Chi beyoku xoni lhe chi beriana ikini lhe. Nianna usilakanie. <sup>36</sup> Ka benne bilákanie nu ukaha nna utixxi'akanie ka benne gasina uka kini beyaka tse nubiyú uyu'u ka espíritu xxegwiha latini. <sup>37</sup> Nianna iyába ka benne se'e itúba daka lo yu ge Gadara, de rasi xxattakanie, de nuha nna unnabake len Jesús-ni kini eriabie lo yu gekeha nna eyye attu ta subi. Aníha uka nna beta'a Jesús-ni lhe'e barcuha nna deyye. <sup>38</sup> Nubiyú beria ka espíritu xxegwiha latini nna unnabana len Jesús-ni kini ugwelhe na tanalhane. Ttaka Jesús-ni nna bekabie geni, ree na:

<sup>39</sup> —Beyya lisilu nna utixxi'a iyá nu chi ben Tata Do Yebáha lenlu.

Nubiyúha nna itúba lhe'esiha deyyana rigixxi'ana nu chi ben Jesús-ni lenna.

*Jesús-ni beyonie ttu benne nuila lhe beyoingabe xi'iniunná Jairo-ni lhe*

*(Mt. 9:18-26; Mr. 5:21-43)*

<sup>40</sup> Tti beyeki Jesús-ni lo indatooha besine, ixe juisiru ka benne chi se'eke ubede. Nianna redeakabakanie tti bilákanie besine. <sup>41</sup> Nuha-ba raka nna tti bisin ttu nubiyú tee lání Jairo. Jairo-ni baninna yo'o ata ritupa ka nu Israel-ni

rudhetikana ka tisa ge Tata Do Yebáha. Nu-biyúha tti bisinna ata du Jesús-ni nna bedú xibini arloe nna unnabana lenie kini tsie lisiniha <sup>42</sup> kumu xi'iniunnániha chiba ratti nuha. Ttúru nuha xi'iniunnáni do nna chila ankin nuha ttiba ttu tsi'inu (12) ida.

Jesús-ni nna tti yu'e neda die, axtaba ruki ya'akane kumu ixé juisiru ka benne dia danal-hake bie. <sup>43</sup> Lhe'e ka benneha sela ttu benne nuila. Chiba uka ttu tsi'inu (12) ida ridobie reni nna iyába belhiu nu tee geeha chi betse'e looe de rekie lo ka nu ruin ramedí, ttaka ni ttú ka nuha a udaakana eyoinkane. <sup>44</sup> Benne nuilaha ubige daka kwe'e Jesús-ni nna gwattáne ro'o lari nuku benneha. Looraha tteba nna udú sii tteba reniha. <sup>45</sup> Nianna tti ra Jesús-ni:

—¿Núle nuní chi betettanle ro'o xoa-ni?

Ttaka iyábake ráke:

—Labí chi betettan ri'itu ro'o xolu.

Nianna ra Pedro-ni:

—Ka benne danalhaniba nuní ruki ya'ake lu xa tata.

<sup>46</sup> Ttaka Jesús-ni nna rabie:

—Nuxa nuní chi betettanna ro'o xoa-ni, kumu neti chi ute dati biria nu tsitsi ra lasia beyonia ttu benne.

<sup>47</sup> Tti bilani benne nuilaha abíba aka igatsi nu benieha, nianna itú rixidibe ubige bedú xibie arlo Jesús-ni. Utixxi'e lo iyába ka benne se'e niha bí lo ni'a ge betettane ro'o xo Jesús-ni lhe utixxi'agabe deki tti loora bedaxxue ro'o xo benneha nna beyaka ttebe. <sup>48</sup> Jesús-ni nna rabie benneha:

—Xi'ini to, de ugía lelu deki gwadaabaa eyonia lu, de nuha nna chiba beyakalu. Nnanna nna xen su lasiba beyya.

<sup>49</sup> Sa dula Jesús-ni rinnebie, ttiru chi bisin ttu nu udá lhe'e lisi Jairo-ni nna utixxi'enna na, rana na:

—Chi utti xi'iniunnáluha, laxkala bitturu uinlu doelha ichelu maestru-ni.

<sup>50</sup> Tti biyienin Jesús-ni nu ra nubiyúha, nianna tti unnebie ree Jairo-ni:

—Bittu gasinlu. Sun tteba tsia lelu nna gweyakaba xi'iniunnáluha.

<sup>51</sup> Tti uta'abie lhe'e yo'o ge Jairo-ni nna labí begwelhe ga'a nuxa lenie lhe'e yo'oha, sunruba Pedro-ni lhe Jacobo-ni lhe Juan-ni lhe ka tata nan ge nuila toha lhe. <sup>52</sup> Iyába ka benne se'e niha ribesike lhe relenkanie ge nuila toha. Ttaka Jesús-ni nna ree ke:

—Bittu kwesile. Laa uttiga bi'in-ni, te'adhiba bi'in-ni.

<sup>53</sup> Lakana nna bexisilakana gebie kumu yúbakana chiba utti nuila toha. <sup>54</sup> Nianna tti bedaxxue ná nuila toha nna tti unnebie idisa, ree:

—¡Nuila to, beyadha!

<sup>55</sup> Nuila toha nna beyaka ben ttebabi nna beyadha ttebabi. Jesús-ni nna rabie ka benne se'e niha ugoke bi yetta. <sup>56</sup> Ka tata nan ge nuila toha nna yalhá rebanakanie se'eke; ttaka Jesús-ni nna ree ke:

—Anuttu nu kixxi'enle ge nu chi uka-ni.

## 9

*Jesús-ni udhelhe ka benne rudhetinieha kini tsiake ugixxi'a gasina innabia Tata Do Yebáha ka benne*

*(Mt. 10:5-15; Mr. 6:7-13)*

<sup>1</sup> Jesús-ni bottupe ka benne tsi'inu (12) rudhetinieha nna begwebie ke lo neda kini ebeake iyába ka espíritu xzegwi yu'u lati ka benne lhe ki ebeake ka isagwe yu'u latike lhe. <sup>2</sup> Nianna udhelhe ke ki tsiake kixxi'ake gasina ki akake benne innabia Tata Do Yebáha ka benne lhe kini eyoinke ka benne rani lhe. <sup>3</sup> Nianna ree ke:

—Bittu ichele bixa ixuinle neda: bittu dhen garroti gele, nigaba uja chuba gele lhe nigaba uja nu gole o dhenle belhiu lhe. Bittugaba uja chupa kwe xole. <sup>4</sup> Gaxaba lhe'e yo'o isinle, niha-ba gwaltse'e, edálibale nna eriale niha. <sup>5</sup> Ganna lhe'e ttu yiesi abittu ulabikana le, gwaleria lhe'e yiesiha nna gwalukubi biste ni'ale kini nuha unna liina deki Tata Do Yebáha labí uyu'u lebie nu benkana.

<sup>6</sup> Ka benneha nna biriake diake nna riteke lhe'e iyába ka yiesi to se'e itúba ka niha. Rigixxi'akanie ka benne ka tisa tse lhe reyoinke ka benne rani lhe.

*Herodes-ni binana ge Jesús-ni*

*(Mt. 14:1-12; Mr. 6:14-29)*

<sup>7</sup> Herodes nu rinnabiaha, tti binana ge iyá nu ruin Jesús-ni, nigaba a yuna bixa ulaba leni, kumu adí ka benne ráke deki Juan-niba nuha chi beyaka benna lagwi ge ka benne chi uttiha. <sup>8</sup> Attu chupake nna redenáke: “Elías-niba nuná besia.” Adíke nna redenáke: “Ttu ka profeta

use'e itú nu reha-ba nuná chi beyaka bani.”

<sup>9</sup> Ttaka Herodes-ni nna rana:

—Ki kwinaba neti udhelhaa uchúkana iki Juan-ni, ¿núla ge nuná riyienti rinne xxattakana ganna?

De nuha nna Herodes-ni yalhá re leni ilenna Jesús-ni.

*Jesús-ni begobie gayu mili ka benne*

*(Mt. 14:13-21; Mr. 6:30-44; Jn. 6:1-14)*

<sup>10</sup> Tti beyeki ka apóstol udhelha Jesús-ni, ka benneha nna utixxi'akanie bie bipaxa benke ata ugiakeha. Nianna suna labake dechebie nna beru'unake daka lo yu bisi ge lhe'esi Betsaida-ni.

<sup>11</sup> Ttaka tti bina adíru ka benne deki rebie niha, nianna dia ttebake gwanalhake bie. Labie nna gwa belabibe ka benneha, nianna rigixxi'anie ke gasina ki akake benne innabia Tata Do Yebáha lhe anágaba nna reyonie ka benne rani lhe.

<sup>12</sup> Ttaka atti chi kwe ubisa-na loeyya-na, ubiga ka benne tsi'inu rudhetinieha (12) ata dueha nna ráke bie:

—Bedhelhala ka benne tupa nii kini eyyake lhe'e ka yiesi to-na lhe lhe'e ka yo'o lhe'exxi ka nu sia abi'iba ka nii kini eya'anke lhe ki kilake nu goke lhe. Kumu ata se'eri'i-ni yu bisiba nuní, labí bi tee nii.

<sup>13</sup> Lee nna rabie ke:

—Lebi'iba gwalugwe ka benne-ni nu goke.

Ka benneha nna ráke:

—Bi den ri'itu. Ne sunruba gayu ka yettaxtila nna chupa ka belha dentu. Laaruba ganna tsiabatu tayo'otu nu go iyá ka benne tupa nii.



<sup>14</sup> Kumu ttiba ttu gayu mili anka ka benne biyúha. Jesús-ni nna rabie ka benne rud-hetinieha:

—Tsieyona (50), tsieyona ka benne-na gwaluse'e ttu ttu dhi.

<sup>15</sup> Aníha-ba benke nna bese'eke iyá ka benneha. <sup>16</sup> Jesús-ni nna bedaxxue gayu ka yet-taxtilaha nna a chupa ka belhaha, nianna tti belhidha lobie yebáha nna begwebie ixkixaru len Tata Do Yebáha, nianna tti ulha'abie lhe'e ka benneha. Begwebie ka benne rudhetinieha kini kidhike ugweke ka benne tupa niha. <sup>17</sup> Iyába ka benneha utoke nna beyielalibakanie. Nianna bottuparulake a tsi'inu (12) sumi ka ro'o salha'a bexxaha.

*Pedro-ni rana Jesús-ni: “Lu ankalu Cristu”*

*(Mt. 16:13-28; Mr. 8:27-9:1)*

<sup>18</sup> Ttu sá ttúba Jesús-ni doe rilhapie tisa len Tata Do Yebáha. Niha-gaba se'e ka benne rud-hetinieha. Nianna tti unnaba tise ka benneha, rabie ke:

—¿Nú ra ka benne deki ankaa?

<sup>19</sup> Lake nna bekabike, ráke:

—Ttu chupa ka benne ráke deki lu ankalu Juan benne begadi indaha. Attu a chupake nna ráke deki lu ankalu Elías. Adíke nna redenáke: “Ttu ka profeta use'e itú nu reha-ba nuná, chi beyaka benna.”

<sup>20</sup> Jesús-ni nna rabie ke:

—Lebi'i nna, ¿núla rale deki ankaa?

Pedro-ni nna bekabina, rana:

—Lu ankalu Cristu benne udhelha Tata Do Yebáha.

<sup>21</sup> Ttaka Jesús-ni nna bedha'an tsitsie, ree ke:

—Anuttu nu kixxi'enle.

<sup>22</sup> Nianna tti ree ke:

—Neti benne daya yebáha, teeki tate xxattaa uyúá elha disa. Ka benneola geri'i-ni lhe ka nu loni ge ka bixxudiha, lhe anágaba ka nu rule'ekinna ka benne nu ra lo bia bennabi bodha'an Moisés-ni, ka nuha ku'uba ni'akani neti lhe uttibakana neti lhe. Ttaka ganna chi beyonna ubisiha nna eyaka benbaa.

<sup>23</sup> Nianna tti ree iyába ka benneha:

—Ganna nuxa ttúle raka lele etenalhale neti, teeki eria iki eria lele, meskila bixa satele nna udaxxu kurusi gele ttu ttu sá nna etenalhale neti. <sup>24</sup> Kumu ttu benne ganna abittuba raka lebie bixa satebie de etenalhe neti, benneha nnittilee, delába labí aka ben benneha arlo Tata Do Yebáha. Ttaka benne eria iki eria lebie etenalhe neti meskila bixa satebie de etenalhe neti, benneha gwalálee arlo Tata Do Yebáha.

<sup>25</sup> Kumu, ¿bí ixú nuha ganna ttixka nuxa ttu benne dhaabie uin gebie iyá nu se'e yiesi lo yu-ni, delo nna la labe nnittie arlo Tata Do Yebáha? <sup>26</sup> Kumu ganna ttu benne ettunie kia lhe ettunie ge ka tisa kia-ni lhe, anágaba neti benne daya yebáha, ettugabati gebie ganna chi dedáya lhe'e xiani kiaha lhe lhe'e xiani ge Tata kia do yebáha, lhe lhe'e xiani ge ka anjeli geeha lhe. <sup>27</sup> Neti gwalígati, ttu chupale ka nu se'ele nii nnanna, axtaliba ganna chi ilenle innabia Tata Do Yebáha, la'anialiba gattile.

*Jesús-ni tti due iki i'iyaha besea lobie  
(Mt. 17:1-8; Mr. 9:2-8)*

28 Iki de chi ute ttu xxunu ubisa unne Jesús-ni nuha, nianna chebie Pedro-ni lhe Juan-ni lhe Jacobo-ni lhe ugwapike iki ttu i'ya do niha kini ilhapie tisa len Tata Do Yebáha. 29 Laka dobie rinnebie len benneha nna besea lobie. Sitsi túba lhe rapi edha linníba lo xobie. 30 Nianna tti uka xxe chupa ka benne biyú unne lenke bie. Moisés-niba nuha lenna Elías-ni. 31 Ka benneha abi'iba ata se'ekeha yu'u chába xiani, nianna rinne lenke Jesús-ni ge elhutti chi ga'anna satebie lhe'esi Jerusalén-ni. 32 Pedro-ni lhe a chupa ka benne se'e lenieha, yalhá chi daa bisiela loke, ttaka nna gwa udaabake use'e tennáke, nianna bilákanie xiani ge Jesús-ni lhe ge a chupa ka benneha lhe. 33 Tti chi reru'una ka benneha ata du Jesús-ni, nianna unne Pedro-ni, rane:

—¡Gwen tte uka se'etu nii xa tata! Usiatu tsunna ka yo'o lhaga gele: ttu gelu nna ttu ge Moisés-ni nna attu ge Elías-ni nna.

Ttaka Pedro-ni nna labí yuna bixa nuha rana. 34 Laka duna rinnenaha, nianna tti bebe ttu bea ata se'ekeha. Tti ute dákanie se'eke lhe'e beaha, nianna tti usikanie. 35 Lhe'e beaha nna biyien tsi'i ttu benne, unnebie ree:

—Benne-ni anke Xi'inia lhe rakati gebie lhe. Ge benne-ni gwaludo nagale.

36 Iki de chi biyienkanie tsi'i benne unneha, la'ania nna a sunruba Jesús-ni bilákanie due niha. Lake nna siiba ukake; lanú nu utixxi'akanie ge nu bilákanieha.

*Jesús-ni beyonie ttu nu kwiti yu'u ttu espíritu xwegwi latini*

*(Mt. 17:14-21; Mr. 9:14-29)*

<sup>37</sup> Attu dilaha nna tti beyadike iki i'iyaha dedáke, ixe juisiru ka benne biriake gwatsáke Jesús-ni. <sup>38</sup> Lhe'e ka benneha sela ttu benne biyú nna unnebie idisa, ree:

—Biyúruttu nu kwiti kia-ni xa tata maestru. Bichisilá ttúru nuní doti. <sup>39</sup> Ttu espíritu ge nu xxegwiha ra'ana latini lhe rukwesi'ana na lhe rukwalhana na lhe anágaba ribeagabana inda kuchina ro'oni lhe rigin xxattana na lo yu nna labí reriaxxina latini. <sup>40</sup> Chigaba unnabaa len ka benne rudhetinlu-ni kini ebeake espíritu yu'u latin-ni, ttaka labí udaake.

<sup>41</sup> Jesús-ni nna bekabie, ree ka benne rudhetinieha:

—¡Aalexa lebi'i, ka nu abí ria lele lhe abí du itá lele lhe! ¿Nukalila sa dhua len lebi'i lhe sa utto uchíaya nu ruinle lhe? Aní utá len nu kwiti gelu-na.

<sup>42</sup> Tti dia nu kwitiha ribigana ata du Jesús-ni, nianna bedegu'una espíritu xxegwiha na lo yu nna bere xxattana na íyya. Ttaka Jesús-ni nna bedhaka dise nu xxegwi yu'u lati nu kwitiha, nianna beyonie na. Nianna tti rabie tata geniha:

—Ne nu kwiti geluha du nii.

<sup>43</sup> Iyába ka benne se'e niha nna bebanabakanie ge nu xxeni ra le Tata Do Yebáha.

*Jesús-ni redegixxi'abie attu libe deki teeki uttikane*

*(Mt. 17:22-23; Mr. 9:30-32)*

Laka se'e iyá ka benneha rebanabakanie ge iyá nu ruin Jesús-ni, labie nna ree ka benne rudhetinieha:

44 —Gwaludo tsitsi nagale nu upeya le. Neti benne daya yebáha, teeki utekana neti lasi ná ka nu uttikana neti.

45 Ttaka lake nna labí rite dákanie bí ge nuha rinnebie, kumu Tata Do Yebáha labí chi begwelhe ki tte dákanie. Gwea nna rasigabakanie innaba tisake Jesús-ni kini kixxi'e bixa diani nu reeha.

*Jesús-ni rigixxi'abie gasina dika uin ttu benne ra xxeniru lebie*

*(Mt. 18:1-5; Mr. 9:33-37)*

46 Nianna udulokana rulisa luesikani ra luesikani:

—Delo iyári'i, ¿núri'i nuní ra xxeniru leri'i?

47 Ttaka Jesús-ni nna ute dábanie nu rulaba lekaniha. Nianna tti bedaxxue ttu nuto nna bedúe na daka lhitte, 48 nianna ree:

—Benne ulabie nuto du-ni de ria lebie neti, neti nuha ulabie lhe nuxaba benne ganna ulabie neti, benne udhelhe netiha nuha rulabie. Laxkala delo iyá ttele, benne abittu ra xxeni leeha, benneha-la nuha anke nu ra xxeniru lebie.

*Benne abittu rigu'u ni'abie ri'i, benneha nuha gwa due len ri'i*

*(Mr. 9:38-40)*

49 Juan-ni nna unnena, rana:

—Maestru, ri'itu chi bilentu ttu nu reki naa, tti rudettina lálu nna rebeana ka espíritu xxegwi yu'u lati ka benne. Ri'itu chi bentu usunatu kini abittu uinna aná, kumu de labí selana ri'i.

50 Ttaka Jesús-ni nna ree na:

—Bittu usunale, kumu benne abittu rigu'u ni'e nu ruinri'i, gwa duba benneha lenri'i.

*Jesús-ni bedhaka dise Jacobo-ni lenna Juan-ni*

<sup>51</sup> Tti chi dabigana isia sá eyapi Jesús-ni yebáha, nianna bebeki lebie tsie lhe'esi Jerusalén-ni. <sup>52</sup> Lade'axa udhelhe ttu chupa ka benne diake nneruke. Ka benneha nna uta'ake lhe'e ttu yiesi re daka Samaria kini kilake gaxa eya'ane. <sup>53</sup> Ttaka ka benne Samaria-ni labí uka leke ulabike bie, kumu de ute dákanie daka Jerusalén-nila diabie. <sup>54</sup> Ka benne rudhetinieha nna, delába Jacobo-ni lhe Juan-ni lhe, tti bilákanie nu ukaha, nianna ráke bie:

—Tata, ¿si gwaka lelu uintu ki iginni gi daa yebáha ki utse'e loona kana?

<sup>55</sup> Ttaka Jesús-ni nna beyekie nna bedhaka dise ke. <sup>56</sup> Nianna dia ttebake lhe'e attu yiesi.

*Ka benne raka leke sanalhake Jesús-ni  
(Mt. 8:18-22)*

<sup>57</sup> Laka yu'uke neda diake, nianna tti ra ttu benne Jesús-ni:

—Tata, neti gwetenalhabaa kwinalu gaxaba tsialu.

<sup>58</sup> Jesús-ni nna bekabie ge benne unneeha, ree bie:

—Ka beda-na siaba lisi ka nuná ata reta'akana lhe anágaba ka nu sia xxilakani reki lo be-na siaba lixxu'in ka nuná ata rebiakana, ttaka neti, benne daya yebáha, labí do gaxa kixxa ikia.

<sup>59</sup> Nianna tti redea Jesús-ni attu benne:

—Utá, betenalha neti.

Benneha nna bekabie gebie, ree:

—Tata, begwelhaxa eya'aya takatsia tata ki-aha. Iki deliba nuha nna tti itaa etenalhaa lu.

<sup>60</sup> Jesús-ni nna bekabie ge benneha, ree:

—Begwelha ka nu yatti-na ukatsikana ka nu yatti gekinna. Lu nna ugweki utixxi'en ka benne gasina ki akake benne innabia Tata Do Yebáha ke.

<sup>61</sup> Attue nna redee Jesús-ni:

—Neti gwetenalhabaa lu xa tata, deba nna begwelhaxa eya'aya sachú tisaha ka benne se'e lhe'e lisiaha.

<sup>62</sup> Jesús-ni nna bekabie ge benneha, ree:

—Benne rudaxxue xan belasuha, ganna sa rodekiba loe rulannie daka kwe'ebie, benneha labí nu ixú anke ata rinnabia Tata Do Yebáha.

## 10

*Jesús-ni udhelhe gayuna bixxi tsi'inu (72) ka benne lhe'e ka yiesi ata ttebie*

<sup>1</sup> Iki de nu chi ukaha nna tti bodokwe Jesús-ni a gayuna bixxi tsi'inu (72) ka benne. Ka benneha nuha udhelhe chupa chupake kini uneruke loe nna tteke lhe'e iyába ka yiesi lhe ata chi ga'anna tsie lhe. <sup>2</sup> Nianna ree ka benneha:

—Yalhá ixeni lena tee exú, ttaka ka benne edíke lena-ni ttu chuparubake raka, kumu ixeba ka benne se'e riyasakanie iyienkanie ka tisa ge Tata Do Yebáha, ttaka ka benne rigixxi'ake ka tisa geeha, ttu chuparubake raka. De nuha nna gwalinnaba len Tata Do Yebáha, delába benne anke Xxana ka benne riyasakanie iyienkanie ka tisaha, kini idhelharue ka benne kixxi'akanie ke. <sup>3</sup> Lebi'i gwaltsia nna gwaluyúruğa, neti ridhelhaa le attiba ttu nu ridhelhana ka neru xka'a to diakana lagwi ge ka sageo. <sup>4</sup> Bittu dhen belhiu gele lhe nigaba uja beduti gele

ata ku'ule nu ixuinle lhe nigaba uja gwaracha gele, lhe anágaba bittu kwedale lo neda gale ka benne padiuxi. <sup>5</sup> Tti ga'ale lhe'e ttu yo'o, lade'axa gwaligasi ka benne se'e lhe'e yo'oha: "Besiru gwaltse'e." <sup>6</sup> Ganna lhe'e yo'oha se'e ka benne gwa raka leke tse'e tseke len Tata Do Yebáha, la'ania nna gwakaba nu rale ka benneha. Ttaka ganna abíba nna la'ania nna labí aka nu unnabaleha. <sup>7</sup> Lhe'e yo'o ata isinleha, niha-ba gwaltse'e, lhe anágaba gwali'aba lhe gwaligoba nu uteke, kumu ttu benne riben sina ralhaba benneha dhibie nu goe. Aná nna bittu eriale ttu yo'o nna sadita'ale attu yo'o. <sup>8</sup> Atti isinle lhe'e ttu yiesi ata gulabibakana le, gwaligo iyába nu usigakana lole <sup>9</sup> nna gwaleyoin ka benne rani se'e lhe'e yo'oha lhe gwaligágaba ke: "Lebi'i, chiba dabiga isia sá innabia Tata Do Yebáha le." <sup>10</sup> Ttaka ganna isinle lhe'e ttu yiesi nna abíba ulabikana le, nianna gwaleria lo ka neda ge lhe'esiha nna gwalinná: <sup>11</sup> "¡Axtaba biste ge lhe'esi gele-ni nu utá lasi ni'atu, axtaba nuní rukubitu kini utte dale deki labí ben tsele len ri'itu! Ttaka chi rigixxi'entu le deki chiba dabigana innabia Tata Do Yebáha." <sup>12</sup> Neti ria: Ganna chi isia sá uyú ka benne elha disaha, adírula elha disa tsitsi uyú ka benne se'e lhe'e yiesi ata labí ulabikana leha attichula elha disa uyú ka benne se'e lhe'esi Sodoma-ni.

<sup>13</sup> '¡Gwalíchi lele xa benne lhe'esi Corazín!  
 ¡Gwalíchi lele xa benne lhe'esi Betsaida! Ganna  
 lhe'esi Tiro-ni lhe lhe'esi Sidón-ni lhe chi uka ka  
 milagru ka nu chi uka lhe'e ka yiesi gele-na, la  
 nukala chi bodúna ka nuha nna bodaxxukana



neda ge Tata Do Yebáha. Nianna tti uku xo ttipa gekani nna tse'ekana lo tee ge gi, kini ula'a deki gwalí chi bodúna kana. <sup>14</sup> Laxkala ganna chi isia sá tti uin Tata Do Yebáha elhuxtisi ge ka benne, la'ania adírula tsitsi anka elha disa ugwebie le attichula elha disa tsitsi uyú ka benne ge Tiro-ni lhe ge Sidón-ni lhe. <sup>15</sup> Lebi'i nna ka benne lhe'esi Capernaum, ¿si rakinle deki yebáha-li eyapile? ¡Ko'o, labí! ¡Lhe'e belha'a chulhaha-li iginnile ata uyúle elha disa!

Nianna redeabie ka benne udhelheha:

<sup>16</sup> —Benne udo nage gele, kia nuha rudo naga benneha nna benne abittu ulabie le, neti nuha abittu rulabi benneha nna benne a ulabie netiha nna benne udhelhe netiha nuha abittu rulabie.

<sup>17</sup> Tti besin ka benne gayuna bixxi tsi'inu (72) udhelha Jesús-ni, yalhá itta du leke, ráke:

—Tata, axtaba ka espíritu xxegwiha rudokana tisa getu tti bedettitu lálu.

<sup>18</sup> Jesús-ni nna rabie ke:

—Gwalí galá. Neti bilábatu tti biginni nu xxegwiha dana yebáha, ttiba ttu edha biginnina.

<sup>19</sup> Neti chi betea lo neda gele kini uleale iki ka belha lhe iki ka ro'o chupa nna labí bi satele. Anágaba chi betea lo neda gele kini dhaale lo nu abittu raka uyúna ri'íha, delába nu xxegwi ra tsitsi leniha. <sup>20</sup> Ttaka lebi'i, labí edeakinle de chi rudo ka espíritu xxegwiha tisa gele. Lebi'i, gwaledeakalinle kumu de chi dia lále yebáha.

*Jesús-ni bedú itta lebie*  
(Mt. 11:25-27; 13:16-17)

<sup>21</sup> Nuha-ba ra Jesús-ni tti bodú itta Espíritu ge Tata Do Yebáha lebie, nianna bedeakanie nna ree:

—Tata, kwinalu ankalu Xxana yebáha lhe yiesi lo yu-ni lhe. Xxeni ra lelu kumu chi bele'elu iyá nuní len ka benne abí tte raka geke nna bekatsilu nuní len ka nu yu lhe len ka nu rite dárúkinna lhe. Gwalí galá xa Tata, kumu aná uka le kwinalu aka.

Nianna ree kana:

<sup>22</sup> —Tata kiahá iyába chi betebie lasi náya lhe anágaba lanú nu ankabienna neti benne ankaa Xi'inieha, sunruba Tataha gwankabianie neti lhe lanú nu ankabienna Tataha, sunruba neti benne ankaa Xi'inieha ankabiati benneha, lhe anágaba sunruba ka benne raka lasia ule'enia ke benneha ki uinbiake bie.

<sup>23</sup> Nianna tti bodeki loe ata se'e ka benne rudhetinieha nna suna ka benneha-ba rabie:

—¡Karubáru ka benne rilákanie nu rilenle-ni!

<sup>24</sup> Kumu neti ria le, ixé ka profeta lhe ixé ka nu rinnabia lhe, yalhá ukakinna ilákinna nu rilenle nnanna, ttaka labí bilákinna nuní. Ukagabakinna iyienikinna ka tisa riyieninle nnanna, ttaka labí biyienkinna.

*Ttu benne ge Samaria gwatua lebie ttu benne biyú*

<sup>25</sup> Ttu ka nu rule'ekinna ka benne nu ra lo bia bennabi bodha'an Tata Do Yebáha len Moisés-ni ruinna ku'una Jesús-ni prueba. Nianna udú liina unnaba tisane, rane:

—Maestru, ¿bíla teeki unia ki aka bania ttu dia líi?

<sup>26</sup> Jesús-ni nna bekabie geni, ree:

—¿Bíla ra lo bia bennabi-na? ¿Bíla rite denlu nu ra lo nuná?

<sup>27</sup> Nu rule'enna ka benne nu ra lo bia bennabiha nna bekabina, rana:

—Lo nuní dia ra: “Akinlu ge Tata Do Yebaa benne anka Xxanaluha itú iki itú lelu lhe ak-agabinlu ge attu benne atti tteba rakinlu gelu.”

<sup>28</sup> Jesús-ni nna rabie na:

—Tseba becabilu. Ganna uinlu aní nna gwaka benbalu ttu dia lii.

<sup>29</sup> Ttaka nu rule'enna ka benne nu ra lo bia bennabiha nna ruinna deki bittuba rite denna. Nianna rana Jesús-ni:

—¿Núla benne nuha akati gebie ganna?

<sup>30</sup> Jesús-ni nna bekabie geni, ree:

—Ttu nubiyú biriana lhe'esi Jerusalén-ni nna diana lhe'esi Jericó. Lo nedaha biria ka ubana ulanakana na, axtaba ka xoniha utuakana lhe uyakana na lhe, tuttíruba bechulhinna. Niha-ba utixxakana nubiyúha nna deyyakana. <sup>31</sup> Lo nedaha-gaba dia ttu bixxudi. Ttaka tti bilenna nubiyúha tena niha, lana nna bekwittalana nna utena diana. <sup>32</sup> Aníha-gaba bedoin ttu levita, tti bisinna ata tee nubiyúha, tti bilenna benneha nna bodokwittagabana nna utena diana. <sup>33</sup> Ttaka ttu benne biyú ge Samaria, la lo nedaha-gaba die. Tti bilánie nubiyúha tena niha, nianna gwatua lebie na <sup>34</sup> nna tti ubige ata tee nubiyúha, utabie seti lhe vinu lo ka gweha, nianna bechil-hie lari lo ka nuha. Iki de nuha nna belhapie nubiyúha kwe'e bia geeha nna dechebie na ata do ttu yo'o reya'an ka benne yu'u neda. Niha-ba biyúe na. <sup>35</sup> Beyeki dilaha nna ulea benne ge Samaria-ni chupa ka belhiu nu anka lhiaxa ge

chupa ubisa sina, begwebie xxana yo'oha nna ree nuha: “Biyú tsitsittu nubiyú-ni. Ganna utse'e loorulu nna neti gwagixabaa gelu ganna chi besiyaha.”

<sup>36</sup> Nianna ra Jesús-ni nu rule'enna ka benne nu ra lo bia bennabiha:

—Nnanna nna unáchu, delo iyunna ka nubiyú ute niha, ¿nú ka nuha rakinlu deki gwa ukakinna ge benne uya ka ubanaha?

<sup>37</sup> Nu rule'enna ka benne nu ra lo bia bennabiha nna bekabina, rane:

—Nubiyú nu gwatua leni benneha, lana nuha gwa ukinna gebie.

Jesús-ni nna ree na:

—Nnanna nna lu beyya nna aníha-gaba beni.

*Jesús-ni bisine lisi Marta-ni lhe María-ni lhe*

<sup>38</sup> Jesús-ni yu'ubie neda die len ka benne rudhetinieha nna bisine lhe'e ttu yiesi to re niha. Lhe'e yiesi toha do ttu nuila lána Marta. Lana nna gwa belabibane lhe'e lisiniha. <sup>39</sup> Marta-ni do ttu xilani lána María. María-ni nna ure ttebana arlo Jesús-ni kini rudo nagani ge ka tisa rigixxi'eha. <sup>40</sup> Ttaka Marta-ni si ruchachala ikini de tee xxatta sina geni lhe'e yo'oha. Nianna tti ubigana, rana Jesús-ni:

—Tata, ¿si abí gwa retabinlu kia? Nuila xilaa-ni, suna netiba rodha'anna sina-ni. Usi na ute gaa nání len neti.

<sup>41</sup> Ttaka Jesús-ni nna bekabie geni, ree na:

—Lu xa Marta, ge ixeba nu ruchacha ikilu lhe ge ixeba riuba xxattinlu lhe. <sup>42</sup> Ttaka teela ttu nu rakaru doelha. María-ni nna chi bekwena ttu

nu anka tseru, delába rudo nagani ka tisa kia-ni nna lanú nu kuana ka tisa-ni lo náni.

## 11

*Jesús-ni rigixxi'abie gasina ilhapiri'i tisa len Tata Do Yebáha*  
(Mt. 6:9-15; 7:7-11)

<sup>1</sup> Ttu lidú do Jesús-ni ata rilhapie tisa len Tata Do Yebáha. Tti chi uluxanie unnebie len benneha, nianna tti ra ttu ka benne rudhetinieha bie:

—Tata, bele'enttu ri'itu kini aka getu innetu len Tata Do Yebáha ttiba ben Juan-ni bele'enie ka benne bedhetinieha.

<sup>2</sup> Jesús-ni nna ree ke:

—Tti innele len Tata Do Yebáha, aní innále: Tata, ri'itu rugwetu lidhakalu kumu ankalu Diosi. Utá, unnabia ri'itu.

<sup>3</sup> Bete benne gotu ttu ttu sá.

<sup>4</sup> Uxí elha xen lasi ge ka tulha ruintu ttiba ri'itu gwa ridíbatu elha xen lasi ge ka nu abittu ruín tsekana len ri'itu. Bittu ugwelhalu ixú yietu uintu nu satsa.

<sup>5</sup> Nianna rágabe kana:

—Uindiri'i, ganna ttixka nuxa ttúle do ttu benne do tse lenle, nianna diale lisi benneha itú riluela ralee: “Betsi to, ulea ganna tsunna yettaxtila gelu-na kia <sup>6</sup> kumu si bisia tte ttu benne ankabientu dabie gwelanni ri'itu, ttaka labí teeti bixa usigaa loe.” <sup>7</sup> Laaba ganna benne tee lhi'uha, lhi'uliba tebie nna ekabie innee: “Bittu utsetsinlu neti. Chiba yaya yo'o kia-ni. Gwea nna chiba tee lania ka xi'inia-ni. Labí aka chadhaa ki utea nu rinnabalu-na.” <sup>8</sup> Neti

ria, labí de do tse lenlu benneha nna chadhe utebie nu rinnabaluha; deruba nna ki abitturu utsetsinlu benneha, de nuha-ruba nna gwayadhe nna utebie iyá nu rinnabaluha. <sup>9</sup> Laxkala neti ria le: gwalinnaba len Tata Do Yebáha, benneha nna gutebe nu rinnabaleha; gwalegila nna gwataxxakabale nu regilaleha. Gwalinne ro'o yo'oha nna gwadhalibakana kini ga'ale. <sup>10</sup> Kumu nuxaba benne ganna rinnabe ttu bixa nna gwa ridíbe nu rinnabehe lhe nuxaba benne ganna regilee ttu bixa nna gwa raxxakabe nu regileeha. Anágaba nna nuxaba benne ganna rinnebie ro'o yo'oha nna gwa ridhalibakana ra'abie.

<sup>11</sup> 'Ganna nuxa ttúle ankale xxudi, ¿si gugwele xi'inleha gona ttu belha ra'aya lhe'eni lo yu ganna ttixka innabana gona belha? <sup>12</sup> ¿O si ganna ttixka innabana gona sitta, laa gugwegale nuha ttu ro'o chupa ki gona? <sup>13</sup> Ki lebi'i ankalale nu runi satsa nna gwa rugwebale ka xi'inle-na nu tse rinnabakana, ¿titiala Tata geri'i do yebáha, guteba benneha Espíritu geeha len ka benne ganna innabake lenbie?

*Rusiakana iki Jesús-ni deki rixúnie Beelzebú-ni kini rebeabie ka espíritu xxegwi lati ka benne (Mt. 12:22-30; Mr. 3:20-27)*

<sup>14</sup> Jesús-ni daabie rebeabie ttu espíritu xxegwi yu'u lati ttu nubiyú. Nu xxegwiha benna kini beya'an nubiyúha biría. Tti chi beriana lati nubiyúha nna benné ttebana. Ka benne se'e niha nna bebanabakanie tti bilákanie nuha. <sup>15</sup> Ttaka attu chupakana nna rálakana:

—Beelzebú nu anka xxana ka espíritu xxegwiha-ba rixuin nuní kini rebeana ka espíritu xxegwi-na.

<sup>16</sup> Adíkana nna de ruinkana ki ku'ukane prueba kini ula'a ganna gwalí udhelha Tata Do Yebáha bie, de nuha nna unnabakana lenie unie ttu milagru. <sup>17</sup> Ttaka labie nna yuu gale nu rulaba lekaniha. Nianna tti ree kana:

—Ganna lhe'e ttu yiesi se'e la'a ka benne de ritilha len luesike, la'ania nna tse'e looba yiesiha lhe ganna ka benne se'e lhe'e ttu yo'o se'e la'ake de ritilha len luesike, la'ania nna tse'e loogabake.

<sup>18</sup> Anágaba nu xxegwiha, ganna do ttilhabana len ka luesi xxegwi-niha, la'ania nna labí aka geni innabiana ka nuha. Aní ria kumu lebi'i rale neti deki Beelzebú nu anka xxana ka espíritu xxegwiha-ba rixúti kini rebeaya adí ka espíritu xxegwi-na. <sup>19</sup> Ganna lebi'i rale deki neti rixúti Beelzebú-ni ki rebeaya ka espíritu xxegwi yu'u lati ka benne, ganna rale aná nna ka benne gele-na nna, ¿si nu xxegwiha-gaba rixúkinna kini rebeakana ka espíritu xxegwi yu'u lati ka benne? Ko'o, labí. Gwalinnaba tisarugakana. Ka nuná innákana ganna si gwalí nu rale-na. <sup>20</sup> Neti, Tata Do Yebáha-ba runie kini rebeaya ka espíritu xxegwi yu'u lati ka benne. Nu runia-ni runna liina deki chiba bisia Tata Do Yebáha len lebi'i kini innabie.

<sup>21</sup> 'Ttixka ttu nubiyú ankana tipa nna duna denna espada geniha kini anuttu nu tatta'ana lhe'e yo'o geniha, la'ania nna iyába nu tua tsenna lhe'e yo'oha, lanú nu ga'a dhina nuha. <sup>22</sup> Ttaka ganna isina attu nu ankaruna tipa nna dhaana

loni, nianna tti kuana lo nání espada nu dika odilána naha, nianna tti kuana iyá nu tee geniha nna kidhina nuha len ka benne.

<sup>23</sup> 'Laxkala nu abittu du lenna netiha, nuha rigu'uba ni'ani neti nna nu abittu rute nání len neti ki ottupatu ka benne lo neda ge Tata Do Yebáha, nuha urio lálana ka benneha.

*Jesús-ni rigixxi'abie gasina ruin ttu espíritu satsa tti reyekina reta'a adakabana lati ttu benne (Mt. 12:43-45)*

<sup>24</sup> "Ttixka ttu espíritu satsa reriana lati ttu benne nna rekibana lo yu bisiha regilana ata eyaka leni, ttaka tti abíba raxxakanaha, nianna rana: "Eyekichilaa eya'aya lisia ata biri-ayaha." <sup>25</sup> Tti eyekina esinnaha nna la'ania nna saxxakana benne beriana latieha chi doe anke ttiba ttu yo'o chi luba ra lhe'eni lhe chi yapa te xea lhe'eni lhe. <sup>26</sup> Nianna tti tsiana taxxína a gasi ka espíritu xxegwi, ka nu adírula satsa ruinkana tti lana. Nianna ga'akana tsu'ukana lati benneha. La'ania nna adírula satsa uni benneha attichula tti benie sisi'a tteha.

*Karubáru ka benne rudoke tisa ge Tata Do Yebáha*

<sup>27</sup> Laka du Jesús-ni ree aníha, nianna tti unne ttu benne nuila due lagwi ge ka benne tupa niha. Unnebie idisa, ree:

—¡Karubáru benne nuila bije lu lhe begasie lu lhe!

<sup>28</sup> Ttaka lee nna bekabilee, ree:

—¡Karubárula ka benne ata gwa rudo nagake nu ra Tata Do Yebáha nna gwa rudoke tisa gebie lhe!



*Rinnaba ka benne uin Jesús-ni ttu milagru  
(Mt. 12:38-42)*

<sup>29</sup> Tti chi rituparu ixé juisiru ka benne, nianna tti ra Jesús-ni ke:

—Ka benne se'e nnanna satsaba ruinke de rinnabake unia ttu milagru xxeni kini unna liina deki Tata Do Yebáha udhelhe neti, ttaka labíru ula'ania ke bixa attu milagru, sunruba luesi nu gwate Jonás-ni, sunruba luesi nuha gwalákanie.

<sup>30</sup> Kumu nu gwate Jonás-ni bixúna kini ugía le ka benne se'e Nínive-ni geni. Anágaba neti benne daya yebáha nu sateaha ixúna kini tsia le ka benne se'e nnanna kia. <sup>31</sup> Nuila unnabiana ka yiesi se'e daka Sabá, ganna chi isia sá uin Tata Do Yebáha elhuxtisi ge ka benne se'e yiesi lo yu-ni, la'ania nna eyadhana lo elhuttiha nna ukinnina ka benne se'e nnanna. Kumu lana idittuli dana nna betedo nagani ge elha rieni upa Salomón-ni. Nnanna nna nii du ttu benne xxenirula ra lebie tti Salomón-ni. <sup>32</sup> Anágaba ka benne use'e lhe'esi Nínive-ni, ganna chi isia sá uin Tata Do Yebáha elhuxtisi ge ka benne se'e yiesi lo yu-ni, la'ania nna eyadhagaba ka benneha lo elhuttiha nna ukinnike ka benne se'e nnanna. Kumu ka benneha gwa bodúbana ke ge nu benke nna bodaxxuke neda ge Tata Do Yebáha tti biyienkanie ka tisa utixxi'a Jonás-ni. Nnanna nna nii du ttu benne xxenirula ra lebie tti Jonás-ni nna a ria lele gebie.

*Jesús-ni rabie: “Ka iyya lori'i-ni ankakana  
ttiba ttu xiani ge latiri'i”  
(Mt. 6:22-23)*

<sup>33</sup> 'Lanú ttu benne do rugalhe iki ttu gi nu rudani, delo nna ukatsie ikini; nigaba ruttudhie ttu almoti ikini. ¿Laaba ganna teeki udoe nuha gwetsá kini iláni ka benne ga'a lhe'e yo'oha?

<sup>34</sup> Ka iyya lolu-na ankakana ttiba ttu xiani ge latilu. Ganna ka iyya lolu-na ankakana tse, delába ganna tseba rilákinna, la'ania nna itúba latilu tsu'u xiani; ttaka ganna ka iyya lolu-na abíba rilá tsekinna, la'ania nna itúbalu aka chulha. <sup>35</sup> De nuha nna biyú gelu ni kina chulhaba anka xiani yu'u latilu. <sup>36</sup> Kumu ganna itúba latilu yu'u xiani, ganna abittuba chulha anka, la'anialigaba nna itúbalu aka yien chará ule'ebalu ttiba rula'a ttu nu yu'u xiani latini.

*Jesús-ni rinnebie ge ka fariseo-ni lhe ge ka nu rule'ekinna ka benne nu ra lo bia bennabiha lhe (Mt. 23:1-36; Mr. 12:38-40; Lc. 20:45-47)*

<sup>37</sup> Tti chi uluxani Jesús-ni unnebie, nianna tti uxi ttu fariseo-nie lhe'e lisiniha kini goe yetta lenna. Tti ute'e lhe'e yo'oha, nianna udoe ro'o mexaha. <sup>38</sup> Tti bilani fariseo-ni deki labí utí ná Jesús-ni ki goe yetta, nianna uka tébinna. <sup>39</sup> Ttaka Jesús-ni nna ree na:

—Lebi'i ka fariseo, rochari tte xeaba latile, ruinbale ttiba nu rocharina kwe'e xigaha lhe kwe'e ye'enaha lhe, ttaka lhi'u lhe'e lastole nna saa tíba nu satsa ruinle lhe nu riguale ge ttu benne lhe. <sup>40</sup> ¡Aalexa nu yieti, a rieninle! ¿Si bi gwa yule deki benne benie latiri'iha, lagabe nuha benie lhi'u lhe'e lastori'i? <sup>41</sup> Lebi'i nu uinlale, itú iki itú lele gwalute nu tee gele len ka benne abittu geke tee kini aníha nna itú ttele eyarile.

<sup>42</sup> 'iGwalíchi lele xa fariseo! Lebi'i do tsitsiba lele rutele len Tata Do Yebáha tsii por ciento ge ka gwadhi bela lhe ge ka ruda lhe ge adíru ka kuana ya'a rexú gele. Ttaka nna rixxulhabinle uinle nu dika ixú lhe rixxulhabinle akinle ge Tata Do Yebáha lhe. Nuníla rakaru doelha uinle nna abittugaba udhanle utele nu chi ruteleha.

<sup>43</sup> 'iGwalíchi lele xa fariseo! Lebi'i ru'u lele kwiale lo ka xxila tseru se'e lhe'e ka yo'o ata rudhetile ka tisa ge Tata Do Yebáha, lhe anágaba raka lele latsiru inne ka benne gake le padiuxi atti reti'ake le lo ka neda-na.

<sup>44</sup> 'iGwalíchi lele, lebi'i ka nu rule'enle ka benne nu ra lo bia bennabi bodha'an Moisés-ni lhe lebi'i ka fariseo lhe! Lebi'i ankale attiba ttu baa abittu rilána tena, laxkala meskiba rite ka benne ruleake loni nna labí yuke bixa yu'u lhi'u yu.

<sup>45</sup> Nianna tti bekabi ttu ka nu rule'ekinna ka benne nu ra lo bia bennabi bodha'an Tata Do Yebáha len Moisés-ni, rane:

—Maestru, tti ralu aná iyágaba getu nuná rinnelu.

<sup>46</sup> Labie nna rabie kana:

—iAnágaba lebi'i ka nu rule'enle ka benne nu ra lo bia bennabi-na, gwalíchi lele! Kumu lebi'i ttiba ttu yua idi'i nuná rudelhale kwe'e ka benne tti ruinle doelha deki udoke tisa ge ttu nu labí dhaake udoke tisa geni, ttaka lebi'i nna niba ttu latti a raka lele udole tisa ge nu rule'ele-na.

<sup>47</sup> 'iGwalíchi lele! Lebi'i rusiale ka yo'o tse iki ka baa ge ka profeta betti ka benneola geleha.

<sup>48</sup> Len nuná runna liile deki gwa ru'uba lele nu ben ka benneola geleha, kumu lakana bettikana

ka profetaha nna lebi'i nna rusiale ka yo'o to iki ka baa ge ka benneha.

<sup>49</sup> 'Laxkala Tata Do Yebáha, kumu de anke benne yuu, de nuha nna ree: "Neti idhelhaa ka profeta lhe ka apóstol lhe kini tsiake kixxi'akanie ka benne ka tisa kia, ttaka ttu chupake uttikana ke nna attu chupake nna dhu nookana ke." <sup>50</sup> De nuha nna kwe'e ka benne se'e nnannaba udelhe reni ge iyá ka profeta bettikana attili sisi'a tte ure yiesi lo yu-niha. <sup>51</sup> Dhulona len Abel-ni nna axtaba Zacarías benne bettikana ata daa bekú lali'a ro'o yotu ge Tata Do Yebáha. De nuha nna neti ria, kwe'e ka benne se'e nnannaba udelha Tata Do Yebáha reni ge ka benneha.

<sup>52</sup> 'iGwalíchi lele xa benne rule'enle ka benne nu ra lo bia bennabiha! Lebi'i chi ben gele elha rieni rute Tata Do Yebáha; ttaka nigaba lebi'i a rite denle lhe nigaba a rugwelhale tte dani adíru ka benne raka leke tte dákanie.

<sup>53</sup> Tti ra Jesús-ni aníha, ka nu rule'ekinna ka benne nu ra lo bia bennabiha lhe ka fariseo-ni lhe yalhá bisa'a xxattakinna. Nianna udulokana bettisikinne nna ixeba nu unnaba tisakane. <sup>54</sup> Aníha ruinkana kini inittie bixa innábie kini anáchu nna tee ro'okani usiakana ikie ge ttu bixa.

## 12

### *Abittu uinle nu satsa ruin ka fariseo-ni*

<sup>1</sup> Laka du Jesús-ni niha nna risiaru ixé juisiru ka benne nna ruleaniba luesike. Nianna tti uduloé rinnebie, lade'axa rulise ka benne rud-hetinieha, rabie ke:

—Gwaluyú gele ka iyietile nu satsa ruin ka fariseo-ni, kumu lakana rise'ekana rákana: “Aní uinle”, ttaka lakana nna nu subila ruinkana. Ruinbakana ttiba ruin kua dii ria iki yiedi raka yettaxtila. Nuha lhe'e itúba kuaha rilhidhana. Aníha-gaba nuná ruin ka fariseo-ni; iyába ka benne runnittikana. <sup>2</sup> Kumu labí ttu bixa tee gatsi, abí eselana; nigaba ttu bixa raka sigá nna abí una ka benne geni. <sup>3</sup> Laxkala iyába nu unnele gatsiha, unaba ka benne ge nuha lhe nu unne sigá ro'o naga luesile lhe'e yo'oha, nu unneleha, iriagaba ka nu innekana nuha idisa kini iyienkin benne.

*Jesús-ni rabie ka benne: “Ge Tata Do Yebáha gwaligasini”*

*(Mt. 10:26-31)*

<sup>4</sup> 'Neti rulisaa le xa betsi to kia. Bittu gasinle ge ka nu uttikana le yiesi lo yu-ni. Kumu lakana sun bela latibale dhaakana uttikana, iki de nuha nna labíru dhaa ka nuná bixa udhakakana le. <sup>5</sup> Neti kixxi'ania le nú ge gasinle: Gwaligasilinle ge benne kuabie elha nabani gele yiesi lo yu-ni, iki de nuha nna gwaka gebie udelhe le lo gi ata uyú ka benne elha disa ttu dia lii, ge benneha nuní gasinle.

<sup>6</sup> 'Ttibanka ka binni to-na, ¿laaba ganna ukare'aba len chupa ka belhiu to chi rito'o gayuk-aba? Ttaka meskiba abí tte daka ka binni toha, labí rixulhin Tata Do Yebáha gekaba. <sup>7</sup> Anágaba lebi'i, axtaba ka itsa ikile-na babani benneha. Laxkala bittu gasinle kumu lebi'i dakarulale attichula ixé ka binni to.

*Jesús-ni rabie: “Gasina sate ka benne ria leke neti”*

<sup>8</sup> 'Neti ria: Nuxaba benne ganna dhi ro'e arlo ka benne deki ria lebie neti, anágaba neti benne daya yebáha, gwadígaba ro'a arlo ka anjeli ge Tata Do Yebáha deki gwalíba ria lebie neti. <sup>9</sup> Ttaka nuxaba benne ganna abíba dhi ro'e arlo ka benne deki ria lebie neti, anágaba neti arlo ka anjeliha abittugaba dhi ro'a deki ria lebie neti.

<sup>10</sup> 'Neti benne daya yebáha, nuxaba benne kue bala'ana kia, gwadíba Tata Do Yebáha elha xen lasi ge benneha, ttaka nu inne satsana ge Espíritu ge Tata Do Yebáha, nuha labí dhie elha xen lasi geni.

<sup>11</sup> 'Ttixka ichekana le lhe'e ka yo'o ata rudhe-tiri'i ka tisa ge Tata Do Yebáha, o tatso dúkana le arlo ka xueda lhe arlo ka uxtisi lhe, bittu uchacha ikile gasina ekabile gekani lhe o bí innále lhe.

<sup>12</sup> Kumu ganna chi galhale inneleha, la'ania nna Espíritu ge Tata Do Yebáha gutebe tisa len lebi'i kini ekabile gekani.

*Laa de gatta xxattaga geri'i nna aka benri'i ttu dia líi*

<sup>13</sup> Ttu ka benne sela lhe'e ka benne tupa niha, unnebie rabie Jesús-ni:

—Maestru, usi betsiaha utena nu ralhaa dhia ge nu bodha'an tata getuha ri'itu.

<sup>14</sup> Ttaka Jesús-ni nna bekabie geni, ree:

—Xa nubiyú, lanú nu chi bedúna neti kini akaa xueda o ki akaa nu kidhia gele.

<sup>15</sup> Rágabe ka benne se'e niha:

—Gwaluyú gele. Bittu udona lele gatta belhiu gele, kumu laa de gatta xxattaga gele nna aka benle.

<sup>16</sup> Nianna utixxi'anie kana ttu tisa. Aníha benie kini utte dákana bixa diani nu raka lebie kixxi'anie kanaha, nianna tti ree:

—Udo ttu nubiyú utta geni. Bexú xxatta lena lo yu geniha. <sup>17</sup> Nianna belaba lhi'u leni, rana: “¿Galasina unia ganna? Labí doti gaxa oga'aya iyá lena kia-ni.” <sup>18</sup> Nianna tti rana: “¡Aan, chi yua gasina unia! Otampaa ka ata rigua tsea ka lena kia-ni nna odixenrua kana, kini odisáya lhe'ekani iyá lena kia rexú lhe iyá nu tee kia lhe. <sup>19</sup> Nianna tti upeya la netiba: Betsi to, ixeniba nu tua tsenlu. Ixe ida uchía nuná. Nnanna nna udoba beyaka lelu lhe uto u'uya lhe bedí baa lhe.” <sup>20</sup> Ttaka Tata Do Yebáha nna ree na: “¡Aaluxa nu akaa elha rieni ikini! Loolha-ni tteba gattilu nna nu tua tsenlu-na nna, ¿núla ge nuná?” <sup>21</sup> Aníha-ba sate ka nu ruttupa xxattakana elha tse gekani yiesi lo yu-ni, ttaka arlo Tata Do Yebáha labí gatta ge ka nuná.

*Bittu uchacha ikile ge nu gole lhe ge nu ukule  
lhe*

*(Mt. 6:25-34)*

<sup>22</sup> Nianna tti ra Jesús-ni ka benne rud-hetinieha:

—De nuha nna neti ria le: Bittu uchacha ikile bixa gole kini aka benle lhe nigaba uchacha ikile ge nu ukule lhe, <sup>23</sup> kumu rakarula doelha aka benri'i attichula nu gori'i lhe anágaba dakarula bela latiri'i attichula nu ukuri'i. <sup>24</sup> Gwalulanniruga ge ka beki-na. Ka nuná labí rigu'ukana yielá, nigaba relapakana,

nigaba labí tee ata rigua tsekana lena gekani. Laa kiga de nuha nna Tata Do Yebáha gwa rugobe kana. ¿Laaba ganna lebi'i dakarulale tti ka nu sia xxilakinna? <sup>25</sup> Anágaba nna meskiba bika ruchacha xxatta ikile, laa de nuha-ga nna itiaruinle attu satti. <sup>26</sup> Ki ganna ttu bixa nuxka'a to a ridaale uinle, ¿beakala ki ruchacha ikile ge adíru nu subi?

<sup>27</sup> 'Gwalulanniruga, gasina riyelha ka iyya to daa ka lhe'exxi-na. Ka nuná labí riben ka nuná sina, nigaba a ribeakana tuilu. Neti ria le: Salomón nu unnabiaha, meskiba ukana nu ra xxeni leni, labí bikuna lari rula'a latsitoru tti rula'a ka iyya to-na. <sup>28</sup> Ki Tata Do Yebáha aná rugukue ka ixxi to daa lhe'exxi-na, ka nuná nasá ankakana ya'a nna uxxe gwisá nna chiba tsiakana itekana lo gi, anágaba lebi'i ka nu a ria tsitsi lele, ¿laaba ganna adírula tse ugukue le? <sup>29</sup> Laxkala lebi'i bittu uchacha ikile ge bixa gole lhe bixa i'iyale lhe. Bittu udúna le ge nuná. <sup>30</sup> Kumu ge iyá nuní ruchacha iki ka benne se'e yiesi lo yu-ni; ttaka lebi'i Tata gele do yebáha chiba yubie bí riyasinle. <sup>31</sup> Lebi'i nu uinlale gwaluinla doelha kini akale nu innabia Tata Do Yebáha, la'ania nna gutebe adí nu riyasinle.

*Jesús-ni rabie: "Gwaludo lele gwaluttupa elha tse gele yebáha"*

*(Mt. 6:19-21)*

<sup>32</sup> 'Lebi'i ka benne chi ankale kia, bittu gasinle. Ttu chuparubale se'e, ttaka Tata gele do yebáha nna chi bedá lebie betebie lo neda gele kini innabie len lebi'i. <sup>33</sup> Gwalutto'o nu tee gele nna gwalugwe ka benne abittu geke tee. Aníha



gwaluni kini gatta elha tse gele yebáha. Gwaluni ttiba ttu nu rigua tsena nu tee geni lhe'e ka beduti. Aníha-ba lebi'i, gwalikua tse elha tse gele yebáha, elha tse nu abittu lhuxa loona, nigaba ga'a ubana ki lhanana na, nigaba labí tsali belha dilha ikini. <sup>34</sup> Kumu ata gatta elha tse geleha, niha-ba udo lele.

*Jesús-ni rabie: "Gwaltse'e ubeda"*

<sup>35</sup> 'Gwalese'e tse nna gwaledhí tsitsi lhe'ele lhe anágaba gwalugalha iki ka gi gele gwalidheni. <sup>36</sup> Gwaluni ttiba runi ka nubiyú riben sina se'ekana ubeda xxanakaaniha tti esia nuha ugíana dha'a, kini sun tteba ganna chi besia nuha ukampana ro'o yo'oha nna chi se'e tsekana kini idhalikana eta'a nuha. <sup>37</sup> Karubáru ka benne ren lo xxanakeha ganna tti chi esianaha nna etexxakana ke se'eke ubeda na. Netiru ria: La kwinaba lana ose'ena ke ro'o mexaha nna tti dhu liina ka'ana elho goke. <sup>38</sup> Karubáru ka benneha ganna etexxakana ke se'eke ubeda na, meskiba esiana itú riluela o chi daa tsani. <sup>39</sup> Ttaka lebi'i gwalúnaruga, ganna ttixka xxana ttu yo'o chi yuna bí ura etechadi ubanaha yo'o geniha, la'ania nna dho tennálana kini abittu ugwelhana nuha lhanana nu tee lhe'e yo'o geniha. <sup>40</sup> Anágaba lebi'i, gwaltse'e ubeda, kumu neti benne daya yebáha, esiaya attila abittu ribedale neti.

*Benne abittu rudoe tisa ge xxaneha  
(Mt. 24:45-51)*

<sup>41</sup> Pedro-ni nna unnaba tisane, rana:  
—Tisa unnelu-ni xa tata, ¿si suna ri'ibatu betenlu nuní aka, iyába ka benne ak?

42 Jesús-ni nna ree na:

—¿Laaba ganna nu rudo tsitsina tisa ge xxananiha lhe ruinna attiba ankaba geni, laaba ganna lana nuha bodha'an xxananiha na ki uyúna adí ka nu riben sina lhe'e lisi nuha lhe kini ugoná ka nuha ura geni lhe? <sup>43</sup> Karubáru benne ren sinaha ganna chi besia xxaneha nna etexxakane gwa ruinbe sina nu daa loe unie. <sup>44</sup> Neti gwalígati, xxaneha odha'anbana lasi nábíe kini uyúe iyá nu se'e geniha. <sup>45</sup> Ttaka ganna nubiyú riben sinaha ulaba lhi'u leni akinna: “Risába xxana sina-ni, nu nuha resia.” Nianna tti dhulo ttebana gayana adíru ka nubiyú lhe ka nuila yu'u sinaha lhe, nianna tti dhona gona lhe i'iyana lhe dhusinna lhe. <sup>46</sup> Ttaka la sá attila abittu ribedanaha lhe ura attila abittu rakinna deki esia xxananiha, la'ania nna iyyaba leni esia nuha. Nianna tti ugwe xxananiha na ttu elha disa tsitsi. La'ania nna tti kweana na nna udelhana na ata se'e adíru ka nu abittu rudokana tisa.

<sup>47</sup> 'Ganna ttixka nu riben sinaha gwa yúbana nu raka le xxananiha, ttaka ganna abíba rudona tisa ge nu rana na, nigaba a rudhá leni, la'ania nna yalhá igulha nuha. <sup>48</sup> Ttaka ganna nu ren sinaha abíba yuna nu raka le xxananiha, nna ganna nu subila uinna nu dika kilana elha disa geni, ttaka kumu de abittu yuna nu raka le xxananiha, de nuha nna labí tte igulhana. Kumu ttixka ttu benne ridírue ixeni, ixenirugaba dho doelha benneha otebie. Anágaba ganna ttixka ttu benne ruxxen xxatta lekani gebie deki gwaka gebie unie ttu bixa, ixenirugaba nu innabakana

uin benneha.

*Jesús-ni rabie: “De lo ni'a kia nna tse'e tilha ka benne”*

*(Mt. 10:34-36)*

<sup>49</sup> Neti daya gwedo gi yiesi lo yu-ni. Aní rakati chi itena. <sup>50</sup> Neti teeki satea uyúa ttu elha disa tsitsi. Laxkala itúba tee-ni rudúna neti axtaliba ganna chi isia sá satea nuha, la'anialiba nna abitturu udúna neti. <sup>51</sup> Lebi'i, ¿si rakinle deki daya kini tse'e tse len luesi ka benne se'e yiesi lo yu-ni? Neti ria le, labí. Neti dalaa kini delo ni'a kia nna lha'a lhe'e luesi ka benne. <sup>52</sup> Kumu debá nnanna lhe nu si daa lhe, delo ni'a kia nna gayu ka benne yu'u lhe'e ttu yo'o tse'e ttilha len luesike, tsunnake ebi'i nooke a chupa ka benneha nna ka benne chupaha nna edebi'i nooke ka benne tsunnaha. <sup>53</sup> Xxudiha nna abittu aka uyúna xi'in biyúniha nna xi'in biyúha nna abittu aka uyúna xxudiniha; ixná nuilha nna abittu aka uyúna xi'iniunnániha nna xi'iniunnániha nna abittu aka uyúna ixnániha. Ixná nubiyúha nna abittu aka uyúna xolisiniha nna xolisiha nna abittu aka uyúna ixná nubiyúha.

*Nu raka yiesi lo yu-ni runna liina deki bixa aka*  
*(Mt. 16:1-4; Mr. 8:11-13)*

<sup>54</sup> Jesús-ni nna rágabe ka benne ixé juisiru tupa niha:

—Lebi'i tti rilenle ganna chi reyadha ka bea daka ata rito ubisa-na, nianna ra ttebale: “Aka iyya”, nna gwalíba nna rakaba iyya. <sup>55</sup> Anágaba tti daa be ka daka rreha nna redenále: “Ubisaba aka”, nna gwalíba nna rakaba ubisa. <sup>56</sup> ¡Aalexa nu rigí xú loni! Gwa rite dábinle nu raka yiesi

lo yu-ni lhe nu raka gwetsá lhe; delo nna a rite denle nu raka nnanna.

*Jesús-ni rabie: “Jeru tte eyoinle le benne ritilha lenleha”*

*(Mt. 5:25-26)*

<sup>57</sup> 'Kwinaba lebi'i gwalotte da gá tee nu dika ixú. <sup>58</sup> Kumu ttixka nu ritilha lenleha, diana taga'ana le lo uxtisi, laka yu'u lenle nuha neda diale, gwaluin doelha gwaleyoin leni kini abittu taga'ana le lo xuedaha nna xuedaha nna uttena le lo ná nu baninna lisiyyaha. Nuha nna uga'ana le lisiyya. <sup>59</sup> Neti ria: Labí lhaale lisiyyaha chiliba utixale iyá belhiu rinnabakanaha, la'anialiba nna ebeakana le niha.

## 13

*Lebi'i raka doelha odúna le ge ka tulha ruinle*

<sup>1</sup> La'aniagaba se'e ttu chupa ka benne ata du Jesús-ni. Ka benneha rigixxi'akanie bie deki Pilato-ni chi udhelhana bettikana ka benne ge Galilea-ni. Bettikana ke tti lo se'eke ruttike ka nimala uteke úna ge Tata Do Yebáha, nianna betselakana reni geke leni reni ge ka nimalaha.

<sup>2</sup> Jesús-ni nna bekabie ge ka benneha, ree:

—¿Si rakinle deki gwate ka benne ge Galilea-ni aníha, kumu de ankake ka nu ruinru tulha tti adíru ka nu lhe'esi gekeha? <sup>3</sup> Neti ria, labí. Anágaba lebi'i ganna abíba odúna le ge nu ruinle nna odaxxule neda ge Tata Do Yebáha, gattibale. <sup>4</sup> Anágaba ka benne sixunu (18) uttike tti ubixxi yo'o yadha xxattaha ikike, yo'o nu tee lání Siloé, ¿si rakinle tulha xxeniru ben ka benneha tti adíru ka benne se'e lhe'esi

Jerusalén-ni? <sup>5</sup> Neti ria, labí. Anágaba lebi'i ganna abíba odúna le ge nu ruinle nna odaxxule neda ge Tata Do Yebáha, gattigabale.

*Ya higuha labí nu xixxi ribia loni*

<sup>6</sup> Jesús-ni utixxi'anie ka benne tupa niha ttu tisa. Aníha benie kini utte dáke bí diani nu raka lebie kixxi'anie ke. Nianna tti ree ke:

—Ttu nubiyú du ttu ya higu geni lhe'e yu ata yadinna ka ya uvaha. Nianna ugíana gwalannina ganna gwasia lo nuha. Ttaka ni ttú higu bi tee lo nuha. <sup>7</sup> Aníha uka nna rana nubiyú ruyúna ka ya uvaha: “Biyúruka, chi uka tsunna ida ritaa retegiaya ganna gwasia nu xixxi lo ya higu-ni; ttaka nna niru ttú higu a retexxakaa loni. Uchú balha nuní. ¿Beaka ki duna nna sunruba rulhenna lo yu-ni?” <sup>8</sup> Ttaka nubiyú ruyúna yu geniha bekabina geni rana na: “Begwelhaba na dhuna attu ida xa tata. Neti gwa'ana la'abaa xanni lhe gudelhabaa bebi to lhe, <sup>9</sup> ni kina gaa gutebana nu xixxi to. Ganna siligaba abittu utena, la'anialigaba nna ichúlu na.”

*Jesús-ni beyonie ttu nuila la sá reyaka le ka nu Israel-ni*

<sup>10</sup> La sá tti reyaka le ka benne Israel-ni, la'ania du Jesús-ni rule'enie ka benne lhe'e ttu ka yo'o ata rudhetike ka tisa ge Tata Do Yebáha. <sup>11</sup> Lhe'e yo'oha re ttu nuila chiba uka sixunu (18) ida ranina de yu'u ttu espíritu xxegwi latini, axtaba bedona ruba kwe'eni. De nuha nna labíru raka elína. <sup>12</sup> Atti bilen Jesús-ni nuilaha, nianna tti uxie na nna ree na:

—Nuila, nnanna chiba beyakalu ge isagwe ridakalu-na.

<sup>13</sup> Nianna tti uxxua nábie kwe'eni, loora nna belí tteba nuilaha. Nianna tti udulona rana:

—¡Xxeniba ra le Tata Do Yebáha!

<sup>14</sup> Ttaka nubiyú rinnabiana lhe'e yo'o ata se'ekanaha nna bise'enna kumu de beyoni Jesús-ni nuilaha la sá reyaka lekaniha. Nianna rana ka benne se'e niha:

—Gwa ga'anaba kwenri'i xxupa ubisa sina. Lhe'e ka sá-ni gwaltá ki eyakale, nna bittu itale ka sá atti reyaka leri'i ki eyakale.

<sup>15</sup> Jesús-ni nna bekabie geni, ree:

—¡Aalexa nu rigí xú loni! Lebi'i, ¿si lagwa gwa ridhasile iki ka ku'una geleha o ka burru geleha ki tagi'ale kana inda la sá tti reyaka leri'iha? <sup>16</sup> Nuila du-ni nna ankana benne datiana Abraham-ni. Chiba uka sixunu (18) ida den nu xxegwiha na. ¿Laaba ganna tseba anka elána lo ná nuha, meskila anka sá reyaka leri'i?

<sup>17</sup> Tti ra Jesús-ni aníha, ka nu abittu raka uyúkanaha bettubakinna; ttaka adíru ka benne se'e niha, nna iyábake redeakabakanie de rilákanie ka elha tsagwi runieha.

*Jesús-ni utixxi'abie ge kua dii ria iki yiediha lhe ge ttu besi ge kuana muxtasa lhe*

*(Mt. 13:31-33; Mr. 4:30-32)*

<sup>18</sup> Jesús-ni rágabe:

—¿Gasina rule'e tti rinnabia Tata Do Yebáha ka benne? ¿Bí nuha rula'a tti rula'ana? <sup>19</sup> Tata Do Yebáha, tti rinnabie ka benne, elha rinnabia geeha ankana attiba ttu besi ge kuana muxtasa úda ttu benne biyú lo yu geeha. Tti be'eyunaha

nna, bisinbana ukana ttu yaga xeni nna axtala ka binniha rusia lhixxu'inkani lo ka náni.

<sup>20</sup> Nianna tti redenee attu libe:

—¿Bí nuha raxxína len nu raka tti rinnabia Tata Do Yebáha ka benne? <sup>21</sup> Elha rinnabia geeha ankana attiba kua dii bedaxxu ttu benne nuila nna bedelhe iki tsunna ya yiedi xuxtila kini ilhidhana lhe'e itúba kuaha.

*Gwaludiuba lele gwaliga'a ro'o puerta suniha*  
(Mt. 7:13-14, 21-23)

<sup>22</sup> Nedaba yu'u Jesús-ni die lhe'esi Jerusalén-ni nna ritebie lhe'e ka yiesi elha lhe lhe'e ka yiesi xka'a to lhe rule'enie ka benne ka tisa ge Tata Do Yebáha. <sup>23</sup> Nianna unnaba tisa ttu benne bie, rane:

—Tata, ¿si sunruba ttu chupa ka benne gwaka odilá Tata Do Yebáha ke?

Labie nna bekabie geke nna ree:

<sup>24</sup> —Gwaluin doelha gwaliga'a ro'o puerta suniha, kumu neti ria le, ixé ka benne raka leke ga'ake niha, ttaka labí dhaake ga'ake. <sup>25</sup> Kumu ganna chi ugwadha xxana yo'oha odheabie nuha, la'ania nna lebi'i nna eya'anbale lali'a ge yo'oha nna innále: “Tata to, udhalichi ki ga'atu.” Ttaka benneha nna ekabie gele innábie: “¿Neti labí yua gá benne le!” <sup>26</sup> Nianna tti dhulole innále: “Ki gwa utobatu lhe gwa u'uyabatu len kwinalu lhe anágaba ki gwa bele'ebinlu ri'itu ka tisa geluha lo ka neda ge lhe'esi getuha.” <sup>27</sup> Ttaka benneha nna ekabilee gele innábie: “¿Laa chi xpeya le: Labí yua gá uka lasile? ¿Gwalibietta kwe'a, lebi'i ka nu ruin satsa!” <sup>28</sup> La'ania nna dhulole kwesile lhe gorriba lo layale tti

ilenle Abraham-ni lhe Isaac-ni lhe Jacobo-ni lhe iyá ka profeta ge Tata Do Yebáha lhe se'eke ata rinnabieha; ttaka lebi'i nna beya'anbale ro'o yo'oha. <sup>29</sup> Kumu la'ania isia ka nu dákana daka ata riria ubisa lhe daka ata rito ubisa lhe, ka nu dákana daka liaha lhe daka rreha lhe. Isia ka nuha ata rinnabia Tata Do Yebáha, tse'ekana ro'o mexa geeha go lenkane. <sup>30</sup> La'ania nna ka nu ra xxeni lekani nnanna, ka nuha akakana ka nu abittu ra xxeni lekani nna ka nu abittu ra xxeni lekani nnanna, la'ania nna akakana ka nu inná xxeni lekani.

*Jesús-ni rudúne ge ka benne lhe'esi  
Jerusalén-ni*

*(Mt. 23:37-39)*

<sup>31</sup> Looraha-gaba bisin ttu chupa ka fariseo nna rákana Jesús-ni:

—Beria nii kini Herodes-ni ruinbana uttina lu.

<sup>32</sup> Labie nna bekabie gekani, ree:

—Gwaleyya nna gwaligasi bedaha: “Neti suna nasába lhe suna uxxeha-ba rebeaya ka espíritu xxegwi yu'u lati ka benne lhe reyonia ka benne rani lhe; gwisáha nna chiba iri'a lania sina runia-ni.” <sup>33</sup> Ttaka neti teeki tsiaya neda kia nasá lhe uxxeha lhe attu sá lhe kini isinaa lhe'esi Jerusalén-ni. Kumu ttu benne anke profeta ge Tata Do Yebáha teeki gatti benneha lhe'esi Jerusalén-ni, labí dika gatti benneha attu ta subi.

<sup>34</sup> '¡Eru geni xa benne ge Jerusalén! Lebi'i ruttile ka profeta ge Tata Do Yebáha lhe rusiale íyya ka benne ridhelhe ki risiake lhe'esi gele-ni rigixxi'ake ka tisa gebie. Ixe lidú benia ottupaa le ttiba runi beraha rottupana ka xi'inniha regu'u



lhe'e xxilani kana, ttaka lebi'i nna labí uka lele. <sup>35</sup> Gwaluyúruuga, a sun ttúba lhe'esi gele-na eya'anna. Neti upeya le, labíru ilenle neti axtaliba ganna chi bisia sá tti innále: “;Karubárulu dedálu kwenta ge Tata Xisiha!” La'anialiba nna elenle neti attu libe.

## 14

### *Jesús-ni beyonie ttu benne biyú yu'u latie gi*

<sup>1</sup> Uka nuha tti bisia ttu sá tti reyaka le ka benne Israel-ni, la'ania ugía Jesús-ni go yetta lisi ttu nu loni ge ka fariseo-ni. Adíru ka fariseo-ni nna rulhatsibakana gebie. <sup>2</sup> Arlogabe du ttu benne biyú yu'u latie gi. <sup>3</sup> Nianna unnaba tise ka fariseo se'e niha lhe ka nu rule'ekinna ka benne nu ra lo bia bennabi bodha'an Tata Do Yebáha len Moisés-ni, ree kana:

—¿Si gwa dika eyaka ttu benne rani la sá reyaka leri'i ak; o abittuba ak?

<sup>4</sup> Ttaka lakana nna siiba ukakana; labí bekabikana. Nianna bedaxxue benne raniha nna beyonie bie, nianna ree bie:

—Beyya lisiluha.

<sup>5</sup> Ka fariseo-ni nna rabie kana:

—Ganna ttixka ttúle iginni ttu xi'in biyúle o ttu ku'una gele lhe'e ttu yiela inda, ¿laaba ganna meskiba anka la sáha sá reyaka leri'i, lebi'i nna tsia ttebale taleale nuha lhe'e yiela indaha?

<sup>6</sup> Lakana nna labí beselakinna bixa ekabikana gebie.

### *Ka nu biyaxikana se'ekana dha'aha*

<sup>7</sup> Tti bilani Jesús-ni adíru ka nu uxi fariseo-ni lhe'e lisiniha yu'ukana rukwekana ka xxila se'e

lagwiha kini tse'ekana, nianna tti utixxi'anie kana ttu tisa. Aníha benie ki utte dákana bí diani nu raka lebie kixxi'anie kana, nianna tti ree:

<sup>8</sup> —Ttixka nuxa gaxina lu tsialu dha'a, bittu tadholu lo ka xxila se'e lagwiha, kumu ni kina delola isia ttu nu ra xxeniru leni tti lu. <sup>9</sup> Nianna tti isia benne uxie ixpaleha nna gabie lu: “Begwe benne du nii xxila dolu-na kini dhobie.” La'ania nna itú rettubinlu edú lilu nna tarelu lo ka xxila se'e axta lo xubanaha. <sup>10</sup> Lu nu uinlalu, ganna ttixka gaxikana lu, ugíala gwache lo ka xxila se'e lo xubanaha kini ganna chi etelisa benne uxie lu lisieha nna gabie lu: “Betsi to, gaxxala nii utá udo.” Aníha-la nna gwebanala lelu lo iyá ka nu se'e lenlu ro'o mexaha. <sup>11</sup> Kumu ttu nu runi deki ra xxeni leni, nna elhida gaala Tata Do Yebáha nuha nna ttu benne rorexha gaa lebie nna uinla Tata Do Yebáha ki inná xxeni lebie.

<sup>12</sup> Rágaba Jesús-ni nu uxine lisiniha:

—Ganna ttixka lu gaxilu ka benne ugolu xueke o irseke, bittu gaxilu ka nu do tse lenlu o ka betsilu, nigaba gaxilu ka benne raka luesilu, nigaba ka nu tee gekani se'e gaxxa ata doluha. Kumu ka nuha nna eyaxibakana lu, la'ania nna niha-ba chi okixalu nu begolu ka nuha. <sup>13</sup> Lu, nu uinlalu, ttixka utelu ttu elho, uxila ka benne abí geke tee lhe ka benne akaa ttu lha'a ni'ake o náke lhe ka benne ridá natsa lhe anágaba ka benne xua loke lhe. <sup>14</sup> Aníha-la nna gwa teela elha gwedeaka lasi gelu arlo Tata Do Yebáha kumu ka benneha labí aka geke egixake elho uteluha. Ttaka ganna chi bisia sá eyaka ben ka benne gwa benke nu dika ixúha, la'ania nna gwa ralhalalu edílu ge nu beteluha.

*Jesús-ni rigixxi'abie ge ka nu biyaxikana gokana yettaha*

<sup>15</sup> Ttu ka nu do go yetta len Jesús-ni, tti biyieninna nu unneeha, nianna rane:

—¡Karubáru benne edí baabie elho tee ata rinnabia Tata Do Yebáha!

<sup>16</sup> Jesús-ni nna rabie na:

—Ttu nubiyú benna ttu elho tse nna uxina ixe ka benne. <sup>17</sup> Tti chi bisia ura go irsekaniha, nianna udhelhana nubiyú riben sina geniha ki tsiana talisana ka nu chi biyaxiha, gana kana: “Gwaltá. Chiba tee elho.” <sup>18</sup> Ttaka nna iyábakana udulokana bedúkana tisa. Ttúna rana: “Si uxíbaa ttu lo yu kia nna nuha-la raka doelha tsiaya gwelanni. Usittue dhichie elha xen lasi kia.” <sup>19</sup> Attuna nna rana: “Si uxíbaa gayu neda ka ku'una kia nna si uttánalaa ka nuha. Usittue dhichie elha xen lasi kia.” <sup>20</sup> Attuna nna redenána: “Si betsába náya, de nuha nna labí aka dhaya.” <sup>21</sup> Nianna tti beyeki nu ren sinaha nna utixxi'enna xxananiha iyá nu ra ka nuha. Xxananiha nna yalhá bise'enna, nianna tti rana nubiyú ren sina geniha: “Begwe lelu ugía lo ka neda xeni-na lhe lo ka neda xka'a se'e lhe'e yiesi-ni. Gwaxxi ka benne abittu tee geke lhe ka benne reku ni'a náke lhe anágaba ka benne xua loke lhe ka benne ridá natsa lhe. Usi ke itake.” <sup>22</sup> Laa bikaga isá chi uka nna chi bedesia nubiyúha nna rana xxananiha: “Chiba benia nu ráluha xa tata, ttaka nna riyasaru ki isá benne lhe'e yo'o gelu-ni.” <sup>23</sup> Nianna redea xxananiha na: “Ugía itú ro'esi-na lhe ugía ata riria ka neda dia ka lhe'exxiha nna bedo doelha ka benne itake kini isá lhe'e yo'o kia-ni. <sup>24</sup> Kumu neti ria, ni

ttú ka nu uxia sisi'a tteha a unnixxikana elho kia-ni.”

*Ka benne tanalhake Jesús-ni teeki sateke*

<sup>25</sup> Ixeba ka benne danalhake Jesús-ni, nianna bodeki loe, ree ke:

<sup>26</sup> —Ttu benne ganna raka lebie etenalhe neti teeki akarunie kia attichula ge tata geeha lhe ge nan geeha lhe. Anágaba akarulanie kia attichula ge nuila geeha lhe ge ka xi'inieha lhe ge ka betsieha lhe ge ka daneha lhe. Anágaba nna akarunie kia attichula gebie, kumu ganna abíba nna labí dika aka benneha benne udhetinia. <sup>27</sup> Anágaba benne ganna abíba uje kurusi gee etenalhe neti, delába ganna abíba eria iki eria lebie meskila bixa udhakakane de etenalhe neti, benneha labí dika ake benne udhetinia.

<sup>28</sup> 'Ganna ttixka nuxa ttúle raka lele udole ttu yo'o barto, ¿laaba ganna lade'axa teeki tse'ele udhaka lele ttixa utse'e loole ge nuha, kini aníha-chu nna aka xen lele ganna gwadaa belhiu geleha ulhuxale yo'oha? <sup>29</sup> Kumu ni kina dhulob-ale ukuale íyya xan nuha, delo nna abí dhaale ulhuxale na. La'ania nna iyába ka nu ilákinna nuha dhulokana uxisikana gele, <sup>30</sup> innákana: “Benne do nii uduloe rudoe yo'o ttinka, ttaka nna abígaba udaabie ulhuxe na.”

<sup>31</sup> 'Anágaba nna ganna ttixka ttu nu rinnabia ge ttu yiesi tsiana ttilhana len attu nu rinnabia ge attu yiesi, ¿laaba ganna lade'axa dhona udhaka leni ganna gwadaa tsii mili ka benne chenaha itilhake len galhia (20) mili ka nu che nu ritilha lennaha? <sup>32</sup> Ganna udhaka leni deki abíba dhaana lo nuha, la'ania nna attili sa du nuha

idittu len ka benne geniha nna idhelhana ka nu tsiakana tannabakana len nuha kini ese'e tsekana. <sup>33</sup> Anágaba lebi'i, ganna nuxa ttúle abittu udhá ikile iyá nu tee gele, la'ania nna labí dika akale benne udhetinia.

*Jesús-ni rabie: "Ganna ttixka detiha unnitti ixé geni"*

*(Mt. 5:13; Mr. 9:50)*

<sup>34</sup> 'Detiha tseba anka nuha, ttaka ganna unnitti ixé geni, la'ania nna labíru go nuha ixé.

<sup>35</sup> Nigaba a ixúruna tsiana lo yu lhe nigaba a ixúruna tsiana lhe'e ttu ti'a bebi, a sunruba ixúna iru'unana.

'iAta sia nagale, gwaludo nagale ganna gwankale nu dika iyienini!

## 15

*Benne beselanie neru bigannaha*

*(Mt. 18:10-14)*

<sup>1</sup> Iyába ka gwekixa lhe ka nu daa tisa gekani deki ruin satsakana, iyábakana ribigakana ata du Jesús-ni ki udo nagakani gebie. <sup>2</sup> Ka fariseo-ni lhe ka nu rule'ekinna ka benne nu ra lo bia bennabi bodha'an Moisés-ni rinnekana ge Jesús-ni, rákana:

—Nubiyú du nii anála ruinna, rulabibana ka nu runi tulha-na lhe rogaba lenna ka nuná yetta lhe.

<sup>3</sup> Nianna utixxi'ani Jesús-ni kana ttu tisa. Aníha benie ki utte dákana bí diani nu raka lee kixxi'anie kanaha. Nianna tti ree:

<sup>4</sup> —Ganna ttixka nuxa ttúle se'e ttu gayua (100) ka neru gele nna udelhale ttu nuha, ¿laaba

ganna use'e bixxibale a tta bixxi chennia (99) ka nuha lhe'exxiha, nianna tsekile egilale neru bigannaha, axtaliba ki taxxakale na? <sup>5</sup> Ganna chi beselinle nuha, la'ania nna edeaka tenle odelha xa yienle na. <sup>6</sup> Ganna chi besinle lisileha nna ottupa ttebale ka benne se'e tse lenle lhe ka benne se'e gaxxa ata se'eleha lhe, nianna gale ke: "Gwaledeaka tenle len neti, kumu chiba gwaxxakaa neru bigannatiha."

<sup>7</sup> Nianna ra Jesús-ni:

—Neti ria le: Gattarula elha gwedeaka lasi yebáha ganna ttxika ttu benne runi tulha odúne nna odaxxue neda ge Tata Do Yebáha, gattarula elha gwedeaka lasi ge benneha attichula ge tta bixxi chennia (99) ka benne ruinke latsiru nna labí riyasa odúna ke nna odaxxuke neda ge Tata Do Yebáha.

*Benne nuila bedelhe belhiu geeha*

<sup>8</sup> Nianna redenágabe:

—Uindiri'i ganna ttu benne nuila tee tsii ka belhiu dinni gebie, nianna udelhe ttu ka nuha, ÷laaba ganna teeki ugalhe iki ttu gi lhe olhuba te xeabie lhe'e yo'oha kini egile nuha, axtaliba ki eselanie na? <sup>9</sup> Ganna chi beselanie belhuha, la'ania nna tti talise adíru ka luesi nuilee lhe ka benne se'e gaxxa ata doeha lhe, nianna gabie ka benneha: "Gwaledeaka tenle len neti kumu chiba beselati belhiu bedelhaaha."

<sup>10</sup> Nianna ra Jesús-ni:

—Neti ria le: Aníha-gaba gatta elha gwedeaka lasi ge ka anjeli ge Tata Do Yebáha ganna ttu benne ruin tulha odúne nna odaxxue neda ge Tata Do Yebáha.

*Benne biyú bolabie xi'in biyúeha*

11 Jesús-ni nna rágabe:

—Ttu benne biyú use'e chupa ka xi'in biyúe.

12 Nu gwexxaha rana tata gekaniha: “Tata, ulha'a lhe'e iyá nu tee gelu-na nna bete nu ralhaa dhia.” Nianna ulha'abie lhe'e nu tee geeha nna begwebie kana. 13 Bi bisá nuha nna chi bettupa nu gwexxaha nu ulhanaha nna biriana diana lhe'e attu yiesi dittu. Niha-ba gwatse'e loona belhiu ge nu chi uxínaha; benbana attiba rakaba leni. 14 Tti chi beyá nuha betse'e loona, nianna tti bisiaru ttu ubina lhe'e yiesi ata donaha, nianna chi udulo biyasa geni. 15 La'ania nna tti ugíana gwadhona lo sina ge ttu ka nu tee geni do lhe'e yiesiha. Nuha nna udhelhana na ata yu'u ka kuchi geniha kini uyúna ka nuha. 16 Ttaka lana yalhá rituinna nna ridá leni gona nu ro ka kuchiha, ttaka lanú rugwena na nu gona. 17 Niha-ba dona nna tti botte dana nna rana: “Ixeba ka nu yu'u riben sina ge tata kiaha tee tamaba nu rokana. Neti nna doa nii rattia ubina. 18 Eya'achilaa lisi tata kiaha nna upeye: Tatoo, neti chi betsetsia len Tata Do Yebáha lhe chi betsetsia len kwinalu lhe. 19 Nnanna labíru elha ralhaa gatta láya xi'inlu. Biyúba neti attiba ruyúlu ka benne yu'u sina gelu-na.” 20 Aníha-ba uka nna begu'una neda deyyana lisi tata geniha.

'Attili sa dedána idittuha nna chi bilani tata geniha na nna gwatua lebie na. Nianna biresu ttebe gwatsábie na nna utesie kwe'eni lhe utoe xxagani lhe. 21 Nu kwitiha nna rana: “Tata to kia, neti chi betsetsia len Tata Do Yebáha lhe chi betsetsia len kwinalu lhe. Labíru elha ralha

neti gatta láya xi'inlu.” <sup>22</sup> Ttaka tata geniha nna rabie ka nu riben sina geeha: “¡Gwalugwe lele gwatalhea ttu xo tse nna gwaluguku na, lhe anágaba nna gwaliku'u ttu be'e náníi lhe gwaliku'u gwaracha ni'ani lhe, <sup>23</sup> anágaba nna gwataxxí ttu gwirri to, ttu ka nu gwa rixenrukana nna gwalutti na kini gori'i uinri'i laní! <sup>24</sup> Kumu neti ukati chiba utti xi'inia-ni, ttaka nnanna nna gwa besia benbana. Chiba binittina, ttaka nnanna nna chiba beselana.” Nianna tti uduloke laníha.

<sup>25</sup> 'Attu xi'in biyú xen ge uxtoha nna lhe'exxiha-ba rekina. Tti beyekina deyyanaha nna tti besinna gaxxa kwe'e yo'oha nna biyieninna yu'u ka nu rulha lhe raka gweya'a lhe. <sup>26</sup> Nianna tti uxina ttu ka nu riben sina ge tata geniha nna unnaba tisana nuha, rana na: “¿Bíunna raka?” <sup>27</sup> Nubiyúha nna rana na: “Laa betsiluha nuná besia. Tata gelu-na chi benie doelha kini utti ttu gwirri to ttu ka nu gwa rixenru, kumu betsiluha gwa besia tsebana.” <sup>28</sup> Ttaka nubiyú xeniha nna yalhá bisa'a xxattinna. Birula raka leni eta'ana yo'o. Aníha uka nna teeki biria tata geniha benie doelha loni ki beta'ana yo'o. <sup>29</sup> Ttaka lana nna rana tata geniha: “Lu gwa yu xeabalu, ixé ida chi rixúa lo sina gelu nna ni tsa labí chi bedú disaa lolu; ttaka nna lu niba ttu chiva to abittu chi betelu len neti ki unia laní len ka nu kwiti do tse lania. <sup>30</sup> ¡Nnanna nna besia xi'inlu-na, chi gwatse'e loona belhiu geluha len ka nuila ruin satsa nna lu nna de elha gwedeaka lasi geni nna chi bettilu ttu gwirri rixen xxatta!”



<sup>31</sup> Tata geniha nna bekabie geni, ree na: “Xi'ini to kia, lu satíaba do lenlu neti nna iyába nu tee kia-ni, gebalu nuní. <sup>32</sup> Ttaka nnanna nna raka doelha uinri'i laní lhe edeaka tenri'i kumu betsilu-ni chiba uttina rakati, nnanna nna gwa besia benbana. Chiba binittina, ttaka nnanna nna chiba beselana.”

## 16

### *Nubiyú riben sinaha botsi'inu leni*

<sup>1</sup> Jesús-ni nna utixxi'agabanie ka benne rud-hetinieha, ree ke:

—Udo ttu nubiyú utta xxatta geni. Nianna udogaba ttu nu uren sina geni. Nuha biyúna iyába nu tee geniha. Nianna ugía ka benne gwattixxi'akanie nu anka xxana sinaha, ráke nuha: “Nu ren lo sina geluha, kwentaba rutse'e loona nu tee geluha.” <sup>2</sup> Xxana sinaha nna uxina nubiyúha, rana na: “¿Bíunna rákana ruinlu? Looa tte nnanna raka lasia kixxi'enlu neti ttixa rudhálu sina kia-na, kumu neti labíru raka lasia kwenlu uyúlu nu tee kia.” <sup>3</sup> Nu ren sinaha nna belaba tteba leni, rana: “¿Bíla anka nu unia ganna? Nnanna abíruba sina kia ute nu anka xxanaa-ni, neti nna labíru lheaka ankaa ki kwenia ka lo yu. Gwea nna rettulati tsekia innabaa belhiu.” <sup>4</sup> Nianna rana: “Chi yua bí unia kini ganna chi uchúna neti sina, la'ania nna chi tse'e ka benne gaxike neti lisike.” <sup>5</sup> Nianna tti udulona uxina ttu ttuba ka nu dákana ge xxananiha. Nu uxina sisi'a tteha nna unnaba tisana nuha, rana na: “¿Tti daalu ge uxto-ni?” <sup>6</sup> Nuha nna bekabina, rana: “Laa daya ttu

gayua (100) bega seti geni.” Nu reni sinaha nna rana na: “Ne yetsi ge nu daalu-na tee nii nna begwe lelu nna udo bodo lo yetsi-ni deki a suna tsieyonaba (50) daalu.” <sup>7</sup> Delola nna bedennaba tisana attu nuha, redeana na: “Lu nna, ¿tti daalu?” Nuha nna redenána: “Laa daya ttu gayua (100) uxtali xuxtila.” Nianna redeana nuha: “Ne yetsi ge nu daalu-na tee nii nna udo bodo lo yetsi-ni deki a suna a tta (80) uxtaliba daalu.” <sup>8</sup> Xxananiha nna bebanabinna ge elha si'inu ge nubiyú ren sina geniha. Kumu ka nu rudo lekani ge nu anka ge yiesi lo yu-ni, resi'inurukana gasina uinkana tti ka benne chi ankake ge Tata Do Yebáha.

<sup>9</sup> Nianna ra Jesús-ni:

—Neti rigixxi'ania le, ixuinle nu tse tee yiesi lo yu-ni kini tse'e tse lenle ka benne kini anáchu ganna chi beyá nu tseha, la'ania nna chi se'e ka benne edíke le tti esinle lhe'e ka yo'o sia ttu dia lii yebáha.

<sup>10</sup> 'Kumu ttu benne ganna ttixka uyú tsitsibe nu ttu latti tee geeha, aníha-gaba unie ganna ttixka tee ixeni gebie, tsitsigaba uyúe nuha nna nu abíba uyú tsitsina nu ttu latti tee geniha nna, aníha-gaba uin nuha ganna ttixka tee ixeni geni, abígaba uyú tsitsina nuha. <sup>11</sup> Laxkala ganna lebi'i abíba uyú tsitsile elha tse tee yiesi lo yu-ni, anágaba nu gwalíga anka elha tse tee yebáha, ¿nú uxxen leni gele deki guyúle nuha? <sup>12</sup> Ganna abíba biyú tsitsile nu anka ge attu benne subi, la'ania nna, ¿gasina uxxen lekani le deki guyú tsitsile nu dika aka gele?

<sup>13</sup> 'Lanú ttu benne do aka gebie kwenie sina lo chupa ka xxane, kumu itisibanie ttu nuha, nna attu nuha nna akanie geni o udo tsitsibe tisa ge ttu nuha nna attu nuha nna ku'uba ni'e nu innána. Anágaba lebi'i labí aka gele kwenle lo sina ge chupa xxanale, delába labí aka ixúle ge Tata Do Yebáha lhe anágaba labí aka udogabana lele gatta xxatta belhiu gele.

<sup>14</sup> Ttaka ka fariseo-ni, kumu de raka galákinna ge belhiu, laxkala tti biyienkinna nu ra Jesús-ni nna bexsilakana gebie. <sup>15</sup> Jesús-ni nna rabie kana:

—Lebi'i lo benne rule'ele deki ankale benne ruin tse, ttaka Tata Do Yebáha gwa yube ttxa anka lhe'e lastole. Kumu ka benne se'e yiesi lo yu-ni nu rakakanie deki dakaruna, Tata Do Yebáha ttu tsaba rigu'u ni'e nuha.

*Jesús-ni rigixxi'abie ge bia bennabi bodha'an Tata Do Yebáha len Moisés-ni*

<sup>16</sup> 'Ka tisa dia lo bia bennabi bodha'an Tata Do Yebáha len Moisés-ni lhe ka tisa utixxi'a ka profeta ge Tata Do Yebáha lhe, debá tti bisia Juan-ni gwa utixxi'aruke ka benneha. Iki de nuha nna chi uduloke rigixxi'ake gasina innabia Tata Do Yebáha ka benne. Laxkala de nuha nna iyába ka benne chi ruinke doelha ga'ake ki innabiabie ke.

<sup>17</sup> 'Yebáha lhe yiesi lo yu-ni, adírula satti tse'e loo ka nuní attichula ttu tisa chika'a to dia lo bia bennabi bodha'an Tata Do Yebáha.

*Jesús-ni rabie: "Labí dika udhá iki luesi ka benne"*

*(Mt. 19:1-12; Mr. 10:1-12)*

<sup>18</sup> 'Satsaba nuha uni ttu nubiyú ganna udhá ikini nuila geniha nna edína attu nuila subi. Anágaba nna satsagaba nuha uni ttu nubiyú ganna edína ttu nuila chi bedhá ikikani.

*Nu gwate Lázaro-ni lhe nu gwate nubiyú utta xxatta geniha lhe*

<sup>19</sup> Jesús-ni rabie:

—Udo ttu nubiyú utta xxatta geni. Yalhá lhe'e udú xoni nna ttu ttu sába rugo tsena ka benne. <sup>20</sup> Udogaba ttu benne utta lábie Lázaro; uke ttu benne dii nna ubia xxatta yiesu itúba latie. Benneha ridobie ro'o lisi nu tee xxatta geniha <sup>21</sup> nna raka lebie edige ka nu yuyya riginni xani'a mexa ge nuha. Anágaba nna axtaba ka bekuha risinkana rilhe'ekana lo ka yiesu geeha. <sup>22</sup> Ttu sá nna uttiba benneha nna ka anjeli ge Tata Do Yebáha nna betexíbake bie nna besine kwe'e Abraham-ni. Nubiyú utta xxatta geniha nna uttigabana nna bigatsibana. <sup>23</sup> Tti lo ruyú nubiyú utta xxatta geniha elha disa ata se'e ka benne chi uttiha, nianna bechidha loni nna bilenna Abraham-ni due idittu nna dúgaba Lázaro-ni kwe'ebie. <sup>24</sup> Nianna unnena idisa, rane: “¡Tata Abraham, gwatuachi lelu neti! Ud-helhachi Lázaro-na unnuha lo xubenáni inda nna itana etedibidhana lo lhusaa kini yalhá rate xxattaa xuaya lo gi-ni.” <sup>25</sup> Ttaka Abraham-ni nna bekabie geni, ree na: “Xi'ini to, bodhú lelu, lu gwa bedí baabalu nu tse tti udolu yiesi lo yuha; Lázaro-ni nna labí gwaria tsena nuní tti udona niha. Ttaka nnanna xen su lasila dona nii; lu nna elha disala ruyúlu. <sup>26</sup> Gwea nna ttu belha'a bartoba du lagwi geri'i. Laxkala

ka benne se'eke daka ta se'etu-ni ganna uinke tteke daka ta se'ele-na, labí aka geke. Nigaba ka benne se'eke daka ta se'ele-na, labí aka tteke daka nii.”<sup>27</sup> Nubiyú utta xxatta geniha nna rane: “Rinnabaa len kwinalu xa tata Abraham, edhelhachilu Lázaro-na eyyana lisi tata kiaha.<sup>28</sup> Niha se'e a gayu ka betsia. Eyyana kini sattixxi'enna kana gasina uinkana kini anágaba lakana bittu esiakana nii ata ruyú ka benne elha disa.”<sup>29</sup> Ttaka Abraham-ni nna rabie na: “Chiba denkana ka tisa bodha'an Moisés-ni lhe ka tisa bodha'an ka profeta ge Tata Do Yebáha lhe. Niha udo nagakani ge nu ra ka tisaha.”<sup>30</sup> Nubiyúha nna bekabina, rana: “Gwalí galenlu xa tata Abraham. Ttaka ganna ttu benne yatti eyaka banie nna ule'e lobie lenkana, godúbana ka nuha nna odaxxukana neda ge Tata Do Yebáha.”<sup>31</sup> Ttaka Abraham-ni nna rabie na: “Ki ge Moisés-ni lhe ge ka profetaha a ria lekani, anágaba ge ka benne chi uttiha abígaba tsia lekani geke, meskiba ganna eyaka benke sattixxi'akanie kana.”

## 17

*Gwaluyú gele ka ixú yiele uinle nu satsa  
(Mt. 18:6-7, 21-22; Mr. 9:42)*

<sup>1</sup> Jesús-ni nna rabie ka benne rudhetinieha:

—Teekiba ixú yie ka benne uinke ttu bixa nu satsa, ttaka ;karusi'iru nu dhi yiena ka benneha!

<sup>2</sup> Tserula ganna uxxigakana yienni ttu íyya ge mulinu nna udelhakana na lhe'e indatooha, a laa kila dhi yiena ttu ka nu abittu ra xxeni lekani se'e

nii ki uinkana nu satsa. <sup>3</sup> ;De nuha nna gwaluyú gele!

'Ganna ttu betsi to geri'i utsetsinna lu, utisa na nna ganna ennabana elha xen lasi lenlu, uxí elha xen lasi geni. <sup>4</sup> Ganna gasi lidú utsetsinna lu lhe'e ttu sá nna ganna iyába gasi lidúha isiana gana lu: "Chiba bodúna neti nna uxíchi elha xen lasi kia, labíru unia aná", la'ania nna lu uxíba elha xen lasi geni.

*Ka benne rudhetini Jesús-ni ráke bie: "Beni ki tsia tsitsiru leri'i Tata Do Yebáha"*

<sup>5</sup> Ka benne rudhetini Jesús benne anke Xxanari'iha, ráke bie:

—Beni kini ri'itu tsia tsitsiru letu Tata Do Yebáha.

<sup>6</sup> Jesús-ni nna ree ke:

—Ttibanka ttu besi to ge kuana muxtasa, ttu nuxka'a toru anka nuha, aníha-gaba nuná lebi'i, ganna ttuxka'a to tte tsia lele Tata Do Yebáha, la'ania nna gwakaba gele gale yaga du naa: "Belhupi ata yadalu-na nna ugía beyada lagwi indatooha." Yagaha nna gudobana tisa gele.

*Jesús-ni rigixxi'abie bí daa lo benne riben sinaha unie*

<sup>7</sup> 'Ganna ttixka nuxa ttule do ttu benne lo sina gele, ribenie lo ka yu geleha o rekie lo ka ku'una bia geleha, nna ganna chi resie rie lhe'exxiha nna, ¿si gweale benneha: "Aní bete bedoni kini golu yetta"? <sup>8</sup> Laaba ganna gálale benneha: "Beni irsea nna bedú tse kini ka'alu goa. Ax-taliba ganna chi bekoa, la'anialiba nna chi aka gelu dholu golu lhe i'iyalu lhe." <sup>9</sup> Anágaba nna nigaba a rugwele benneha ixkixaru de benie nu

chi raleha. <sup>10</sup> Anágaba lebi'i, ganna chi lhuxinle iyá nu chi ra Tata Do Yebáha uinle, la'ania nna innále: “Ri'itu benne abí dika ixúba ankatu, kumu benbatu nu daba lotu uintu.”

*Jesús-ni beyoni tsii ka benne raka latike yiesi nu tee láni lepra*

<sup>11</sup> Tti yu'u Jesús-ni neda die lhe'esi Jerusalén-ni nna utebie ata risá debaa Samaria-ni len Galilea-ni. <sup>12</sup> Nianna bisine lhe'e ttu yiesi to. Lhe'e yiesi toha nna biria tsii ka benne biyú raka yiesu latike. Yiesuha tee láni lepra. Ka nubiyúha idittuliba se'eke nna <sup>13</sup> uresi'ake, ráke Jesús-ni:

—¡Maestru Jesús, gwatuachi lelu ri'itu!

<sup>14</sup> Tti bilani Jesús-ni ka benneha, nianna ree ke:

—Gwaleyya nna gwatatso du arlo ka bixxudiha.

Laka deyu'uke neda deyyakeha nna betúa yiesuha latike. <sup>15</sup> Ttu ka benneha nna tti chi bilánie betúa yiesuha latie, nianna beyekie ribesi'abie, ree:

—¡Xxeniba ra le Tata Do Yebáha!

<sup>16</sup> Nianna bedú xibie arlo Jesús-ni, tuttíruba bere lobie lo yu begwebie benneha ixkixaru. Benne beyekie betebie ixkixaruha, benneha anke benne ge Samaria. <sup>17</sup> Jesús-ni nna rabie:

—¿Laaba tsiile nuná betúa yiesu-na latile? ¿Nála a jaa ka nuha? <sup>18</sup> ¿Si sunruba benne abittu anke benne Israel-ni gwa beyekie begwebie Tata Do Yebáha ixkixaru?

<sup>19</sup> Nianna ree nubiyúha:

—Bedú lii nna beyya lisiluha. Kumu de ugía lelu kia, de nuha nna gwa beyakabalu.

*Gasina aka ganna chi innabia Tata Do Yebáha  
(Mt. 24:23-28, 36-41)*

<sup>20</sup> Ka fariseo-ni unnaba tisakana Jesús-ni rákane:

—¿Nukala dhu lo Tata Do Yebáha innabie?

Lee nna bekabie gekani, ree:

—Tti innabia Tata Do Yebáha labí ilenri'i tti innabieha. <sup>21</sup> Laxkala labí aka ge ka benne innáke: “Gwaluyúrua, nii chi rinnabie”, o innáke “Niha chi rinnabie”, kumu lebi'i labí yule. Tata Do Yebáha, lagwi gebale chi do benneha rinnabie.

<sup>22</sup> Nianna ree ka benne rudhetinieha:

—Neti benne daya yebáha isia sá yalhá aka lele dhoa len lebi'i kwadiba ttu sá. Ttaka labí aka. <sup>23</sup> Nianna iria ka nu gákana le: “Niiba chi do benneha”, o “Niha-ba chi due.” Tti gákana le aníha, bittu tsiale lhe nigaba tanalhale kana lhe. <sup>24</sup> Kumu ttiba runi edha-na rigu'u chábana xiani itúba gwetsáha tti rapina, aníha-gaba neti benne daya yebáha ilá saaba ganna chi isia sá esiaya. <sup>25</sup> Ttaka lade'axa teeki uyú xxattaa elha disa lhe ku'u ni'a ka benne se'e nnanna neti lhe. <sup>26</sup> Akaba attiba uka tti udo Noé-ni, aníha-gaba aka ganna chi isia sá esiaya, neti benne daya yebáha. <sup>27</sup> Ka benne use'e la'ania utobake lhe u'uyabake lhe, anágaba nna betsába náke lhe beketigabake ka xi'inkeha lhe axtaliba tti bisia sá uta'a Noé-ni lhe'e barcuha, nianna bisá inda yiesi lo yu-ni nna iyábake uttike. <sup>28</sup> Nuha-gaba uka tti udo Lot-ni. Ka benne use'e la'ania utobake lhe u'uyabake lhe uyo'obake lhe betto'obake lhe anágaba údagabake lena lhe besigabake yo'o lhe. <sup>29</sup> Ttaka tti biria Lot-ni lhe'esi Sodoma-ni,



nianna biginni gi yebáha lhe azufre lhe. La'ania nna iyá xeaba ka benne se'e lhe'esiha betse'e loona. <sup>30</sup> Aníha-ba aka ganna chi isia sá esiaya, neti benne daya yebáha.

<sup>31</sup> 'Ganna chi bisia sáha nna benne doe iki yo'oha nna ganna se'e ka lo irsine lhe'e yo'oha, bittu eyadie kweabie ka nu se'e lhe'e yo'oha nna benne die lhe'exxiha, nna bittu eyye lhe'e yo'o geeha. <sup>32</sup> Gwalodhú lele ge nu gwate nuila ge Lot-ni. <sup>33</sup> Kumu benne rasinie ka satebie ttu bixa de etenalhe neti, benneha nnittilee, delába labí aka ben benneha arlo Tata Do Yebáha. Ttaka benne eria iki eria lebie etenalhe neti meskila bixa satebie, benneha nna gwalálee arlo Tata Do Yebáha.

<sup>34</sup> 'Neti ria le, ganna loolhaha chupa ka benne teke te'adhike lo ttúba ta'a. Ttúbie echea bie nna attubie nna odha'anbe. <sup>35</sup> Ganna chupa ka benne nuila yu'uke turo'o gwettu. Ttúbie echea bie nna attubie nna odha'anbe. <sup>36</sup> [Ganna chupa ka benne biyú se'eke lhe'exxiha, ttúbie echea nna attubie nna odha'anbe.]

<sup>37</sup> Nianna unnaba tisake bie, ráke:

—¿Gá aka nuní xa tata?

Lee nna bekabie geke, ree:

—Ttiba ruin ka chettu-na tti rilákinna ata tee ttu nimala yatti, niha ritupakana. Aníha-gaba ilenle ganna chi esiayaha.

## 18

### *Nuila bidabi nu ugía arlo xuedaha*

<sup>1</sup> Jesús-ni utixxi'anie ka benne rudhetinieha ttu tisa. Aníha benie kini utte dáke deki satía teeki

ilhapike tisa len Tata Do Yebáha, abittu edí lireke.

<sup>2</sup> Nianna tti rabie ke:

—Lhe'e ttu yiesi udo ttu xueda. Labí ria leni Tata Do Yebáha, nigaba a ria leni ka benne.

<sup>3</sup> Lhe'e yiesiha-gaba nna udo ttu benne nuila bidabi riabie lo xuedaha, ree na: “Benchi lo ni'a gelu xa tata. Beni elhuxtisi ge nu rutilha laniaha.”

<sup>4</sup> Isába gwadána, labí bedo naga xuedaha ge benne nuilaha. Ttaka delola nna belaba leni, rana: “Meskiba a ria lasia Tata Do Yebáha lhe meskiba a ria lasia ka benne lhe, <sup>5</sup> ttaka nuila bidabi-ni birula ribi'ettana, dudi dúbana. Tserula ganna udo nagaa geni. Uinlaa elhuxtisi geni kini ibi'ettana nii, kini guttisinna neti.”

<sup>6</sup> Jesús benne anke Xxanari'iha nna ree:

—Gwaluyúrugá bí ra xueda re satsa leniha.

<sup>7</sup> Anágaba Tata Do Yebáha, ¿katte gwalu abí gwa unie elhuxtisi ge ka benne chi bekwebie ki akake gebie, ganna ttixka ka benneha rela resába se'eke rinnabake lenie? Lhe anágaba, ¿katte gwalu abí gwa udiuba lebie aka lenie ke?

<sup>8</sup> Neti ria, nnela unie elhuxtisi ge ka benneha. Sun tteba nna neti benne daya yebáha ganna chi besiyaha, la'ania nna yiesi lo yu-ni, ¿si gwetexxakarua ka benne ria leke neti?

*Fariseo-ni lhe gwekixaha lhe rinnekana len Tata Do Yebáha*

<sup>9</sup> Ka nu rákana deki anakana ka nu ruin tseru tti adí ka benne de nuha nna rigu'u ni'akani ke, ka nuha nuní utixxi'ani Jesús-ni kana ttu tisa, benie kini utte dákana bí diani nu raka lebie kixxi'anie kanaha. Nianna ree:

<sup>10</sup> —Chupa ka nubiyú ugiákana ata do yotu ge Tata Do Yebáha gwalhapikana tisa lenie. Ttu nuha ankana fariseo, attu nuha nna ankana gwekixa. <sup>11</sup> Fariseo-ni nna udúna rana: “Tata Do Yebáha kia, ixkixaru rugwea kwinalu kumu neti labí ankaa tti anka adí ka benne. Ka nuná ankakana ubana lhe ankakana ka nu abittu runi nu dika ixú lhe. Anágaba nna ankakana ka nu rido lenkana ka nuila subi subi lhe nigaba labí ankaa tti anka gwekixa du naa. <sup>12</sup> Neti rutte ubina lhe'a chupa lidú lhe'e ttuxmanu lhe rute-gabaa len kwinalu tsii por ciento ge iyá belhiu ridía.” <sup>13</sup> Ttaka gwekixaha nna idittuliba duna nna nigaba a reyaxinna elhidha loni gwetsá. Sunruba rudhen ro'o lastoni nna rana: “¡Tata Do Yebáha kia, gwatuachi lelu neti de ankaa benne runi nu satsa!” <sup>14</sup> Netiru ria, gwekixaha gwa bixúla elha xen lasi ge nuha deyyana besinna lisini; ttaka fariseo-ni nna labí bixú elha xen lasi geni. Kumu ttu nu ruinna inná xxeni leni, elhida gaala Tata Do Yebáha nuha nna ttu nu rorexxa gaa leni nna uinlee kini inná xxeni leni.

*Jesús-ni unnabe len Tata Do Yebáha kini aka lenie ka nutoha*

*(Mt. 19:13-15; Mr. 10:13-16)*

<sup>15</sup> Bisingaba ka benne cheke ka nuto geke kini ixxua ná Jesús-ni ikikabi. Ttaka tti bilani ka benne rudhetinieha, nianna bedhaka disake ka benneha. <sup>16</sup> Nianna tti uxi Jesús-ni ke, ree ke:

—Gwalugwelha ka binto-na itakabi len neti. Bittu usunale, kumu ka benne runi tti runi ka binto-na, luesi ka benne-na nuná ralhake akake ka benne innabia Tata Do Yebáha ke. <sup>17</sup> Netiru

ria, ganna ttu benne abíba unie tti runi ttu nuto, ugwelhe innabia Tata Do Yebáha bie, benneha labí ake nu innabia Tata Do Yebáha bie.

*Ttu nubiyú tee xxatta belhiu geni unne lenna Jesús-ni*

*(Mt. 19:16-30; Mr. 10:17-31)*

<sup>18</sup> Ttu ka nu loni ge ka nu Israel-ni unnaba tisana Jesús-ni, rane:

—Maestru, lu ankalu benne tse. Utixxi'achu, ¿bí anka nu unia kini satíaba aka bania arlo Tata Do Yebáha?

<sup>19</sup> Jesús-ni nna bekabie geni, ree na:

—¿Beaka ralu deki ankaa benne tse? Lanú ttu benne do anke benne tse, sunruba Tata Do Yebáha anke benne tse. <sup>20</sup> Lu chiba yulu nu boka'an Tata Do Yebáha uinri'i tti ree: “Bittu dho lenlu nu abittu anka latselalu. Bittu akalu nu runi elhutti lhe bittu lhanalu lhe. Anágaba nna bittu kwentaba usialu iki ttu benne deki benie ttu bixa lhe anágaba nna tsia lelu ka tata nan gelu lhe.”

<sup>21</sup> Nubiyúha nna rane:

—Ttili ankaa kwitiha gwa rudobaa tisa ge iyá nuná.

<sup>22</sup> Tti biyieninie nu ra nuha, nianna bekabie geni, ree:

—Sa riyasabalu uinlu attu nu uinlu: betto'o iyá nu tee gelu nna utidhi belhiu ge nu betto'oluha nna begwe ka benne abittu geke tee. Ganna aníha uinlu nna gwattaba elha tse gelu yebáha. La'anialigaba nna chinka utá, tenalha neti.

<sup>23</sup> Ttaka tti biyienin nubiyúha nu reeha, nianna yalhá si'i bedúna leni kumu yalhá tee

xxatta geni. <sup>24</sup> Tti bilani Jesús-ni deki si'iba udú le nubiyúha, nianna ree:

—¡Gáruba tsitsi anka ki isin ka nu tee gekinna akakana benne innabia Tata Do Yebáha!

<sup>25</sup> Adírula satti ga'a ttu camellu lhe'e yieru do xan ttu yoxa attichula ttu nu tee geni ga'ana akana nu innabia Tata Do Yebáha.

<sup>26</sup> Ka nu biyienkinna nu reeha nna rákana:

—Ganna aníha nna, ¿nú dhaana esin lenna Tata Do Yebáha?

<sup>27</sup> Jesús-ni nna bekabie geni, ree:

—Nu labí ridaa ka benne se'e yiesi lo yu-ni uinke, Tata Do Yebáha nna gwa ridaabe runie nuha.

<sup>28</sup> Pedro-ni nna rane:

—Ri'itu chiba bedhá ikitu iyá nu tee getu nna danalhatu lu.

<sup>29</sup> Labie nna bekabie gekani, ree:

—Netiru ria le, nuxaba benne ganna chi bedhá ikie yo'o geeha lhe nuila geeha lhe ka betsieha lhe ka tata nan geeha lhe o ka xi'inieha de anke benne rinnabia Tata Do Yebáha, <sup>30</sup> benneha xxenirula dhie yiesi lo yu-ni nnanna, nu si daa nna satíaba aka benbie arlo Tata Do Yebáha.

*Jesús-ni beyonna libela rigixxi'abie deki teeki uttikane*

*(Mt. 20:17-19; Mr. 10:32-34)*

<sup>31</sup> Jesús-ni uxie ka benne tsi'inu (12) rud-hetinieha attu ta subi, nianna ree ke:

—Nnannaligaba nna tsiari'i lhe'esi Jerusalén-ni ata aka iyá nu ra lo ka yetsi ben ka profeta ge Tata Do Yebáha tti utixxi'ake gasina teeki satea, neti benne daya yebáha. <sup>32</sup> Kumu teeki taga'akana neti lo ná ka nu abittu anakakana

nu Israel nna udhaka xiikana neti lhe ulisakana neti lhe. Anágaba uttuttu xxenkani loa lhe<sup>33</sup> ukulhakana neti lhe uttikana neti lhe. Ttaka ganna chi beyonna ubisaha nna eyaka benbaa.

<sup>34</sup> Ka benne tsi'inuha (12) nna labí yuke bixa ge nuha rinnebie, kumu tee ttu nu rusuna na kini abittu rite dákanie nu reeha.

*Jesús-ni bedhalie iyya lo ttu benne anke lo xua (Mt. 20:29-34; Mr. 10:46-52)*

<sup>35</sup> Uka nuha, tti chi dabiga Jesús-ni isine lhe'esi Jericó, ro'o nedaha do ttu benne anke lo xua rinnabe belhiu. <sup>36</sup> Tti biyieninie rite xxatta ka benne lo nedaha, nianna tti unnaba tise bixa nuha raka. <sup>37</sup> Ka benneha nna ráke bie:

—Jesús ge Nazaret-niba nuná ute nii.

<sup>38</sup> Benneha nna uresi'a ttebe, ree:

—¡Jesús benne datia David, gwatuachi lelu neti!

<sup>39</sup> Ka benne daneruha nna rudhaka disalake benneha ki eyaka siibie, ttaka benneha nna adírula idisa uresi'e, ree:

—¡Benne datia David, gwatuachi lelu neti!

<sup>40</sup> Nianna uleda Jesús-ni nna udhelhe kini gwaxxíkana benneha. Tti chi bisine ata du Jesús-ni, nianna unnaba tise benneha, ree bie:

<sup>41</sup> —¿Bí raka lelu udhaka lu?

Benne lo xuaha nna bekabie, ree:

—Tata to kia, raka lasia eyali ka iyya loa-ni.

<sup>42</sup> Jesús-ni nna rabie benneha:

—¡Bedhali ka iyya lolu-na! Kumu de ugía lelu nna gwa beyakabalu.

<sup>43</sup> Looraha nna belá ttebanie nna gwanalha ttebe Jesús-ni. Nianna rinnebie ree:

—¡Xxeniba ra le Tata Do Yebáha!

Iyágaba ka benne danalhaha, tti bilákanie nu ukaha nna rágabake:

—¡Xxeniba ra le Tata Do Yebáha!

## 19

### *Zaqueo-ni raka leni uinbiana Jesús-ni*

<sup>1</sup> Tti uta'a Jesús-ni lhe'esi Jericó-ni nna yu'ubie neda ki ttebie lhe'esiha. <sup>2</sup> Niha do ttu nubiyú tee xxatta geni lána Zaqueo, ankana xxana ka gwekixa. <sup>3</sup> Nubiyúha raka leni uinbiana Jesús-ni, ttaka labí re'eyuna ilenna, kumu de danalha xxatta ka benne. Gwea nna Zaqueo-ni ankabana ttu benne gwexxa, labí ankana baganti. <sup>4</sup> Laxkala de nuha nna bexunnina uneruna nna ugwapina lo ttu yaga du gaxxaba ata tte Jesús-ni kini ilenne. <sup>5</sup> Tti bisin Jesús-ni ata donaha, nianna bechidha loe gwetsá nna rabie na:

—Zaqueo, beyadi dhuti, kumu nnolha teeki eya'anaa lisiluha.

<sup>6</sup> Nianna gwexunniba beyadi Zaqueo-ni nna ittaba du leni, belabina Jesús-ni lisiniha. <sup>7</sup> Tti bilani ka nu danalhaha iyá nu ukaha, nianna iyábakana udulokana rinnekana ge Jesús-ni, rákana:

—Gwaluyúrugá, lisi ttu nu runi tulhaba nuná gwaya'anna.

<sup>8</sup> Zaqueo-ni nna udú lilana rana Jesús benne anke Xxanari'iha:

—Biyúrugá xa tata, neti ugwea ka benne abittu geke tee salhe nu tee kia-ni lhe anágaba lhe ganna si nuxa ttu benne chi bekixaa yani, ttapa lisiala odekia geke.

<sup>9</sup> Jesús-ni nna rabie na:

—Nasá chi bisa sá odilá Tata Do Yebáha ka benne se'e lhe'e yo'o-ni, kumu nubiyú du nii ankagabana benne datiana tata Abraham-ni.

<sup>10</sup> Kumu neti, benne daya yebáha, daya ugila ka benne abittu chi se'eke lo neda ge Tata Do Yebáha lhe daya gwedilaa ke lhe.

*Jesús-ni rigixxi'abie ge ka benne bedháke belhiu ge xxanakeha*

<sup>11</sup> Iki de chi biyienin ka benne iyá nuní, nianna unneru Jesús-ni utixxi'anie ke ttu tisa. Aníha benie kini utte dáke bí diani nu raka lebie kixxi'anie keha. Kumu de chi dubie gaxxaba Jerusalén-ni, de nuha nna rakakanie ganna chi tteba innabia Tata Do Yebáha. <sup>12</sup> Aníha uka nna rabie ke:

—Ttu nubiyú ra xxeni leni diana attu yiesi dittu taxxí ladini kini innabiana. Iki deliba chi taxxí ladiniha, la'anialiba nna tti eyekina esinna.

<sup>13</sup> Tti lani tsianaha nna uxina tsii ka nu riben sina geniha. Tu tulapaba begwena ka nuha belhiu nna rana kana: “Gwaltseki gwalurixxi len belhiu kia-ni laka neti esiaya.” <sup>14</sup> Ttaka ka benne lhe'esi geniha nna ritisibakanie nubiyúha.

Nianna udhelhake ttu chupa ka nu ugíakana ata dia nubiyúha kini gákana ka uxtisi se'e niha: “Labí raka letu innabia nuná ri'itu.” <sup>15</sup> Tti beyeki nubiyúha besinna iki de chi gwaxxí ladiniha,

nianna tti udhelhana gwalisakana ka nubiyú bodha'anna lenkana belhuha, kini uyúna ttxa belhiu chi ulhasu ttu ttukana. <sup>16</sup> Tti bisin nu uxí belhiu sisi'a tteha, nuha nna rana: “Tata xisi to, belhiu beteluha chi ugwanina a tsii libe.”



17 Lana nna rana nuha: “Tseba benlu. Lu ankalu ttu benne riben tselu sina. Kumu de gwa biyú tsitsibalu nu latti betea lenluha, de nuha nna utea lenlu kini innabialu tsii ka yiesi.”

18 Tti bedesina nu berupaha nna redenána: “Tata xisi to, belhiu beteluha chi ugwanina a gayu.”

19 Nubiyúha nna redeagabana nuha: “Anágabalu innabiagabalu gayu ka yiesi.”

20 Nu beyonnaha nna bisinna, rana: “Tata xisi to, ne belhiu beteluha tee nii. Utua tsebaa nuní. Lhe'e ttu lari toba ulu'a na, 21 kumu usibati gelu. Lu ankalu ttu benne ruin disalu kumu redílu nu labí betelu lhe redílu lena ata labí údalú lhe.”

22 Nu rinnabiaha nna rana: “¡Aaluxa nu ren sina re satsa leni! La len ka tisa gelu-naba, kuaya bala'ana gelu. Ki ganna gwa yúbalu deki ankabaa ttu nu ruin disa, redíbaa nu labí betea lhe redíbaa lena ata labí údaa lhe, 23 ganna aníha nna, ¿beakala nna a gwadha'anlu belhiu kia-na

lhe'e banku kini anáchu ganna chi besiaya nna odekilu na itupa len xi'inni?”

24 Nianna tti rana ka nu se'e niha: “Gwalikua belhiu-na lo nání nna gwalute nuná len nu bedienna a tsii libe iki belhiu-na.”

25 Ka nuha nna rákana na: “Ttaka nuní chiba den nuní a tsii xa tata.”

26 Ttaka nu rinnabiaha nna rana: “¿Bíla ge ria? Benne gwa biyú tsitsie nu bete Tata Do Yebáha, dhi chiettirula benneha; ttaka nu abittu biyú tsitsina

nu bete benneha nna iyála nu chi tee geniha, etua. 27 Ttaka ka nu ritisikinna neti, ka nu abittu raka lekani akaa nu innabia gekani, aní gwataxxí kana nna gwalutti kana arloa.”

*Jesús-ni uta'abie lhe'esi Jerusalén-ni  
(Mt. 21:1-11; Mr. 11:1-11; Jn. 12:12-19)*

<sup>28</sup> Iki de chi beyaka unne Jesús-ni nuha, nianna uneru ttebe arlo ka benne nna ugwapibie die lhe'esi Jerusalén-ni. <sup>29</sup> Tti chi bisine gaxxaba ro'esi Betfagé lhe Betania lhe, gaxxaba xan i'iya ata daa ka ya olivuha, nianna udhelhe chupa ka benne rudhetinieha, <sup>30</sup> rabie ke:

—Gwaltsia lhe'e yiesi to re arlori'i-ni. Tti ga'ale ro'esi to-na nna taxxakale nalha ttu burru kwiti to nu labí chi udo ttu benne kwe'eni. Gwalidhasi yienni nna gwaltá lenna. <sup>31</sup> Ganna nuxa innaba tisana le innána: “¿Beaka ridhasile yien nuná?”, gwaligá na: “Jesús benne anke Xxanari'iha, benneha-ba riyasanie nuní.”

<sup>32</sup> Ka benne rudhetinieha nna dia ttebake nna gwaxxakabake atti tteba ra Jesús-ni. <sup>33</sup> Tti chi yu'uke ridhasike yien burru toha, nianna bisin ka benne anka xxana nuha nna unnaba tisake ka benneha, ráke:

—¿Beakala ridhasile yien burru to-na?

<sup>34</sup> Lake nna bekabike ge ka benneha, ráke:

—Kumu Jesús benne anke Xxanari'iha-ba riyasanie nuní.

<sup>35</sup> Nianna decheke burru toha ata du Jesús-ni nna tti bedelhake ka xokeha kwe'e bia toha nna bedoke Jesús-ni kwe'eba. <sup>36</sup> Kua diaba Jesús-ni risile nna ka benne daneruha diake ritsilake ka xokeha lo nedaha. <sup>37</sup> Tti chi isinke chadike liaxu iki i'iya ata daa ka ya olivuha, nianna iyába ka benne danalhake Jesús-ni, de elha gwedeaka lasi nna uduloke uresi'ake idisa rinneke ge nu tse ruin Tata Do Yebáha de rilákanie iyá ka milagru chi ben Jesús-ni. <sup>38</sup> Nianna ráke:

—¡Karubáru benne rinnabia udhelha Tata Xisiha! ¡Yebáha-li dabie nna use'e tsebie ka benne! ¡Xxeniba ra le Tata Xisiha doe yebáha!

<sup>39</sup> Ttaka ttu chupa ka fariseo, ka nu selakana lhe'e ka benne danalhaha nna rákana Jesús-ni:

—Maestru, bedhaka disa ka nu rudhetinlu-ni.

<sup>40</sup> Ttaka Jesús-ni nna bekabilee gekani, ree:

—Neti ria, ganna ka nuní eyaka siikana, la'ania nna ka íyya-nala kwesi'akana.

<sup>41</sup> Tti chi bisine gaxxaba Jerusalén-ni, nianna uresie geni tti bilánie na, <sup>42</sup> nianna rabie na:

—¡Eru geni xa lhe'esi Jerusalén! Anágaba lu, kwadila nasá tte denlu gasina uinlu kini dho tselu len Tata Do Yebáha. Ttaka nnanna ttiba ttu nu yaya loni ankalu labí rite denlu. <sup>43</sup> Isia sá ka nu abittu raka uyúkana luha ebi'i nookana lu nna abi'iba kwe'elu tse'ekana. Tse'ekana daka arlolu lhe tse'ekana daka kwe'elu utiakana. <sup>44</sup> Tuttíruba kweki tinnikana lu, itupa lenlu ka benne se'e lhe'elu-na. Niruba attu íyya laa odha'ankana iki luesini, kumu lu de labí betabinlu tti bisia Tata Do Yebáha odilábie lu.

*Jesús-ni bochesue ka nu yu'u gwetto'o lali'a yotuha*

*(Mt. 21:12-17; Mr. 11:15-19; Jn. 2:13-22)*

<sup>45</sup> Nianna uta'a Jesús-ni lali'a ge yotuha nna uduloe bochesue ka nu yu'u gwetto'o niha.

<sup>46</sup> Nianna ree kana:

—Tata Do Yebáha lo ka yetsi geeha ree: “Yo'o kia-ni ixúe ki ilhapi ka benne tisa len neti”; ttaka lebi'i nna ttiba “belea ata yu'u ka ubanala” chi benle yotu-ni.

<sup>47</sup> Ttu ttu sába rule'eni Jesús-ni ka benne ro'o yotuha, ttaka ka nu loni ge ka bixxudiha lhe ka nu rule'ekinna ka benne nu ra lo bia bennabi bodha'an Moisés-ni lhe anágaba ka nu ra xxeni lekani ge yiesiha, rekikana regila lekani gasina uinkana kini uttikane. <sup>48</sup> Ttaka lakana labí reselakinna gasina uinkana, kumu iyába ka benne rudo tsitsiba nagake ge nu reeha.

## 20

*Jesús-ni rinnaba tisakane nú begwene lo neda ki runie ka nu runieha*  
(Mt. 21:23-27; Mr. 11:27-33)

<sup>1</sup> Uka nuha, ttu sá laka du Jesús-ni ro'o yotuha rule'enie ka benne lhe rigixxi'anie ke ka tisa tse lhe, nianna tti bisin ka nu loni ge ka bixxudiha, dia lenkana ka nu rule'ekinna ka benne nu ra lo bia bennabi bodha'an Moisés-ni lhe ka benneola ge ka nu Israel-ni lhe, <sup>2</sup> rákane:

—Utixxi'en ri'itu, ¿Bí lo neda nuná rapalu ki ruinlu aná? ¿Nú betena lo neda gelu ki raka gelu ruinlu aná?

<sup>3</sup> Jesús-ni nna bekabie gekani, ree:

—Anágaba neti innaba tisagabaa le ttu bixa nna gwalinná sanga: <sup>4</sup> ¿nú iki biria ki begadi Juan-ni ka benne inda? ¿Si iki Tata Do Yebáha ak? ¿Iki ka benne se'e yiesi lo yu-ni ak?

<sup>5</sup> Lakana nna udulo ttebakana rinne len lue-sikani, rákana:

—Ganna ekabiri'i innári'i: “Tata Do Yebáha-ba udhelhe benneha”, la'ania nna innána: “¿Beakala a ugía lele gebie ganna?”

<sup>6</sup> Ttaka ganna innári'i: “Ka benneba udhelhake benneha”, la'ania nna ebi'i nooba ka benne ri'i

nna usiake ri'i íyya, kumu iyábake chiba yuke deki Juan-ni uke ttu profeta ge Tata Do Yebáha.

<sup>7</sup> Aníha uka nna bekabikana rákana:

—Labí yutu nuxa udhelhana benneha.

<sup>8</sup> Nianna ra Jesús-ni kana:

—Anágaba neti bittugaba kixxi'ania le nú rutena lo neda kia ki runia aní.

*Jesús-ni rigixxi'abie ge ka nu ruin satsa riben lo yuha*

*(Mt. 21:33-44; Mr. 12:1-11)*

<sup>9</sup> Nianna udulo Jesús-ni utixxi'anie ka benne se'e niha ttu tisa. Aníha benie kini utte dáke bí diani nu raka lebie kixxi'anie ke. Nianna tti ree:

—Ttu nubiyú beyadana ka ya uva lo yu geniha.

Nianna bete gannana yuha len ttu chupa ka nu kwenkana sina lo nuha. Nianna tti biriana diana isá lhe'e attu yiesi dittu. <sup>10</sup> Tti chi bisia sá rexú uvaha nna udhelhana ttu nu riben lo sina

geniha ki tsia nuha tannabana len ka nuha kini utekana nu ralhana dhina ge lo yuha. Ttaka ka nu riben lo yuha nna uyalakana nubiyúha nna

suná anába ankana bedhelhakana na. <sup>11</sup> Nianna bededhelha xxana yuha attu nu riben sina geniha. Ttaka aníha-gaba bododhakakana nuha,

uyagabakana na lhe belisa xxattakana na lhe, nianna suna anába ankana bededhelhakana na.

<sup>12</sup> Nianna tti bededhelhana nu beyonnaha, ttaka ka nu riben lo yuha nna nuha-gaba bododhakakana nuha, bedeongabakana nuha gwe,

nianna tti bebeakana nuha ro'o yuha.

<sup>13</sup> 'Ukachiba nna ra xxana yuha: “¿Bíla anka nu unia ganna? Nnanna nna idhelhabaa xi'ini biyúa-ni, benne rakati gee-ni, ni kina gaa

benne-niligaba gweyya lekanie.” <sup>14</sup> Ttaka tti bilani ka nu riben lo yuha xi'in biyúniha, nianna ra luesikani: “Nu daa-ni nuní eya'anna lo yu-ni. Uttiri'i na kini eya'anri'i len yu-ni.” <sup>15</sup> Aníha uka nna uleakana benne kwitiha ro'o yuha nna bettikane.

Nianna ra Jesús-ni:

—Nnanna nna, ¿si gwa yule bí udhaka xxana ka ya uvaha ka nu riben lo yu geniha? <sup>16</sup> ¿Laaba ganna tsiabana nna tettina ka nuha, nianna tti utena yu geniha len ka benne subi?

Tti biyienin ka benne se'e niha nu reeha, nianna ráke:

—¡Gaxa laa innákaba Tata Do Yebáha!

<sup>17</sup> Ttaka Jesús-ni nna belannie loke, nianna tti ree ke:

—Ganna aníha nna, ¿bíla diani nu ra lo ka yetsi ge Tata Do Yebáha ata dia ra:

Íyya nu ulu'u ni'a ka nu rukuakana yo'oha, íyyaha-la nuha chi bisinna beyakana nu rixúru? <sup>18</sup> Laxkala nuxaba benne ganna ibixxie iki íyya nu ulu'u ni'akaniha, tuttíruba iyuya benneha lhe anágaba ganna ttixka íyyaha iginnina iki ttu benne utsutsa tána benneha.

*¿Si teeki kixa ka benne belhiu len César nu rinnabia ge Roma-ni?*

*(Mt. 21:45-46; 22:15-22; Mr. 12:12-17)*

<sup>19</sup> La'ania tteba runi ka nu loni ge ka bixxudiha lhe ka nu rule'ekinna ka benne nu ra lo bia bennabi bodha'an Moisés-ni, ruinkana udaxxukana Jesús-ni kumu yúbakana labakana

nuha betanie tisa unneeha. Ttaka labí beyax-akinna udaxxukane kumu rasibakinna ge ka benne.

<sup>20</sup> Nianna tti udhelhakana ttu chupa ka nu tsiakana gwelhatsi, ukadiba uin ka nuha deki benne tseba ankakana, nianna innaba tisakane ge ttu bixa. Aníha uinkana kini ibixxinie bixa innábie, kini aníha-chu nna tee ro'okani taga'akane lo ka uxtisi. <sup>21</sup> Ka nuha nna unnaba tisakane, rákana:

—Maestru, ri'itu yutu deki nu rinnelu-na lhe nu rule'elu-na lhe tseba anka nuná. Anágaba nna ttúba rulannilu iyába ka benne. Lúligaba nna rule'enlu ka benne neda ge Tata Do Yebáha attiba ankaba geni. <sup>22</sup> Nnanna nna unáchu, ¿si gwa ga'anaba kixari'i belhiu nu daa lori'i kixari'i len César nu rinnabia xeniha ak; abittuba ak?

<sup>23</sup> Ttaka Jesús-ni nna ute dábanie ge nu rulha lekani udhakakaneha, nianna tti ree kana:

<sup>24</sup> —Gwalule'echuin neti ttu belhiu. ¿Nú lo nuná du lo belhiu-na lhe nú lá nuná dia xani'a nuná lhe?

Lakana nna bekabikana, rákane:

—Lá César-niba nuní dia lo nuní.

<sup>25</sup> Nianna rabie kana:

—Ganna aníha nna, gwalugweba César-ni nu ankaba geni. Anágaba Tata Do Yebáha, gwalugwegabe nu ankaba gebie.

<sup>26</sup> Nianna siiba beyakakana kumu de labí udaakana kweakane tisa arlo ka benne se'e niha. Bebanalakinna ge nu bekabie gekaniha.

*Ka saduceo-ni rinnaba tisakana Jesús-ni ganna gwalí reyaka ben ka benne chi uttiha (Mt. 22:23-33; Mr. 12:18-27)*

<sup>27</sup> Iki de nuha nna ubiga ttu chupa ka saduceo ata du Jesús-ni. Ka nuha labí ria lekani deki gwa reyaka benba ka benne chi uttiha. <sup>28</sup> Nianna tti unnaba tisakane, rákana:

—Maestru, Moisés-ni bodha'ane lenri'i lo yetsi, ree: “Ganna ttu nubiyú do lenna nuila, nianna gattina nna anúba xi'inni aka len nuila geniha, la'ania nna teeki edí betsiniha nuila bidabiha kini ka xi'inni aka len nuilaha nna ayakakana ttisidiba xi'in benne chi uttiha.”

<sup>29</sup> Ttu lidú use'e gasi betsi ka nubiyú. Nu xxeniha betsába náni nna, ttaka uttibana nna lanú xi'inni uka len nuila geniha. <sup>30</sup> Nianna bedí nu berupaha nuilaha, ttaka bedeatigaba nuha nna anúgaba xi'inni bodha'anna. <sup>31</sup> Nuha-gaba bedeonni nu beyonnaha nna aníha-gaba bedeonni adí ka nuha. Beyába iyá gasi betsikani utti nna anúgaba xi'inkani uka len nuilaha. <sup>32</sup> Iki de nuha nna uttigaba nuilaha. <sup>33</sup> Nnanna nna unáchu, ganna chí bisia sá eyaka ben ka benne chi uttiha nna, ¿núla nuila gekani eyaka nuilaha ganna, ki iyába gasikana udo lenkana nuha?

<sup>34</sup> Jesús-ni nna bekabie, ree kana:

—Ka nu se'e yiesi lo yu-ni rutsába náكاني lhe ruketibakana ka xi'inkani lhe. <sup>35</sup> Ttaka ka nu ralhakana tse'ekana attu yiesi lo yuha lhe ralhakana eyaka benkana tti eyaka ben ka benne chí uttiha, ka nuha labíru dina otsá náكاني, ni-gaba uketikana ka xi'inkaniha. <sup>36</sup> Aní aka kumu labíru aka gattikana attu libe. Eyakabakana attiba anka ka anjeli ge Tata Do Yebáha lhe akagabakana ka xi'in Tata Do Yebáha de beyaka benkana lo elhuttiha. <sup>37</sup> Kwinagaba Moisés-ni tti



bilánie rite xxiti bisiha, la'ania benna liibie deki ka benne chi uttiha gwa reyaka benbake, kumu ree: “Tata Xisiha anke Diosi ge Abraham-ni lhe ge Isaac-ni lhe ge Jacob-ni lhe.” <sup>38</sup> Laxkala Tata Xisiha labí anke Diosi ge ka benne yattiha; labie anke Diosi ge ka benne anka bani. Kumu len benneha iyába ka benne gwanka benke.

<sup>39</sup> Nianna tti unne ttu chupa ka nu rule'ekinna ka benne nu ra lo bia bennabi bodha'an Moisés-ni nna rákane:

—Tseba anka nu ralu-na, xa maestru.

<sup>40</sup> Nianna labíru beyaxakinna bixa innaba tisakane.

*David-ni uke xutto Cristuha*

*(Mt. 22:41-46; Mr. 12:35-37)*

<sup>41</sup> Jesús-ni nna unnaba tise kana, ree:

—¿Galasina nna ra ka benne deki David-ni ukana xutto Cristuha? <sup>42</sup> Ki kwinaba David-ni rana lo yetsi ata dia ka Salmo-na:

Tata Do Yebáha ree Cristu benne runie neti mandaduha:

“Utá udo daka ná ben kia.

<sup>43</sup> Niiba dholu axtaliba ganna chi bese'a ka nu abittu raka uyúkana lu, kini ulealu ikikani.”

<sup>44</sup> Ki ganna David-ni daneruna Cristuha, ¿galasina nna rálana benneha: “Lu ankalu benne ruinlu neti mandadu”?

*Jesús-ni rinnebie ge ka nu rule'ekinna ka benne nu ra lo bia bennabiha*

*(Mt. 23:1-36; Mr. 12:38-40; Lc. 11:37-54)*

<sup>45</sup> Iyába ka benne se'e gwedo nagaha biyienkanie ra Jesús-ni ka benne rudhetinieha:

<sup>46</sup> —Gwaluyú gele ka uinle tti ruin ka nu rule'ekinna ka benne nu ra lo bia bennabi bodha'an Moisés-ni, kumu lakana ru'u lekani rekikana len ka xalho ttuni. Gwea nna raka lekani latsiru inne ka benne tti gake kana padi-uxi atti reti'ake kana lo ka neda-na. Anágaba nna ru'ugaba lekani tse'ekana lo ka xxila tseru se'e lhe'e ka yo'o ata rudhetiri'i ka tisa ge Tata Do Yebáha lhe ru'ugaba lekani kwiakana ata anka tse tti riakana go yetta. <sup>47</sup> Gweala nna riguakana ka yo'o ge ka nuila bidabi-na nna ukadiba rise'ekana isá rilhapikana tisa len Tata Do Yebáha. Aníha ruinkana ki ule'e deki gwankabakana benne tse. Ka nuná elha disa tsitsirula ugwe Tata Do Yebáha kana.

## 21

### *Belhiu ulu'u benne nuila bidabiha* (Mr. 12:41-44)

<sup>1</sup> Jesús-ni bechidha lobie nna bilánie ka nu tee gekaniha rigu'ukana belhiu lhe'e ata ru'u úna ge Tata Do Yebáha. <sup>2</sup> Bilágabanie ttu benne nuila bidabi abí gebie tee nna rigu'ubie chupa ka belhiu to, ka nu lattiruba lidhakakani tee. <sup>3</sup> Nianna ree:

—Neti gwalígati xa, benne nuila bidabi-na ixenirula daka belhiu ulu'u benne-na attichula nu chi ulu'u iyá ka nu chi rigu'u belhiu-na. <sup>4</sup> Kumu iyába ka nuná nu rexxaruba nuná rigu'ukana; ttaka benne nuila-ni, anke benne abí gebie tee nna ulu'ube iyába belhiu tee gebie nu dika ixúnie ki aka benie.

*Jesús-ni rigixxi'abie isia sá tse'e looba yotuha  
(Mt. 24:1-2; Mr. 13:1-2)*

<sup>5</sup> Ttu chupa ka nu se'e niha rinnekana rákana deki latsiruba rule'e ka íyya kua yotuha lhe adíru ka nu rule'e latsitoru taa latiniha lhe. Nianna ra Jesús-ni kana:

<sup>6</sup> —Isia sá iyába nu rilenle-ni tse'e looba nuní; niruba attu íyya laa eya'anna iki luesini. Itúbana tse'e lo.

*Jesús-ni rigixxi'abie gasina aka atti lani lhuxa  
yiesi lo yu-ni  
(Mt. 24:3-28; Mr. 13:3-23)*

<sup>7</sup> Nianna unnaba tisakana Jesús-ni, rákane:

—Maestru, ¿nuka aka nuní? ¿Bí aka ki unna liina deki nuní chi dabigana aka?

<sup>8</sup> Jesús-ni nna bekabie, ree kana:

—Gwaluyú gele, bittu tsia lele ge ka nu reki naa. Kumu íxe ka nu ísiakana nna uinkana ttisidiba netiba nuha ankakana, nianna tti innákana: “Neti ankaa Cristu” lhe innákana: “Chiba dabigana lhuxa yiesi lo yu-ni.” Lebi'i nna abittu tsia lele gekani tti innákana aníha.

<sup>9</sup> Ganna chi tsu'u nagale deki chi yu'u ka yiesi ritilha len luesikani lhe se'e ka benne rese'e disakana lo ka uxtisi gekaniha lhe, lebi'i bittu gasinle, kumu lade'axa teeki aka aní. Ttaka nna laa la'ania ttega nuha chi isia lhuxa yiesi lo yu-ni.

<sup>10</sup> Rárugabe kana:

—Ka yiesi elha-na ebi'i noo luesikani ttilhakana lhe ka nu rinnabia-na ebi'i noo luesikani lhe. <sup>11</sup> Anágaba nna gattibani yiesi lo yu-ni ixú xxatta lhe ga'a ubina lhe isagwe lhe. Anágaba

nna ilágabin ka benne bixa aka yebáha, nu uinna ki gasikanie lhe ebanakanie lhe.

<sup>12</sup> 'Ttaka tti lani aka iyá nuní, lebi'i chila udaxxukana le lhe chila dhu nookana le lhe anágaba lhe taga'akana le lo ka xueda se'e lhe'e ka yo'o ata rudhetiri'i ka tisa ge Tata Do Yebáha, nianna kixxakana le lhe'e lisiyya lhe anágaba utso dúkana le arlo ka nu rinnabia xeni. Aníha udhakakana le kumu de ria lele neti. <sup>13</sup> Aní satele kini lebi'i gapale lo neda kixxi'enle kana kia. <sup>14</sup> Gwaluin doelha bittu uchacha ikile bixa ekabile gekani, <sup>15</sup> kumu neti gutebaa tisa len lebi'i lhe elha rieni nu dika ose'e siina iyá ka nu ritisikinna leha ki abittu ese'e disakana lole. <sup>16</sup> Axtagaba ka xxudileha lhe ka betsileha o si ka benne raka luesileha o ka nu se'e tse lenleha taga'akana le lo ná ka uxtisi nna ttu chupale nna uttikana le. <sup>17</sup> Anágaba iyába ka benne se'e yiesi lo yu-ni utía di lekani le de ria lele neti. <sup>18</sup> Ttaka niruba ttú itsa ikile, labí tse'e loo nuná. <sup>19</sup> ¡Ganna lebi'i tse'e tsitsile, gwa daabale odilá Tata Do Yebáha le!

*Jesús-ni rigixxi'abie deki chi tteba dabigana tse'e loo lhe'esi Jerusalén-ni*

<sup>20</sup> 'Ganna chi ilenle ebi'i ka soldaduha abi'iba kwe'e Jerusalén-ni, la'ania nna chi yule deki chi tteba duna tse'e loona. <sup>21</sup> La'ania nna lebi'i, ata se'ele daka Judea-ni, gwaluxunni nna gwaltsapi iki ka i'iya sia niha. Ata se'ele Jerusalén-ni, nna gwaliria lhe'e yiesiha nna ata se'ele lhe'exxiha nna abittu eyekile tata'ale lhe'esaha. <sup>22</sup> Kumu la'ania elha disa tsitsi nuha uyúle, ganna chi aka iyá nu chi ga'anna lo ka yetsi ge Tata Do Yebáha.

<sup>23</sup> ¡Gwalíchiru le ka benne nuila ata nuja xi'inke la'ania lhe denke ka nuto rasi lhe! Kumu elha disa tsitsi nuha isia itúba lo yu geri'i-ni. La'ania nuha Tata Do Yebáha riguabie elha rise'iki geeha len ka benneha. <sup>24</sup> Ttu chupa ke uttikana ke len espada nna adíke nna udaxxukana ke nna echekana ke lhe'e iyába ka yiesi dittu. Ka nu dittuha nna utse'e lookana Jerusalén-ni axtaliba ganna chi gwadona sá chi ga'anani Tata Do Yebáha satekana ttu bixa.

*Jesús-ni rigixxi'abie gasina aka atti chi esiabie yiesi lo yu-ni*

*(Mt. 24:29-35, 42-44; Mr. 13:24-37)*

<sup>25</sup> 'La'ania nna aka ttu bixa lo tatubisa-na lhe lo nanto beo-na lhe anágaba lo ka beli-na lhe. Ka benne se'e yiesi lo yu-ni nna aka télakanie lhe gasikanie de iyienkanie tsu'u be xxatta lo indatooha de radha xxatta loni. <sup>26</sup> Axtaba echulhakanie de elha rasi ge nu aka yiesi lo yu-ni, kumu ka beli-na lhe adíru ka nu ra xxeni lekani se'e gwetsáha igubibakana. <sup>27</sup> La'ania nna neti benne daya yebáha, iláni ka benne neti dedáya yebáha lhe'e ttu bea ra tsitsi lasia lhe raka lhalhaba xiani kia lhe. <sup>28</sup> Ganna chi dhulo aka nuní, la'ania nna gwalelhidha ikile lhe tsitsi gwalese'e, kumu neti chi tteba esiaya kini odiláya le.

<sup>29</sup> Utixxi'agabani Jesús-ni kana ttu tisa. Aníha benie kini utte dákana bí diani nu raka lebie kixxi'anie kanaha. Nianna tti ree:

—Gwalugíaruga lo ka ya higu-na lhe o bixaba lo attu yaga. <sup>30</sup> Ganna chi rilenle rega'a lhaga

gekani, la'ania nna chi yule deki chi tteba dabi-gana eta'a iyya. <sup>31</sup> Anágaba la'ania ganna chi ilenle aka nu chi ria-ni, la'ania nna chi yule deki chi tteba dabigana innabia Tata Do Yebáha.

<sup>32</sup> 'Netiru ria, labí chi utti ka benne se'e nnanna tti isia sá aka iyá nuní. <sup>33</sup> Yebáha lhe yiesi lo yu-ni lhe tse'e loobaka nuní, ttaka ka tisa ria-ni teekiba aka nu ra ka benne-ni.

<sup>34</sup> 'Gwaluyú gele, bittu tse'ele uinle nu rakaba lele, nigaba akale nu dusi lhe, kini ni kina ge ka elhaxchacha iki tee yiesi lo yu-nila do ikile, la'ania nna ttu iyyaba lasi isia sá aka iyá nu chi ria-ni. <sup>35</sup> Kumu ttu nnelaba aka nuní, ttiba ttu nu iyaxxuna lhe'e yalhi, aníha-ba aka nuha. Ttu nnelaba isia elha disa ge iyába ka benne se'e yiesi lo yu-ni. <sup>36</sup> Gwaltse'e tsitsi lhe satía gwalulisa Tata Do Yebáha kini dhaale lhaale lo iyá nu aka la'ania lhe anágaba kini aka eso dule arloa, neti benne daya yebáha.

<sup>37</sup> Jesús-ni lo resába rule'enie ka benne ro'o yotuha, lo rela nna raya'ane iki i'iya ta daa ka ya olivuha. <sup>38</sup> Iyába ka benne dila tteba riake ro'o yotuha kini rado nagake gebie.

## 22

*Ka nu loni ge ka benne Israel-ni regila lekani gasina uttikana Jesús-ni*

*(Mt. 26:1-5, 14-16; Mr. 14:1-2, 10-11; Jn. 11:45-53)*

<sup>1</sup> Chi tteba dabigana isia laní nu tee lání Pascua. La'ania nuha tti ro ka benne Israel-ni yettaxtila nu abittu kua dii dia ikiniha. <sup>2</sup> Ka nu loni ge ka bixxudiha lhe ka nu rule'ekinna ka

benne nu ra lo bia bennabi bodha'an Moisés-ni sigába regila lekani gasina uttikana Jesús-ni, kumu de rasikinna ge ka benne.

<sup>3</sup> La'ania nna tti uta'a nu xxegwiha lhe'e lasto Judas nu tegaba lání Iscariote. Lana selana len ka benne tsi'inu (12) rudhetini Jesús-ni. <sup>4</sup> Nianna ugiana gwanne lenna ka nu loni ge ka bixxudiha lhe ka nu loni ge ka nu rise'ekana ruyúkana ro'o yotuha, kini gaxasina uinna ki utena Jesús-ni lasi ná ka nuha. <sup>5</sup> Ka nuha nna bedekabakinna ge nu ranaha, nianna tti bisia ro'okani ugwekana Judas-ni belhiu. <sup>6</sup> Lana nna gwa uxielhabana dhina belhuha. Nianna udulo ttebana begila leni gasina utena Jesús-ni lasi ná ka nuha tti anuttu benne se'e.

*Jesús-ni roe len ka benne rudhetinieha irse ge laní Pascua*

*(Mt. 26:17-29; Mr. 14:12-25; Jn. 13:21-30; 1 Co. 11:23-26)*

<sup>7</sup> Tti chi bisia laní tti ro ka benne Israel-ni yettaxtila nu abittu kua dii dia ikiniha, la'ania teeki ruttike ka neru re'eni to ki roke tti raka laníha. <sup>8</sup> Nianna udhelha Jesús-ni Pedro-ni lhe Juan-ni lhe, ree kana:

—Gwaltsia, gwaluni irseri'i kini gori'i nnanna bisia laní Pascua.

<sup>9</sup> Lakana nna rákane:

—¿Gá raka lelu tsiatu sentu irseha?

<sup>10</sup> Jesús-ni nna bekabie gekani, ree:

—Ganna chi diale ga'ale ro'o yiesiha, niha eti'ale ttu nubiyú dedána denojana ttu re'e inda. Gwaltsia gwatanalha na ataliba eta'ana lhe'e yo'oha. <sup>11</sup> Nianna gwaligasi xxana yo'oha:

“Maestruha rinnaba tise, ree: ¿Gon-na do ttu quartu ata go irse lania ka benne rudhetinia-ni irse ge laní Pascua?” <sup>12</sup> Xxana yo'oha nna ule'enna le yo'o nu do berupa kuaha. Niha chi do tse ttu quartu xeni. Lhe'e nuha gwaluin irse ki gori'i.

<sup>13</sup> Nianna diakana nna gwaxxakabakana tti tteba ra Jesús-ni kana. Niha benkana irse ge laní Pascua.

<sup>14</sup> Tti chi bisia ura go irsekeha nna bedo Jesús-ni lenie ka apóstol geeha ro'o mexaha.

<sup>15</sup> Nianna rabie ke:

—¿Yalhá chi re lasia go irsea len lebi'i nnanna laní Pascua-ni, tti lani uyúa elha disa gattia!

<sup>16</sup> Kumu neti ria le, labíru goa luesi irse-ni, axtaliba ganna chi go irsea attu libe len lebi'i ata rinnabia Tata Do Yebáha.

<sup>17</sup> Nianna tti bedaxxue ttu xiga ta'a vinu nna iki de chi begwebie ixkixaru len Tata Do Yebáha, nianna rabie:

—Gwaludaxxu nuní nna gwali'iya iyále latti latti. <sup>18</sup> Kumu neti ria le, labíru i'iyaa vinu-ni, axtaliba ganna chi isia sá innabia Tata Do Yebáha.

<sup>19</sup> Nianna tti bedaxxue yettaxtilaha nna iki de begwebie Tata Do Yebáha ixkixaru, nianna tti ulha'abie lhe'e benneha nna begwebie ke nna ree:

—Benne-ni anke bela latia. De lebi'i nna rutea bela latia-ni ki gattia odiláya le. Gwaligo benne-ni nna aní uinle kini sadú lele neti.

<sup>20</sup> Aníha-gaba benie len xiga ta'a vinuha. Iki de chi beko irsekeha, nianna tti bedaxxue xigaha nna ree:



—Vinu-ni ankana reni kia. Rugwena lidhaka tisa kubi bodha'an Tata Do Yebáha. De lebi'i nna ulalia reni kia-ni kini odiláya le. <sup>21</sup> Ttaka nu utena neti lasi ná ka nu uttikana netiha, niiba do nuha len neti ro'o mexa-ni. <sup>22</sup> Gwalí galá neti benne daya yebáha, eya'abaa attiba chi ga'anna satea. Ttaka gwalíchiru le nu utena neti lasi ná ka nu uttikana netiha.

<sup>23</sup> Nianna tti udulo ka benne rudhetinieha rinnaba tisa luesike nuxake nuha ruinke uteke Jesús-ni lasi ná ka nu uttikaneha.

*Ka nu rudhetini Jesús-ni ridaka len luesikani nuxakana aka nu ra xxeniru leni*

<sup>24</sup> Ka benne rudhetini Jesús-ni uduloke rulisa luesike ki nuxake nuha akaruke benne inná xxeniru leke tti adíke. <sup>25</sup> Jesús-ni nna ree ke:

—Yiesi lo yu-ni ka nu rinnabia-na lhe ka nu ra xxeni lekinna lhe, ka nuná rinnabiabakana ka yiesi gekani attiba rakaba lekani, nianna rákana deki ankabakana ka nu ruin tse. <sup>26</sup> Ttaka lebi'i labí aná dika uinle. Lebi'i nu uinlale: nu inná xxeniru leniha, nuha-la uinna deki labí ra xxeni leni; nna nu rinnabiana adí ka nuha, nna akalana attiba ttu benne rixúe rute nee len adí ka nuha. <sup>27</sup> Nianna, ¿núkana nuha ra xxeniru lekani ganna? ¿Si nu do lo mexaha ak? ¿Nú riga'ana elho lhe'e ye'ena ro nu do lo mexaha ak? ¿Laaba ganna nu do lo mexaha, lana nuha ra xxeniru leni? Neti nna labí runia aná, sinuki dolaa len lebi'i kini rixúa rute náya len lebi'i.

<sup>28</sup> 'Lebi'i nuná gwa use'ele len neti tti biyúa iyába ka elha disa chi gwatea. <sup>29</sup> De nuha nna neti utea lo neda gele ki innabiale ttiba ben Tata kiahá len neti, <sup>30</sup> kini anáchu aka gele gole lhe

i'iyale len neti ata dhoa innabiyaha. Anágaba lebi'i kwiagabale ata innabiale kini uinle elhuxtisi ge ka benne tsi'inu (12) dhi datiake benne tee lábie Israel.

*Jesús-ni rigixxi'abie deki Simón Pedro-ni labí dhi ro'oni deki ankabienne*  
(Mt. 26:31-35; Mr. 14:27-31; Jn. 13:36-38)

<sup>31</sup> Jesús benne anke Xxanari'iha rágabe Simón-ni:

—Simón, nu xxegwiha chi unnabana len neti kini ugwelhaa na udekina ikile ttiba ttu xuxtila.

<sup>32</sup> Ttaka neti nna chi unnabaa len Tata kiahá gelu kini abittu udhanlu tsia lelu neti. Lu nna ganna chi eyekilu odaxxulu neda kiahá, la'ania nna lu nuná ebeki tsitsilu le ka betsi to gelu-ni kini ese'e tsitsike lo neda kia.

<sup>33</sup> Simón-ni nna rane:

—Neti gwadúbaa lenlu xa tata, meskila tsia lania lu lisiyya, lhe o meskila gattia len kwinalu lhe.

<sup>34</sup> Jesús-ni nna bekabie geni, ree:

—Pedro, neti ria lu, nnolha, tti lanila kwesi chinkaha, lu tsunna libela chi bedhea lelu a ridí ro'olu deki ankabienlu neti.

*Jesús-ni ree gasina teeki uin ka benne rud-hetinieha*

<sup>35</sup> Nianna unnaba tisa Jesús-ni ke, ree:

—Tti udhelhaa le tti abittu belhiu cheleha lhe tti abittu chele nu ixuinle tsu'ule nedaha lhe anágaba tti abittu che gwaracha geleha, la'ania, ¿si biyasa ttu bixa gele?

Lake nna bekabike, ráke:

—Labí.

<sup>36</sup> Nianna ree ke:

—Ttaka nnanna nu tee belhiu geniha nna teeki dheni belhiu geni, anágaba nna ujana nu ixuinna tsu'una neda. Nu abittu espada geni tee nna utto'ona jabana geniha kini go'ona ttu espada geni. <sup>37</sup> Kumu neti ria le, teeki satea attiba ra lo ka yetsi ge Tata Do Yebáha ata dia ra: “Bedhakabakane ttiba rudhakakana ttu nu ruin satsa.” Kumu iyába nu ra lo ka yetsi ge Tata Do Yebáha deki satea tee kiba aka nuha.

<sup>38</sup> Lake nna ráke:

—Tata, ne chupa ka espada se'e nii.

Lee nna bekabie, ree ke:

—Chinka, ttanába.

*Jesús-ni rilhapie tisa len Tata Do Yebáha iki i'ya ata daa ka ya olivuha*

*(Mt. 26:36-46; Mr. 14:32-42)*

<sup>39</sup> Nianna beria tteba Jesús-ni lhe'e yo'oha nna diabie iki i'ya ata daa ka ya olivuha, benbe attiba chi labinie runie. Ka benne rudhetinieha nna danalhagabake bie. <sup>40</sup> Tti bisinke iki i'yaha, nianna ree ke:

—Gwalinnaba len Tata Do Yebáha kini abittu dhi yie nu xwegwiha le nna eyadi gaale.

<sup>41</sup> Lee nna biru'une ata se'ekeha, biru'unabe ttiba ata radhá ttu íyya tti rigu'unari'i na. Nianna tti bedú xibie unnebie len Tata Do Yebáha, ree:

<sup>42</sup> —Tata to, ganna kwinalu edá lelu, bodiláttu neti lo elha disa uyúa-ni. Ttaka labí nu innía aka; nu inná kwinabalu aka.

<sup>43</sup> Nuha-ba ree nna tti uka xxe ttu anjeli ge Tata Do Yebáha bisie kini udú tsitsie bie. <sup>44</sup> Tti lo ruyú xxatta Jesús-ni elha disaha, adikala itú lebie rilhapie tisa len Tata Do Yebáha. Indedha

geeha nna tsuin tsuinba riginnina lo yu ttiba risuni reni.

<sup>45</sup> Tti uluxanie unne lenie Tata Do Yebáha, nianna bedú liibie nna besine ata se'e ka benne tsunna rudhetinieha, gwaxxake ka benneha te'adhike de du si'i leke. <sup>46</sup> Nianna ree ke:

—¿Beaka te'adhile? Gwalchadha nna gwalinnaba len Tata Do Yebáha kini abittu dhi yie nu xxegwiha le nna eyadi gaale.

*Bedaxxukana Jesús-ni kini uttikane*

*(Mt. 26:47-56; Mr. 14:43-50; Jn. 18:2-11)*

<sup>47</sup> Sa dula Jesús-ni rinnebie, ttiru chi bisin ixé ka benne ata dueha. Nu tee láni Judas, delába nu selagabana ka benne tsi'ínu (12) rudhetinieha, lana daneruna lo ka benneha. Nianna ubigana gwattona xxaga Jesús-ni. <sup>48</sup> Jesús-ni nna rabie na:

—Judas, neti benne daya yebáha, ¿si de utolu xxagaa-ni nna utelu neti lasi ná ka nu uttikana neti?

<sup>49</sup> Tti chi bilani ka benne se'eke len Jesús-ni nu raka la'ania, nianna ráke bie:

—Tata, ¿si gutíatu len ka espada-ni?

<sup>50</sup> Nianna ttu ka benneha benie gwe nubiyú riben lo sina ge bixxudi xeniha, uchúe naga ben geni. <sup>51</sup> Ttaka Jesús-ni nna rabie:

—Chinka, ttanába.

Nianna tti utane naga nubiyúha nna beyonie nagani. <sup>52</sup> Nianna rabie ka nu daa udaxxukaneha, delába ka nu loni ge ka bixxudiha lhe ka nu rise'e gweyú ro'o yotuha lhe anágaba ka nu anka benneola ge ka nu Israel-ni lhe, rabie kana:

—¿Beaka ttiba ttu nu daa gwedaxxu ubana dale gwedaxxu neti, denle espada lhe yaga lhe?  
<sup>53</sup> Ki ttu ttu sába udúa len lebi'i ro'o yotuha, nna abí chiga bedaxxule neti. Ttaka nnanna anka ura gele, kumu nnanna anka chulha rinnabia nu xxegwiha.

*Pedro-ni labí uxí ro'oni deki ankabienna Jesús-ni*

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

<sup>54</sup> Nianna tti bedaxxukana Jesús-ni nna dechekane lisi bixxudi xeniha. Pedro-ni nna idittuliba danalhana. <sup>55</sup> Nianna tti bekuakana gi lali'a ge yo'oha nna use'ekana abi'iba kwe'e nuha. Niha-gaba beteche Pedro-ni lagwi gekani. <sup>56</sup> Ttu nuila riben sina niha, tti bilenna Pedro-ni dona kwe'e giha, nianna begía tsittabana loni nna rana:

—Nubiyú re nii, len Jesús-nigaba reki nuní.

<sup>57</sup> Ttaka Pedro-ni nna labí uxí ro'oni, rálana:

—Labí ankabiati nuná xa nuila.

<sup>58</sup> Ttu sattiruba chi bedete nna lengwa chi bedeláni attuna, nianna redenána:

—Lu lhe, ki luesi ka nunágabalu.

Ttaka Pedro-ni nna rana:

—Laa luesi ka nunága neti.

<sup>59</sup> Ttiba ttu ura chi bedete, lengwa chi redená attuna:

—Neti rakati nu re nii len nunágaba reki nuní, kumu nu Galileagaba nuní.

<sup>60</sup> Ttaka Pedro-ni rana:

—Labí yua bí ge nuná rinnelu.

A riluxala rinnenaha, ttiru chi uresi chinkaha.  
<sup>61</sup> Nianna tti bodeki lo Jesús benne anke Xxanari'iha belannie lo Pedro-ni. Lana nna gwadú tteba leni tti ree: “Nnolha attila lani kwesi chinkaha, lu tsunna libela chi bedhea lelu abí ridí ro'olu deki ankabienlu neti.” <sup>62</sup> Nianna beria tteba Pedro-ni ro'o yo'oha nna uresibana ttibaxkaba leni de releninna.

*Jesús-ni ruxisikana gebie*

(Mt. 26:67-68; Mr. 14:65)

<sup>63</sup> Ka nubiyú se'ekana ruyúkana Jesús-ni nna ruxisikana gebie lhe rudhenkane lhe.

<sup>64</sup> Ruttokana lobie nna tti rinnaba tisakane, rákane:

—Unne ya'achu, ¿nú nuná bedhenna lolu?

<sup>65</sup> Bikala nuha rákane rulisa xxattakane.

*Jesús-ni biso due arlo ka uxtisi ge ka nu Israel-ni*

(Mt. 26:59-66; Mr. 14:55-64; Jn. 18:19-24)

<sup>66</sup> Tti ugwani dilaha nna bitupa ka benneola ge ka nu Israel-ni lhe ka nu loni ge ka bixxudiha lhe ka nu rule'ekinna ka benne nu ra lo bia bennabi bodha'an Moisés-ni lhe, ka nuha uchekane ata ritupakana ruinkana elhuxtisiha. Nianna tti unnaba tisakane, rákane:

<sup>67</sup> —Utixxi'en ri'itu, ¿si lu ankalu Cristu benne chi ga'anani Tata Do Yebáha idhelhe?

Labie nna bekabie gekani, ree:

—Ganna innía: “Ila”, la'ania nna laa gweyyaga lele kia <sup>68</sup> lhe anágaba ganna neti innaba tisaa le ttu bixa, la'ania nna abígaba ekabile kia. <sup>69</sup> Ttaka debá nnanna neti benne

daya yebáha, esinaa dhoa daka ná ben ge Tata Do Yebaa benne ra xxeni leeha.

<sup>70</sup> Nianna iyábakana unnaba tisakane, rákana:

—Ganna aníha nna, ¿si lu nuná ankalu Xi'in Tata Do Yebáha?

Jesús-ni nna bekabie gekani, ree:

—Lebi'iba chi ra deki nuná ankaa xa.

<sup>71</sup> Nianna rákana:

—Nnanna labíru riyasinri'i kixxi'akinna ri'i nuxa ankana. Ki kwinabari'i chi biyieninri'i nu rana.

## 23

### *Jesús-ni biso due arlo Pilato-ni*

(Mt. 27:1-2, 11-14; Mr. 15:1-5; Jn. 18:28-38)

<sup>1</sup> Nianna iyábakana bedú liikana nna uchekana Jesús-ni gwatso dúkane arlo Pilato-ni.

<sup>2</sup> Nianna udulokana besiakana ikie, rákana:

—Nubiyú du nii gwaxxakatu na rekina ruchixxina iki ka benne getu-ni lhe rusunana uteke belhiu nu ruteri'i len César nu rinnabia xeniha. Anágaba nna rana deki lana ankana Cristu nu rinnabia.

<sup>3</sup> Nianna unnaba tisa Pilato-nie, rane:

—¿Si lu ankalu nu rinnabia ge ka nu Israel-ni?

Lee nna bekabie geni, ree:

—Luba chi ra deki nuná ankaa xa.

<sup>4</sup> Nianna ra Pilato-ni ka nu loni ge ka bixxudiha lhe ka benne sama niha lhe, rana ke:

—Neti, labí raxxakaa bixa tulha daa nu-biyú-ni.

<sup>5</sup> Ttaka lakana nna doelhaba ruinkana, rákana:

—Rekina rutsatsana ka benne. Itúba daka Judea-ni rekina rule'enna ke nu yuna. Udulona daka Galilea-ni nna axtaba bisiana nii.

*Jesús-ni biso due arlo Herodes-ni*

<sup>6</sup> Tti biyienin Pilato-ni rudettikana Galilea-ni, nianna unnaba tisana kana ganna Jesús-ni anke nu Galilea. <sup>7</sup> Tti biyieninna rákana deki dabie daka lo yu ata rinnabia Herodes-ni, nianna bedhelhane arlo Herodes-ni kumu lhe'esi Jerusalén-nigaba re nuha la'ania. <sup>8</sup> Herodes-ni nna tti bilenna Jesús-ni yalhá bedeakinna kumu chi usá re leni ilenne de biyieninna ge nu runieha. De nuha nna raka leni ilenna unie ttu milagru. <sup>9</sup> Laxkala ixé nu unnaba tisane, ttaka labie nna kwachiruba bekabie geni. <sup>10</sup> Ka nu loni ge ka bixxudiha lhe ka nu rule'ekinna ka benne nu ra lo bia bennabi bodha'an Moisés-ni, se'ekana nna doelhaba ruinkana rukinnikane. <sup>11</sup> Herodes-ni lenna ka soldadu geniha nna labí biyú tsekane, bexisilakana gebie. Nianna begukukane ttu lari raka galha loni nna tti bedhelhakane arlo Pilato-ni. <sup>12</sup> La sáha nna Pilato-ni lenna Herodes-ni bese'e tse len luesikani, kumu tti lanila aka nuní, labí raka uyú tse luesikani.

*Beda'aba ro'okani uttikana Jesús-ni*

*(Mt. 27:15-26; Mr. 15:6-15; Jn. 18:38-19:16)*

<sup>13</sup> Pilato-ni nna bottupana ka nu loni ge ka bixxudiha lhe ka uxtisi ge ka nu Israel-ni lhe, anágaba ka benne ge yiesiha lhe. <sup>14</sup> Nianna tti rana kana:

—Lebi'i betega'ale nubiyú du nii loa, ru-siale ikini rale deki rekina rutsatsana ka benne lhe'esi-ni. Ttaka neti nna arlobale chi unnaba



tisaa na nna labí gwaxxakaa deki ruinna nu rusiale ikinna. <sup>15</sup> Nigaba Herodes-ni labí gwaxxakana bixa ben nuní, ki bedhelhalana nuní len ri'i attu libe. Gwaluyúrua, labí chi ben nuní ttu bixa nu dika ralhana gattina. <sup>16</sup> Laxkala ugwebaa na ttu elha disa tsitsi, iki de nuha nna olhábaa na.

<sup>17</sup> [Aníha ra Pilato-ni kumu kua laníba teeki ebeana ttu nu tee lisiyya.] <sup>18</sup> Ttaka iyábakana tulapaba uresi'akana, rákana:

—¡Betti nuná nna Barrabás-naba bodilaa!

<sup>19</sup> Barrabás-ni tena lisiyya kumu lhe'esiha lana lenna adíru ka nu subí, bese'e disakana arlo ka uxtisiha, anágaba nna de benna elhutti. <sup>20</sup> Pilato-ni nna de raka leni odilána Jesús-ni, aníoka nna belisana kana attu libe. <sup>21</sup> Ttaka lakana nna adíla idisa uresi'akana, rákana:

—¡Betá nuná lo ya kurusi! ¡Betá nuná lo ya kurusi!

<sup>22</sup> Beyonna libeha nna ra Pilato-ni kana:

—¿Bíla nu satsa ben nuní ganna xa? Neti labí raxxakaa bixa benna ttu nu dika ralhana gattina. Ugwebaa na ttu elha disa nna iki de nuha nna odilábaa na.

<sup>23</sup> Ttaka lakana nna bittuba bedo nagakani, ribesi'anibakana rinnabakana utáne lo ya kurusi. De ribesi'a xxattakanaha nna aloba biri'a lenkana, <sup>24</sup> ben Pilato-ni nu rinnabakanaha. <sup>25</sup> Aníha uka nna bodilábana nubiyú nu unnabakana odilánaha, delába nu tee lisiyyaha de bedú disana arlo ka uxtisiha lhe de benna elhutti lhe. Ttaka Jesús-ni nna botebane lasi nákani kini udhakakane nu rakaba lekani.

*Jesús-ni betákane lo ya kurusiha*  
(Mt. 27:32-44; Mr. 15:21-32; Jn. 19:17-27)

<sup>26</sup> Tti chi dia lenkana Jesús-ni kini utákane lo ya kurusiha, nianna bedaxxukana Simón ge lhe'esi Cirene-ni, dedá nuha ugíana lhe'exxi. Nuha bejuakana na ya kurusiha kini bijana nuha tanoona Jesús-ni.

<sup>27</sup> Danalhagaba ixé ka benne lhe'esiha lhe anágaba danalhagaba ka benne nuila ribesike gebie de resi'ikanie bie. <sup>28</sup> Ttaka Jesús-ni nna bodeki loe ata se'e ka benneha nna ree ke:

—Benne nuila ge Jerusalén. Bittu kwesile kia, gelale gwalikwesi lhe ge ka xi'inle-na lhe. <sup>29</sup> Kumu isia sá inná ka benne: “Karubáru ka nuila ka nu abittu aka uja xi'inkani lhe ka nu anuttu xi'inkani chi bija lhe, anágaba ka nu anuttu nuto chi begasikana lhe.” <sup>30</sup> Nianna dhuloke gake ka i'iya-na: “¡Gwaloguku ikitu!”, nna ka sitta xua xea-na nna gake kana: “¡Gwalukatsi ri'itu!” <sup>31</sup> Kumu ki neti ankalaa attiba ttu ya ya'a nna rudhakakana neti aní, adírula udhakakana lebi'i de ankale attiba ttu ya bisi.

<sup>32</sup> Chegabakana a chupa ka nubiyú ben satsa kini uttikana ka nuha itupa len Jesús-ni. <sup>33</sup> Tti chi bisinkana lo yu tee lání Bega Iki Nu Yatti, niha betákana ke lo ka ya kurusi. Ttu ka nu ben satsaha betákana na daka ná ben gebie nna attuna nna daka ná yattie. <sup>34</sup> Nianna unne Jesús-ni, ree:

—Tata, uxíchi elha xen lasi ge ka nu se'e nii, kumu labí yu ka nuní nu ruinkana.

Ka soldaduha nna bedelhakana suerti kini elha'akana ka xo Jesús-ni. <sup>35</sup> Ka benne nna

se'ebake rulannike, ka uxtisiha nna ruxisilakana gebie, rákana:

—Benne subi gwa bodilána. Nnanna nna titúbana eláchuna ganna gwalíginna ankana Cristu nu chi bekwe Tata Do Yebáha.

<sup>36</sup> Anágaba ka soldaduha ruxisigabakana gebie. Ribigakana nna rugwekane vinu idí,  
<sup>37</sup> nianna ra kane:

—¡Ganna gwalíginlu ankalu nu rinnabia ge ka nu Israel-ni, titúbalu beláchu lo ya kurusi-ni!

<sup>38</sup> Lo ya kurusiha daka xekie, niha taa ttu breta ra loni: “Nuní ankana nu rinnabia ge ka benne Israel.”

<sup>39</sup> Ttu ka nu ben satsa taa lo ya kurusiha rulisa satsane, rane:

—¡Ganna gwalíginlu ankalu Cristu, titúbalu beláchu lo ya kurusi-ni lhe bodiláchu ri'itu lhe!

<sup>40</sup> Ttaka attu nuha nna bedhaka disalana nu rinneeha, rana na:

—Lu, ¿si bi gwa elha rasi gelu tee len Tata Do Yebáha ki luesi elha disa ruyú benne-nigaba ruyúlu? <sup>41</sup> Ri'i ruyú galári'i elha disa lo ya kurusi-ni, kumu ralhábári'i kixari'i ge nu benri'i, ttaka benne-ni nna labí bixa nu satsa chi benie.

<sup>42</sup> Nianna tti rana Jesús-ni:

—Tadúttu lelu neti ganna chi dhulolu innabi-aluha.

<sup>43</sup> Nianna ra Jesús-ni na:

—Netiru ria, nasá tteba esin lenlu neti ata dho tselu.

*Jesús-ni uxíbie elhutti lo ya kurusiha*

*(Mt. 27:45-56; Mr. 15:33-41; Jn. 19:28-30)*

<sup>44</sup> Ttiba tu retin tsi'inuha (12) bechulha itúba yiesi lo yu-ni nna retin tsunnaha-liba beyani.

<sup>45</sup> Tatubisa-na bechulhaba lobie nna lari daa lagwi lhe'e yotuha nna chubaa t́ba bireda nuha.

<sup>46</sup> Jesús-ni nna unnebie idisa, rabie:

—Tatoo, lasi nálu otea elha nabani kia-ni.

Nuha-ba rabie nna tti uttie.

<sup>47</sup> Tti chi bilani soldadu nu baninna ttu gayua (100) ka soldadu ge Roma-ni nu chi ukaha, nianna rana:

—¡Xxeniba ra le Tata Do Yebáha! Gwalíba nna nubiyú-ni benne tseba anka nuní.

<sup>48</sup> Iyába ka benne tupake ata uka nuha, tti bilákanie iyá nu chi ukaha, nianna si'iba du leke rudhen ro'o lastoke deyyake. <sup>49</sup> Ttaka iyába ka benne ankabiakanie Jesús-ni lhe ka benne nuila gwanalhake bie tti ugwekie daka Galilea-ni lhe, iyába ka benneha idittuliba se'eke rulannike iyá nu rakaha.

*Jesús-ni bekatsike bie*

(Mt. 27:57-61; Mr. 15:42-47; Jn. 19:38-42)

<sup>50</sup> La'ania udo ttu benne biyú ĺbie José, re tse lebie lhe runie nu dika ixú lhe. Benneha anke benne lhe'esi Arimatea, ttu yiesi re daka Judea-ni. Benneha sele lhe'e ka nu ruinkana elhuxtisi ge ka nu Israel-ni. <sup>51</sup> José-ni dogabe ribede isia sá innabia Tata Do Yebáha ka benne lhe anágaba nna bittugaba uyu'u lebie nu ben adí ka nuha len Jesús-ni. <sup>52</sup> Nianna ugíabie arlo Pilato-ni nna unnabe lenna kini ugwelhane elhide Jesús-ni lo ya kurusiha. <sup>53</sup> Iki de belhide benneha, nianna tti bottesie bie lhe'e ttu lari sibi nna gwakatsie bie lhe'e ttu baa do lhe'e ttu íyya daa niha, ata lanú benne yatti chi bigatsi niha.

<sup>54</sup> La'ania anka viarna nna la sáha ankana tti

rese'e tse ka benne Israel-ni kumu chi isia sá tti reyaka leke.

<sup>55</sup> Ka benne nuila daa lenke Jesús-ni ttili dabie daka Galilea-ni, ka benneha ugíake nna bilákanie yieru baaha lhe bilákanie gasina utixxake benne yattiha lhe. <sup>56</sup> Tti besinke lhe'e yo'o ata se'ekeha nna benke ka biste rure ixixxi lhe adíru ka nu kabike lati Jesús-ni. Nianna beyakaba leke la sá tti reyaka le ka nu Israel-ni. Benbake attiba chi ga'anna lo bia bennabi bodha'an Moisés-ni.

## 24

*Jesús-ni beyaka benbie lo elhuttiha*  
(Mt. 28:1-10; Mr. 16:1-8; Jn. 20:1-10)

<sup>1</sup> Ugwani dila tti bedú ni'a xumanuha, dila tteba udá ka benne nuilaha diake iki baaha cheke ka nu rure ixixxi chi benkeha. <sup>2</sup> Tti bisinkeha nna bilákanie íyya yaya ro'o yieru baaha, labíru yaya nuha ro'oni. <sup>3</sup> Nianna uta'ake lhi'u, ttaka lanúru Jesús benne anke Xxanari'iha gwaxxakake niha. <sup>4</sup> Uka télakanie tti bilákanie nu chi ukaha. Ttiru nna ttu nnelaba chi uka xxe chupa ka benne biyú ata se'ekeha, nukuke xo raka lhalhaba loni. <sup>5</sup> Ka benne nuilaha nna itú rasibakanie bedetta loke lo yu. Ttaka ka benne biyúha nna ráke ke:

—¿Beaka regilale benne anka baniha lhe'e ka benne chi uttiha? <sup>6</sup> Lanúru benneha tee nii, chiba beyaka ben benneha. Gwalodhú lele ge nu rabie tti sa rekie daka Galilea-ni. <sup>7</sup> Rabie deki lee benne daa yebáha, teeki iginnie lo ná ka nu

ruin satsaha nna utákane lo ya kurusiha; eyonna ubisaha nna eyaka benbe.

<sup>8</sup> La'aniala nna tti bodhú leke ge ka tisa unne Jesús-ni. <sup>9</sup> Nianna bedáke ro'o yieru baaha nna besinke utixxi'akanie ka benne sinea (11) bedhetinieha lhe adíru ka benne se'e niha, utixxi'akanie ke iyá nu chi bilákanieha. <sup>10</sup> María Magdalena-ni nna Juana-ni nna María nan ge Jacobo-ni lhe adíru ka benne nuila, ka benneha nuha besinke utixxi'ake. <sup>11</sup> Ttaka ka apóstoaal nna bitti ukalakanie ge nu ra ka nuilaha nna labí ugía leke ge ka benneha.

<sup>12</sup> Ttaka Pedro-ni nna bexunni ttebana diana ro'o yieru baaha. Tti bisinna ro'o nuha nna biyet-tana beká loni; ttaka lanúru Jesús-ni bilenna, a sunruba ka lari nu bitesi benneha se'e. Nianna beyekina besinna lhe'e yo'oha nna rebanabinna ge nu chi ukaha.

*Nu gwate ka benne diake lhe'esi Emaús  
(Mr. 16:12-13)*

<sup>13</sup> La sáha-gaba, dia chupa ka benne bedhetini Jesús-ni yu'uke neda diake lhe'e ttu yiesi tee láni Emaús. Re nuha ttiba sinea (11) kilómetru idittu len lhe'esi Jerusalén-ni. <sup>14</sup> Diabake rinneke ge iyá nu chi ukaha. <sup>15</sup> Laka diake rinnekeha nna ttiru chi uka xxe Jesús-ni gwaxenie ke, nianna dia lenie ke turo'o. <sup>16</sup> Ttaka ttiba ttu nu yu'u ttu bixa loni, aníha-ba ankake, labí rugwelhana eyakabiakanie bie. <sup>17</sup> Jesús-ni nna unnaba tise ke, ree:

—¿Bí ge nuná rinnele yu'ule neda-ni?

Lake nna paba bese'eke nna si'iba du leke.  
<sup>18</sup> Nianna unne ttu ka benneha, delába benne lá Cleofas, bekabie ree:

—¿Si ttúbalu nu dittu dolu lhe'esi Jerusalén-ni nna abittu binalu nu uka lhe'esi-ni nnaya nnadhi?

<sup>19</sup> Labie nna bekabie, ree ke:

—¿Bí uka?

Lake nna ráke:

—Nu gwate Jesús ge Nazaret-niba xa. Benneha uke profeta ge Tata Do Yebáha. Yalhá lhe'e unnebie lhe xxeniba anka nu benie arlo Tata Do Yebáha lhe arlo iyába ka benne lhe. <sup>20</sup> Ttaka ka nu loni ge ka bixxudiha lhe ka uxtisi geri'i-ni nna betelakane lasi ná ka nu uttikane. Ka nuha nna beda'a ro'okani rákana deki gattie, nianna betákane lo ya kurusiha. <sup>21</sup> Batu ri'itu xxenba letu deki labie odilábie ka benne Israel-ni. Ttaka betse'e loona aníla uka, chi uka tsunna ubisa-ni tti gwatebie nuha. <sup>22</sup> Ttaka anágaba nna ttu chupa ka benne nuila se'eke len ri'ituha, chi bedú téke letu kumu dila tteba ugíake ro'o yieru baaha nna <sup>23</sup> ttaka lanúru benne yattiha gwaxxakake. Nianna beyekike besiake lhe'e yo'o ata se'etuha nna rigixxi'ake ráke deki bele'e lo ka anjeli ge Tata Do Yebáha lenke. Ka anjeliha nna ráke deki Jesús-ni anka benba benneha. <sup>24</sup> Chigaba ugía ttu chupa ka benne getu gwalannike ro'o yieru baaha nna gwaxxakabake tti tteba ra ka nuilaha, ttaka Jesús-ni nna lanúbie bilákanie.

<sup>25</sup> Nianna rabie ka benneha:

—Gattiparuba riyasale tte denle lhe gattiparuba tsitsi anka ki tsia lele iyá nu unne ka profeta ge Tata Do Yebáha. <sup>26</sup> ¿Laaba ganna

teeki tate Cristuha iyá nuní atti lanila esine yebáha inná xxeni lebie?

<sup>27</sup> Nianna udulobie utixxi'anie ke ata rinne gebie lo iyába ka yetsi ge Tata Do Yebáha, uduloe len ka yetsi bodha'an Moisés-ni nna belhuxe len ka yetsi bodha'an ka profetaha.

<sup>28</sup> Tti bisinke ro'o yiesi ata diakeha, Jesús-ni nna benbe ttisidiba ttebe tsiabie. <sup>29</sup> Ttaka lake nna unnaba ditibake loe kini eya'ane lenke nna ráke bie:

—Utá, beya'ana len ri'itu, kini chiba dia tatubisaha nuní. Chi tteba galha nuní.

Nianna uta'abie eya'ane lenke. <sup>30</sup> Tti chi se'eke ro'o mexaha, nianna bedaxxue yettaxtilaha nna begwebie Tata Do Yebáha ixkixaru, nianna ulha'abie lhe'e benneha, begwebie ke.

<sup>31</sup> La'ania attiba ttu nu biyali loni ukake nna beyoinbia ttebake Jesús-ni, ttaka lee nna benitti loo ttebe. <sup>32</sup> Nianna ra luesike:

—Laxkala bega'a dina lhe'e lastori'i, tti dabie rinne lenbie ri'i tti yu'uri'i nedaha, rigixxi'anie ri'i nu ra lo ka yetsi-na.

<sup>33</sup> Nianna birua uledake nna begu'u ttebake neda besinke lhe'esi Jerusalén-ni. Niha betexxakake tupa ka benne sinea (11) anka apóstoaal lhe adíru ka benne lhe. <sup>34</sup> Ka benneha nna ráke:

—Gwalíba chi beyaka ben Jesús benne anke Xxanari'iha. Chi bele'e lobie len Simón-ni.

<sup>35</sup> Ka benne besinaha utixxi'agabakanie ka benneha nu gwateke tti yu'uke nedaha lhe utixxi'agabakanie ke gasina uka beyakabiakanie Jesús-ni tti rilha'abie lhe'e yettaxtilaha.



*Jesús-ni bele'e lobie len ka benne rudhetinieha  
(Mt. 28:16-20; Mr. 16:14-18; Jn. 20:19-23)*

<sup>36</sup> Sa yu'ulake rinneke ge nuha, ttiruba chi uka xxe Jesús-ni, udúbie lagwi geke nna begwebie ke padiuxi nna ree ke:

—Bittu aka tenle, xen su lasi gwaltse'e.

<sup>37</sup> Lake nna yalhá usikanie, rakakanie ganna ttu espírituba nuha rula'akanie. <sup>38</sup> Ttaka Jesús-ni nna rabie ke:

—¿Beaka raka tenle? ¿Beaka rudú chupana lele? <sup>39</sup> Gwalulanniruga ka ni'aya-ni lhe ka náya-ni lhe. Netiba nuní. Gwaludaxxuruga latia kini aka xen lele. Ttu espíritu labí bela tee lati nuha, nigaba labí yu'una sitta tti rilenle yu'a sitta.

<sup>40</sup> Tti rabie ke aníha, nianna tti bele'enie ke ka ni'eha lhe ka neeha lhe. <sup>41</sup> Ttaka lake nna si se'elake redeakakanie lhe rebanakanie lhe. De nuha nna labí yuke bixa ulaba leke. Nianna unnaba tisa Jesús-ni ke, ree:

—¿Si bi gwa tee ttu bixa goa?

<sup>42</sup> Lake nna begweke bie salha'a belha chi biyexxu. <sup>43</sup> Labie nna bedaxxube nuha nna utoe na arloke. <sup>44</sup> Nianna ree ke:

—Ge nu gwatea-niba nuha chi utixxi'ania le tti sa doa len lebi'iha tti ria deki teeki satea iyá nu dia lo ka yetsi bodha'an Tata Do Yebáha len Moisés-ni lhe nu dia lo ka yetsi bodha'an ka profeta ge Tata Do Yebáha lhe, anágaba nu ra lo ka Salmo-na lhe.

<sup>45</sup> Nianna tti udhalie ikike ki uka geke ute dákanie ka tisa dia lo ka yetsiha. <sup>46</sup> Jesús-ni nna rabie ke:

—Lo ka yetsiha rixxi'a ra deki Cristuha teeba ki gatti benneha nna eyonna ubisaha nna eyaka benbe lagwi ge ka benne chi uttiha. <sup>47</sup> Anágaba nna rixxi'agaba ra deki teeki tsiakana innékana kwenta gebie, kixxi'akinna ka benne deki teeki odúna ke nna odaxxuke neda ge Tata Do Yebáha, kini anáchu nna ixú elha xen lasi ge ka tulha ruinke. Dhulokana kixxi'akana lhe'esi Jerusalén-ni, nianna tti tsiakana lhe'e iyába ka yiesi se'e itúba yiesi lo yu-ni. <sup>48</sup> Lebi'i nuná kixxi'ale iyá nuní, <sup>49</sup> neti nna idhelhaa len lebi'i benne chi ra Tata kia deki utebie gele. Ttaka nna teeki kwedale lhe'esi Jerusalén-ni axtaliba ganna chi unie kini inná tsitsi lele. Yebáha-li daa nu tsitsi ra leeha kini utebie na gele.

*Jesús-ni beyapie deyye yebáha*

*(Mr. 16:19-20)*

<sup>50</sup> Iki de nuha nna tti che Jesús-ni ke biriake ro'esiha nna bisinke axtaba Betania. Nianna tti ulhidha nábie gwetsá nna unnabe kini aka len Tata Do Yebáha ke. <sup>51</sup> Laka due rinnabe geke len Tata Do Yebáha, nianna beru'une ata se'ekeha nna beyapie deyye yebáha. <sup>52</sup> Lake nna iki de chi bedú xibike bilhake ge Jesús-ni, nianna redeaka tábakanie beyekike deyyake lhe'esi Jerusalén-ni. <sup>53</sup> Ttu ttu sába se'eke lhe'e yotuha rulhake ge Tata Do Yebáha.

**Ka Tisa ge Tata Jesucristuha  
Zapoteco, Santa Ana Yareni: Ka Tisa ge Tata  
Jesucristuha New Testament**

copyright © 2014 Wycliffe Bible Translators, Inc.

Language: Zapotec, Yareni

Contributor: Wycliffe Bible Translators, Inc.

All rights reserved.

2020-12-01

---

PDF generated using Haiola and XeLaTeX on 22 Dec 2022 from source  
files dated 29 Jan 2022

1fa271cb-de62-58fc-97c6-e1d0fa68b33d